

(欽定)平定七省方略

北京中國書店印行



# THE HISTORY OF THE

THE HISTORY OF THE

THE HISTORY OF THE



欽定勦平捻匪方略卷二百五十八 丙寅年

七月初二日戊午曾國荃奏言午李張賴等酋各

率捻匪由皖竄豫分擾汝陽西平確山遂平等

處直向西趨分股蔓延信陽南陽賒旗鎮一帶

急思窺犯鄂邊爲就食之計查信陽南陽與襄

樊隨棗處處毗連可以朝發夕至業經督臣與

臣通飭水陸各營實力防堵檄令江長貴藍斯

明唐協和等各率所部兵勇嚴防襄樊老河口  
棗陽汎地又派郭松林彭毓橘伍維壽等率新  
軍十餘營拔幟先赴德安再進隨州扼要駐防  
策應諸路並與棗陽之軍聯絡覘賊所向相機  
迎勦臣現與督臣商定儻有大股捻匪悉銳入  
鄂屆時臣卽馳赴德安府城駐紮督率前敵各  
軍勦辦較爲得力且與鮑超霆營聯爲一氣上

下會合冀收夾擊之效奏入

上命軍機大臣傳諭官文曾國藩會國荃曰皖匪全  
股由汝陽等處西趨意圖窺伺鄂邊襄樊隨棗一  
帶與信陽南陽等府州處處毗連官文曾國荃現  
已通飭水陸各營實力防堵並派郭松林等軍先  
赴德安再進隨州扼要駐守布置尙屬周妥該撫  
擬俟捻蹤竄至鄂境卽馳赴德安督辦軍務具徵

勇於任事惟此時捻氛業已逼近鄂疆曾國荃若  
先期前赴德安豫籌防剿於布置調度機宜尤爲  
便捷著卽酌度辦理曾國藩亦宜嚴飭周盛波等  
軍與鄂軍互相援應會合夾擊毋任該匪肆行蔓  
延鮑超一軍自粵東撤回後節節逗留數月以來  
尙未與賊接仗任意遷延坐耗餉項殊屬不成事  
體仍著官文曾國藩傳諭該提督迅赴豫境會同

各軍合力勦辦毋得玩視軍務自干重咎

初七日癸亥李鶴年奏言張總愚等匪在上蔡境

內經官軍擊敗後仍屯踞百尺集一帶六月初  
八日總兵宋慶督帶親兵往襲賊營出其不意  
奪回所踞民莊三處生擒賊目張效固及長髮  
老賊多名總兵保英是日分路進勦派遊擊楊  
春祥等設伏誘敵又斃賊一百五六十名宋慶

遼營前進緊逼賊巢相距不及半里該逆乘夜竄向洪河以北宋慶偵知督隊飛躡追至洪河截及後股匪衆一擁搶渡淹斃殲傷者不計其數餘逆勢急決開洪河之水漫溢河灘阻我進兵之路時陰雨日久途中積潦過膝軍士跋涉維艱賊亦屢敗瞻寒情形窳困臣現飭提督馬德昭暨宋慶等設法進兵乘機痛剿至任賴各



逆竄至太康扶溝旋於六月十五六等日折向  
睢州杞縣等處滋擾延及陳留通許皆有賊蹤  
馬德昭宋慶等軍正與張逆相持相距較遠兼  
顧未遑臣卽飭總兵余承恩管帶壯勇三營迅  
赴省東相機勦辦一面派吉林黑龍江馬隊七  
百名親軍五百名分赴睢杞與各軍會合共挫  
兇鋒奏入

上命軍機大臣傳諭曾國藩李鶴年曰張牛等股匪  
在上蔡境內屢經官軍擊敗仍屯踞百尺集一帶  
復經宋慶等督兵夜襲賊營奪回所踞民莊三處  
追過洪河殲賊甚多此股逆匪屢經敗挫其勢已  
蹙著李鶴年卽飭馬德昭宋慶等迅速進兵乘機  
痛勦務將此股殲盡至任賴等股匪由太康扶溝  
折向睢州杞縣延及陳留通許汴省東南數百里

一片賊氛李鶴年現派余承恩所部三營赴省東  
勦辦並派吉林黑龍江馬隊及親兵各數百名分  
赴睢杞會勦惟豫軍兵力較單不敷分布曾國藩  
所部駐紮於周口一帶者甚多著卽迅派潘鼎新  
劉松山張詩日等督率各營會合豫省各軍併力  
兜勦毋任賊勢蔓延該大臣亦當迅赴周口就近  
調度以期呼應較靈並著嚴檄鮑超一軍趕緊馳

往豫省探蹤迎勦毋任逗留

初九日乙丑曾國藩奏言臣於六月十五日由水

路東下沿途水勢盛漲南陽微山等湖與運河  
連成一片春間所修隄牆自韓莊以下兩岸較  
高沙土質鬆大雨後多已坍塌自黃林莊以下  
二百餘里兩岸較低隄身或露數尺或全淹水  
中目下茫茫巨浸賊匪斷難飛渡將來秋深水

落竟須另行全修二十日行抵宿遷縣二十七  
日准閩敬銘咨稱據曹縣稟報任賴兩逆因張  
市朱仙鎮等處河水驟漲不能西渡仍由扶溝  
太康回竄已至杞縣之沙窩睢州之芋香鋪勢  
將直趨曹境七月初一日又准李鶴年咨稱據  
睢州稟報六月十八日該州西南之馬頭寨已  
被賴逆攻破占踞豫兵不敷馳勦咨商撥兵接

救各等情臣查扼守沙河賈魯河之議必俟捻  
逆各股全趨沙河以南方可興辦現在任賴一  
股旣爲沙河大水所阻不敢西行折而東竄則  
防河之策斷難遽行應卽先行撥兵馳勦劉銘  
傳業於六月二十三日自徐州起行潘鼎新一  
軍前在西華周盛波一軍前在太和此三軍者  
本議分防沙河現今移赴睢州曹考一路專辦

沙河東北之賊而鮑超之霆軍劉秉璋楊鼎勳  
王永勝之淮軍劉松山張詩日之湘軍仍辦沙  
河西南之賊頃已分咨相機勦辦惟自五月下  
旬以後淮南北諸郡大水爲數十年所未有積  
潦盈途深過馬腹軍中米糧子藥車載夫運寸  
步難行不特各軍拔隊濡滯卽臣處文報往來  
亦多阻隔遲誤而秋稼被淹民廬漂沒臣旣自

憾調度乖方軍務毫無起色又恐飢民失所不  
免從賊以圖偷生勦辦撫綏兩俱棘手籌思反  
覆憂愧實深 臣在宿遷停留數日初聞捻蹤回  
竄之信本擬改駐徐州就近調度惟賊蹤旣分  
兩支無論 臣駐何處均有不能兼顧之勢入豫  
之議不可再緩俟與漕 臣吳棠會晤後卽在楊  
莊換船由湖泝淮徑赴陳州周家口籌辦一切



同日喬松年奏言任賴兩逆入豫後卽沿沙河  
上竄因水勢盛漲未能竄渡仍折回陳州有竄  
往曹單之意張牛兩逆自渡沙河後合股竄至  
汝甯並分擾信陽確山意欲窺伺楚境 臣旋恭  
奉

諭旨自槐店以下至正陽關飭 臣派兵設防查自槐  
店至正陽關計四百餘里必須厚集兵力扼防

皖省各軍以英翰張得勝爲大枝應卽責成該  
兩軍辦理自槐店以至江口集以英翰一軍任  
之自江口集至正陽關以張得勝一軍任之均  
令濊河堅守務期穩固其沙河內水師並派總  
兵黃鳴鐸帶領總兵余先元等各船聯絡扼守  
亦令各認地段以專責成不令一賊得渡惟任  
逆一股尙在沙河以北或竄往曹州或回竄皖

境尙未可定無論竄向何處曾國藩所派追擊  
之師必能緊躡其後其淮河內水師經曾國藩  
咨長江水師提督黃翼升會同臣所部礮船分  
段劃守一俟黃翼升到時卽可定議分防均奏  
入

上命軍機大臣傳諭官文曾國藩吳棠曾國荃喬松  
年閻敬銘李鶴年曰任賴兩逆由扶溝太康回竄

已至杞縣之沙窩睢州之芋香鋪勢將直趨曹境  
賴逆又攻破睢州之馬頭寨該逆現爲沙河大水  
所阻不敢西行折而東竄防河之策尙難遽行會  
國藩現令劉銘傳等移紮睢州曹考一路專辦沙  
河東北之賊鮑超等軍仍辦沙河西南之賊卽著  
分飭諸軍相機進攻勿任遷延貽誤淮南北諸郡  
大水實深蘆系撫恤災黎萬不可緩入秋以後水

勢漸消河隄旣須另修不妨以工代賑著曾國藩  
與吳棠李鴻章妥籌辦理毋令被災地方窮民失  
所賴逆一股如竄近徐宿著吳棠派兵協力剿洗  
其張牛股匪前據李鶴年奏經豫軍追過洪河已  
近鄂邊曾國荃前有駐紮德安之奏著卽統兵出  
省擇要扼紮督率鮑超等及曾國藩所派之劉秉  
璋等軍李鶴年所派之馬德昭等軍合力兜剿如

有臨敵畏葸不肯奮勇上前者卽由曾國荃從嚴  
叅辦務須趁賊勢日蹙之時一鼓殄除湖北省城  
及近邊一帶防務著官文悉心籌畫督飭辦理勿  
稍疏懈曾國藩與曾國荃共辦一事將來無論賊  
勢分合地方遠近總須聯絡一氣若能殄滅一股  
兵力較易展布賊蹤已近曹考闈敬銘身任地方  
責無旁貸著卽出省督率防兵認真堵剿儻再令

賊蹤蹂躪定惟該撫是問河防旣暫不能辦喬松  
年惟當飭令英翰等整飭諸軍視賊所向會合夾  
擊不得株守一隅僅爲自完之計黃河水勢甚漲  
目前可稱天險惟轉瞬秋深水涸難保該匪不潛  
圖竄渡並著曾國藩閻敬銘李鶴年督飭防兵巡  
船加意守禦毋任偷越

十一日  
丁卯 鮑超奏言 臣抵鄂後適陰雨連旬江

漢水漲正擬設法由襄樊前進適接督臣曾國藩來咨捻逆東竄徐淮囑臣改道由黃麻至商城以達光固因卽折回黃州循陸而行恭奉

諭旨飭臣星速前進確探賊蹤迎頭截擊查臣所帶各營向不准搭蓋草篷篾席以防火患又禁止借住民房杜絕騷擾頻年征戰所有隨帶棚帳均已朽壞不堪當茲冒暑邁征士卒辛苦萬狀



晴則薰蒸於赤日之下雨則坐臥於淋溼之地  
亟應更換以資遮蔽查舊章凡軍中所需帳棚  
子藥軍械等項由給餉之省一體發給臣馬隊  
十二營需用帳棚千數百架並子藥軍械等項  
應由湖北撥解步隊二十營需用帳棚三千數  
百架並子藥軍械等項應由江西撥發經臣分  
咨江鄂兩省催解旋准湖北撫臣曾國荃飭局

集三十一卷之三十一  
趕造先後全數解齊江西撫臣劉坤一亦經飭局撥發僅於六月內解到帳棚八百餘架尙有二千四百餘架未審何日到營臣因帳棚爲軍中急需誠恐拔隊日遠轉運稽遲勢不得不略爲停住况賊情狡變飄忽靡常師行所至自應挖濠築壘先固根本作竈支釜炊食如常如破賊追奔必攜帶輜重米糧隨隊奔走儻埋鍋造

飯則賊去已遠必難尋其蹤跡因以所製戰車  
藉載行糧並飭各營豫備熟食麥糧每人計足  
一月之食以二十日分載車上隨行以十日各  
置纓纏備用庶連日窺追不致因食耽延無論  
追於何地天晚便可藉車爲營以免飢乏之慮  
籌辦甫具旋據撫臣曾國荃函商若爲中原大  
局計不如任齊豫追軍驅之入境我軍從隨州

出唐縣豫躡其退回豫境之路而檄濟甯雕勦  
之師以一枝扼光固以一枝扼信陽以一枝屯  
周口任賊在南陽盤旋以入鄂境而後調唐縣  
躡後之師突發其閒且有雄師尙在鄂之東北  
將來亦可西趨堯擊捻股雖衆不阻於山谷卽  
死於永濱如此次捻衆入鄂似此辦法實於大  
局有裨並以目下賊旣西趨似不宜急進商城

囑臣在黃安麻城少待以觀賊之定向約會進  
勦共收夾擊之效臣自當遵照辦理奏入

上諭曰卽著趕緊拔營前進該逆現趨舞陽一帶應  
由何路迎勦之處並著相機妥辦毋得因製造戰  
車等事再行遲誤

同日李鶴年奏言張總愚等匪經宋慶在上蔡  
百尺集擊敗後竄踞洪河迤北六月初十日該

逆圍攻王溝營寨提督馬德昭派總兵保英等  
設法渡河往援匪黨登時潰散適總兵劉松山  
等軍追至北路高岡奪回賊踞民莊數處二十  
日劉松山等軍由雙廟進兵復獲勝仗賊衆大  
敗宋慶督率所部悉渡洪河以北鳧水出隊扼  
要截勦馬德昭派隊由王橋夾擊該逆向東敗  
竄宋慶乘勢跟追該逆竄至沙河南岸折趨西

平縣境先是牛洛紅一股分擾西平所屬蔡寨地方十八日馬德昭派隊夜襲賊營圍殺二百餘名生擒多名亦向西南奔去現均竄及舞陽一帶宋慶等軍追過西平飛躡前進而任賴等逆乘虛竄擾睢杞地方攻撲城關勢甚兇悍疊經署睢州知州劉廷柏杞縣知縣查以謙等登陴固守該匪無隙可乘始各退去臣先後所派

馬步各隊陸續行抵睢杞總兵余承恩一軍亦由省城馳至陳留適山東臬司潘鼎新一軍已抵太康二十六日進兵杞境遇賊於石嶺岡油坊岡等處三次接仗擒斬甚衆該逆大潰追至高陽集各莊之賊俱遁官軍仍探蹤追勦余承恩截賊於陳留之東殲斃無算提督劉銘傳一軍亦於七月初二日馳赴睢杞現探匪蹤竄突



祥符蘭儀等境各軍當會合前進迅挫兇鋒奏

八

上命軍機大臣傳諭官文曾國藩曾國荃李鶴年曰  
張牛等逆屢被豫軍勦敗復經劉松山等軍追至  
雙廟及西平等處屢次獲勝賊已西竄舞陽李鶴  
年務飭宋慶馬德昭等軍跟踪追擊並著曾國藩  
檄令劉松山等督率所部窺賊所向盡力躡勦毋

任喘息任賴等逆在睢杞等處肆擾經潘鼎新率  
兵會合豫軍勦辦獲勝劉銘傳亦率所部馳往豫  
境該匪突竄祥符蘭儀一帶勢將由汴梁西遁李  
鶴年當一面嚴防省城一面檄令豫軍奮勇追勦  
並著曾國藩飭潘鼎新等軍合力勦辦黃河一帶  
李鶴年仍當督飭礮船嚴防賊匪搶渡鮑超現任  
麻城據稱因帳房車輛未齊暫行駐候並述曾國

荃函商之語欲分軍布置於光固信陽周口等處  
及任齊豫追軍驅賊入鄂截賊歸路就山谷水濱  
爲扼險殄賊之舉第該匪避兵而行是其慣技旣  
知鄂省駐有重兵豈肯自入陷阱官文曾國藩務  
當權衡緩急辦理嚴飭鮑超覘賊所向迎頭截擊  
陝洛浙川等處武備空虛難保該匪不乘虛奔突  
李鶴年尤當豫飭該地方官督飭團練扼險固守

並著官文會國荃飭令鄂軍越境迎剿兼顧南陽  
浙川要隘以爲豫師聲援會國荃仍遵奉諭旨卽  
出省駐紮德安就近調度

十八日 甲戌 吉林副都統安住奏言查現在著名

捻股如張總愚賴汝洸牛洛紅任柱等本係失  
巢之獸筴走無常已成流賊豫省四面平原最  
利野戰賊之全股如屬集豫境較在他省易於

殲除而近年豫軍未能痛勦賊匪並未大受懲  
創者其弊有三一在督辦大臣不能臨陣二則  
馬步諸軍不能合擊三則賊計多端日增健馬  
夫督辦軍務之臣必須親臨行陣方能調度有  
功臣前在陝西見多隆阿乘馬督隊躬自指揮  
號令一傳將士人人思奮爭爲前驅統帶馬步  
各將領莫不身先士卒躬冒矢石是以所向克

捷今河南撫臣聞一警報授一方略皆係遙度  
懸揣之說焉能洞中機宜縱使籌畫合宜亦屬  
鞭長莫及動輒後時斷難痛勦撫臣既不能統  
率諸將領各部一軍勢均力敵平日會商意見  
或不相同及至交戰勝不相顧敗不相救乃該  
逆則馬步連環包抄我軍我軍諸將領因無主  
帥號令各率各軍進止之際未免參差不齊且

諸軍旣不相統屬兵心便不能合一卽臣所部  
千軍遇賊數萬分股來撲回環輪戰衆寡懸殊  
當此之時若各營馬步諸軍併力上前未有不  
大獲勝捷者無如臣僅以騎兵鏖戰雖經獲勝  
殺賊亦多而計點軍馬亦復難免損傷是以每  
逢大戰臣總以未得痛殲醜類爲憾我軍馬步  
旣不能合擊賊或盤踞則諸軍環列營柵與賊

相持賊或奔竄則諸軍拔隊前進跟蹤尾追乃  
賊情狡獪詭計多端邊馬四出飄忽靡常伺我  
兵力不到之處擄獲鄉農少壯者脅令從賊老  
弱者縛至寨前偪其家人勒令獻馬贖命因此  
賊中健馬日見其多賊勢益張現在河南軍務  
若不亟思整頓任令賊勢蔓延日復一日伊于  
胡底統計河南全省大河以南蹂躪殆徧惟河



北三府尙爲完善之區賊在河南滋擾已久將  
來無可擄掠勢必窺伺河北其患曷可勝言伏  
願

皇上簡放一員督辦河南軍務督辦得人則馬步自  
能會合以收夾擊之效賊衆雖多勦辦得手不  
難迅奏膚公

同日掌浙江道監察御史朱學篤奏言竊惟用

集古詩卷之三十一  
三  
兵之道貴乎神速速則能解民命於倒懸省餉  
需之糜費今督師曾國藩自去夏奉

命勦辦捻逆遠近引領以爲必可一鼓成擒及駐師  
徐州數月未接一仗方謂賊情未悉布置未周  
懼而好謀不敢妄動可爲老成持重矣今春移  
節濟甯捻逆繼至而亦未聞迎擊猶謂地勢平  
衍無險可扼相度未審難決必勝不如俟有可

乘之隙薄之於險庶可一戰奏功也逮賊勢麕  
至竄入黃河水套者十有其七是真賊就死地  
矣假使分兵以截未入水套之賊使不得連爲  
一氣而以重兵扼水套要口出則殺之不出則  
困之浹辰之間決賊必斃乃亦計不出此使賊  
紛紛竄出滋擾彌甚相應請

旨飭下曾國藩擇要進兵相機速勦勿得仍前遲延

並

飭鮑超一軍趕緊前進與曾國藩會合剿辦不得逗  
留均奏入

上命軍機大臣傳諭曾國藩李鶴年曰據御史朱學  
篤奏用兵貴在神速不可爲一隅牽掣請飭曾國  
藩擇要進兵相機速剿捻匪滋擾日久蔓延愈廣  
迄未大受懲創若不力籌進剿軍務將何日蕝事

曾國藩自宿遷南由湖入淮溯流赴周家口道途  
不免迂折著卽趕緊趨程星速馳往陳郡親臨各  
營就近調度以期呼應較靈並著督飭湘淮各營  
視賊所向盡力窮擊不得專恃防守任賊縱橫又  
據副都統安任奏稱豫省軍營積弊在馬步諸將  
領彼此不相救應進止參差兵心不能合一尤慮  
賊匪偷渡黃河滋擾河北三府所奏不爲無見著

李鶴年督飭前敵將士申嚴號令務須於進戰時彼此互相援應以期聲勢聯絡黃河防務尤關緊要所有水陸防軍李鶴年務嚴密布置並著飭令在事文武將各處渡口實力稽查毋任奸細潛行偷渡

二十六日  
壬午  
官文曾國荃奏言查捻逆大股竄

至南陽唐縣新野鄧州一帶焚掠村寨勢甚蔓

延偏近隨棗襄樊光穀均在咫尺之間臣等檄  
飭水陸防軍嚴爲戒備查鄖陽山路崎嶇無須  
用衆唐縣鎮一路責成郭松林一軍隨州一路  
責成劉維楨一軍棗陽一路責成唐協和一軍  
老河口呂官橋兩處責成藍斯明七營固守扼  
其上竄鄖陽之路樊城襄陽則有提臣江長貴  
防守可以無虞如應山東北無賊窺伺則熊登

武彭毓橘譚仁芳姜玉順等營尙可酌量調遣  
策應西路力遏寇氛 臣官文仍在省城總握全  
局督率司道籌辦軍餉以供支放 臣國荃患病  
將愈卽擇七月二十六日出省督師率新到之  
營馳赴德安相機調度如賊勢偏重西路卽當  
移紮襄陽總期密邇前敵迅速指麾較爲有濟  
又查浙江提 臣鮑超一軍因製造戰車不免久



稽時日尚非有意遲延然此時若從信陽一路  
進兵不但尾追弗及且恐逐賊入陝更成不了  
之局應由隨棗繞出光穀乃可遮截賊蹤臣等  
業已咨會鮑超囑其改道前進不至貽誤事機  
官文又奏言據探捻逆大股已由裕州竄至南  
陽縣屬之瓦店邊馬擾及新野北之沙堰寨唐  
縣之郭灘寨等處其西南一股亦由岡頭渡白

河擾及鄧州之三莊歪子寨攻破民寨多處勢  
甚猖獗 臣查新野鄧州均與湖北之襄棗光化  
毗連而襄棗老河口等處鎮市久爲該逆所垂  
涎現在駸駸進逼其爲蓄志犯楚無疑是鄂省  
軍務又形喫緊 臣業已會同撫 臣飛飭各路防  
軍嚴密戒備實力探防並將駐防宜城等處礮  
船移赴襄樊另調總兵萬化林水師全軍接防

宜城沙洋分段梭巡以昭周密其隨州一帶又  
添派總兵劉維楨親率七營馳往扼紮聯絡各  
軍覘賊所向相機迎剿惟是楚豫交界上下千  
數百里路路可通逆蹤之飄忽無常我軍之兵  
力有限安能處處設防必須隨時審度情形妥  
爲調度撫臣曾國荃久於軍事素著聲威現赴  
德安督剿合無仰懇

天恩俯念湖北軍務喫緊卽派該撫臣曾國荃幫辦  
軍務俾得與臣和衷共濟益臻妥善以期迅奏

膚公奏入

上命軍機大臣傳諭官文曾國藩曾國荃李鶴年曰  
捻逆大股分道竄至新野鄧州湖北之隨棗光穀  
均形喫重官文等現在責成郭松林等分路扼守  
布置尙爲周密曾國荃定期前赴德安調度該撫

久在行閒自能相機策應卽著督率各軍奮力擊  
勦如應山東北無賊窺伺卽調熊登武等軍策應  
西路毋令蔓延襄陽爲南北要衝關繫甚重現雖  
漢水盛漲但不可不嚴爲防守曾國荃擬察看賊  
勢如偏重西路卽移紮襄陽並著該撫隨時酌量  
進止鮑超雖因製造戰車未免耽延著官文等傳  
令該提督卽由隨棗繞出光穀迎頭截擊毋許再

有延緩曾國藩前奏飭劉秉璋等軍勦辦沙河西  
南之賊逆蹤現偪鄂境自當會合夾擊並著官文  
曾國藩曾國荃隨時知會聯爲一氣認真攻勦以  
期迅殲醜類毋任該將領等觀望不前其任賴東  
竄之逆卽著曾國藩飭潘鼎新等實力勦辦毋令  
紛竄李鶴年身任豫撫責無旁貸著卽嚴飭各軍  
跟蹤追勦庶得及早殄滅以副委任

上諭內閣曰湖北巡撫一等威毅伯曾國荃著幫辦  
湖北軍務

官文又奏言查提督鮑超係於六月十二日自  
黃州拔隊起程由商城確探迎勦現聞該提督  
因捻逆均由舞陽泌陽一帶西竄擬卽改道黃  
安由羅山驛徑往汝甯府適中之地駐紮探明  
賊蹤相機勦辦兼顧光固業已催令趕緊前進

勿再遷延奏入報

問

二十八日甲李鶴年奏言張牛兩逆因疊被官

軍勦敗不敢停留由舞陽向西南竄逸提督馬

德昭總兵宋慶等軍拔隊疾追六月二十九日

及於葉縣之七里岡我軍衝入賊莊該逆猝不

及防擊斃甚衆餘股悉向西南竄去我軍追殺



二十餘里始行收隊次日拔隊再追至裕州西南十里鋪地方該逆見官兵馬隊甚單乃敢糾股抗拒我軍一面列陣以待一面催調步隊副將王步雲等均各整隊而至左右並進該逆抵敵不住紛紛潰竄我軍追殺十餘里該逆因官兵緊躡不敢西趨遂沿白河東岸張逆在前牛逆在後意在乘機偷渡阻水以避官兵適馬德

昭一軍因任賴匪蹤蔓擾於雒杞等境經臣飛  
調回顧北面祇餘宋慶一軍與賊追逐七月初  
三日追及南陽之瓦店揮軍掩殺斃賊甚多究  
因官兵力單顧此失彼該逆遂於是夜偷渡白  
河宋慶正擬渡河緊躡忽逢大雨傾盆河水陡  
漲及至搭造浮橋將馬步渡過白河而該逆已  
將新野之老龍寨襲踞迨我軍追至倉卒逃遁

追至鄧州該逆正在圍城官兵將賊擊退擒斬  
不少賊向西南竄去宋慶仍趕緊追截其任賴  
一股經臬司潘鼎新總兵余承恩等屢次勦辦  
遂由蘭儀陳留一帶向西南逃竄七月初一日  
後由中牟新鄭擾及禹州密縣邊馬時至城關  
該牧令等督率練丁開礮擊退大股由長葛南  
趨屯踞許州之禹城適提督馬德昭已於初五

日回抵襄城探明賊在襄城正北之潁橋正東  
之方窰茨精臨潁之三星店遂於初七日由襄  
拔隊繞前截擊沿途頗有斬擒行抵禹州之黃  
岡寨該匪正在圍攻我軍奮勇直前斬殺二三  
百名生擒賊目多名初八九等日復連敗於襄  
禹所屬之從水橋小黃莊等處提督同盛傳一  
軍追至許州十二日整隊進剿將紛竄該州之

賊殺斃甚夥該匪遁至襄城以南訊據獲賊供稱有與前股合併之說臣惟有督飭馬德昭宋慶等軍各就現有兵力趕緊進剿毋稍鬆勁

李鶴年又奏言再查朱仙鎮以北四十里至省城又北三十里至黃河南岸地勢平衍無河可扼且係當日黃河漫口大溜衝刷之處半係飛沙旋空旋圯挑築實形棘手而防務所關不敢

因難而止現將朱仙鎮以北之四十里劃分段  
落飭總兵朱承恩所部三營及臣新募兩營並  
撫標兵丁一營共計三千人通力合作先行試  
辦能否挑築如式尙未可知查曾國藩原議令  
臣調回前敵各軍以全豫兵力辦此防務原謂  
汛地綿長人少則蔽功不易賊至則分布難周  
設身處地原期相與有成並肯爲臣任頓兵不

進之議益見老臣謀國之心無微不至惟豫省  
兵力本單馬德昭宋慶兩軍合計僅逾萬人勦  
辦一股尙慮衆寡不敵迨張牛分而支絀已見  
至任賴覆而抽撥俱窮非不知暴師南汝之處  
止尾追而不能攔截然兵隨賊至少破一處堡  
寨卽多全無數生靈若概予撤回致賊衆全無  
顧忌水深火熱呼籲不聞民望絕而民怨愈深

皇朝文獻通考卷三百三十一  
三十一  
民怨深而賊氛愈熾縱使曾國藩肯爲分謗並  
仰蒙我

皇上如天之恩臣職忝封圻其何辭以自解是以朱  
仙鎮北七十里之防祇能就現在後路兵勇暫  
行試辦而不能以全力從事於此也又河陝一  
路門戶洞開果令河防就緒遊擊之師處處得  
手賊必避兵而行儻或西竄豫軍實無可撥業



經函商曾國藩派隊扼守以防奔軼而固藩籬  
奏入

上命軍機大臣傳諭官文曾國藩曾國荃李鶴年曰  
張牛兩逆經馬德昭宋慶等軍乘勝疾追頗有斬  
獲該撫因北面喫緊調回馬德昭一軍現祇宋慶  
一軍追截兵力殊形單薄該匪現由鄧州往西南  
奔竄著官文曾國荃督飭各將領分路扼守一面

派兵出境與豫軍合力兜剿盡殲醜類免致入境  
滋擾曾國荃已紮德安務當審機度勢妥籌調度  
任賴一股由許禹竄至襄城陝汝一路門戶洞開  
毫無準備馬德昭一軍勢難兼顧著曾國藩迅飭  
周盛傳潘鼎新等督飭諸軍實力進剿毋任該匪  
西竄致勦辦又形棘手李鶴年所稱朱仙鎮至黃  
河南岸地係飛沙旋空旋圯現以六營兵勇先行

試辦不能以全力從事自係實在情形著卽照所  
陳辦理如兵力不敷或添募勇丁藉資防剿前敵  
之兵未可再行抽調



欽定勦平捻匪方略卷二百五十九 丙寅年

中央民族學院圖書館

八月初四日 庚寅 山西巡撫趙長齡奏言

弋於汴汝之間倏東倏西未有定向聞該省東

北兩路均有大兵且有鮑超所部由光州一帶

進勦惟西南兩路似尙空虛南路宛郡接壤襄

樊楚師亦必迎頭截擊特恐該逆乘虛西竄閩

鄉靈寶毗連晉邊雖有黃河之隔究屬一葦可

航必須豫爲之備 臣現飭副將闡文忠一軍扼  
紮河干仍恐兵力尙單因函商河南撫 臣李鶴  
年於西路分兵兼顧該逆現有竄向西南之勢  
應請

旨飭下李鶴年速派勁旅駐扼西來之路毋任該逆  
蔓延及河干一面由 臣與臬司陳湜熟商自茅津  
渡至潞澤一帶節節設防卽令該臬司出省由

河東一帶前往督辦以資得力

同日大學士倭仁奏言捻匪屯聚朱仙鎮地方  
杞縣鄭州皆有賊蹤出沒河北造船演礮防賊  
偷渡最爲緊要聞該州縣陽奉陰違僅雇民船  
數隻有人查驗則以此充數無則仍舊撤去請  
旨飭下河南巡撫李鶴年派委妥員實力巡察如有  
奉行不力之員嚴行叅辦以儆玩泄而免疏虞

均奏入

上命軍機大臣傳諭李鶴年曰捻逆分股竄向襄城  
鄧州等處豫省全軍俱在東南追剿恐該逆乘虛  
西竄山西爲完善之區尤爲該逆所垂涎防堵宜  
倍加嚴密趙長齡現飭副將閻文忠一軍扼紮河  
干恐尙未能堵截著李鶴年探賊所向如該逆有  
西竄之勢卽飭各軍繞前攔截毋令闖入晉境臬



司陳湜現赴河東一帶籌辦防堵並著該撫知照  
趙長齡飭該臬司嚴密布置毋稍疏懈擒匪屯聚  
朱仙鎮杞縣鄭州俱有賊匪出沒河北防務緊要  
若如倭仁所奏該州縣僅雇民船數隻有人查驗  
則以此充數無則仍舊撤去實屬廢弛已極著李  
鶴年派委妥員實力巡察如有仍前玩泄者卽著  
嚴行叅辦

初五日辛卯曾國藩奏旨任賴等逆東竄臬司潘

鼎新一軍行至西華縣爲大水所阻該司銳志  
勦賊令各營梟水而進六月二十二日行抵太  
康探知太康之雀橋杞縣之五岔口通許之底  
關等處逆氛連成一片二十五日徑趨雀橋該  
逆大股先退邊馬不絕二十六日分兩營留紮  
雀橋以馬步十二營裹糧疾進敗賊於石頭岡

追至油坊岡之大林伏賊出戰我軍連營齊進  
斬擒悍賊數十名追至林後大寨我軍一擁而  
上該逆翻牆北竄追殺四五百名立將大寨奪  
回留二營守之餘悉向前追勦甫行三里任逆  
率悍黨驟馬衝至萬國順帶馬隊鏖戰擊殺賊  
目多名附近寨賊大至潘鼎新督各營擊敗之  
追至武岡沙窩一帶各路寨賊俱遁二十七日

乘勝進剿高陽集任賴兩股不敢停趾直竄過  
賈魯河以西潘鼎新因行糧已罄兵力極疲暫  
停休息該軍將士於盛暑深淖中忍飢追逐一  
日三捷實屬異常出力應由臣暫行存記俟續  
有戰功彙案請獎臣查前此防河之策甫定而  
該逆回竄杞睦臣深慮其再竄山東則賊分兩  
路勦辦更形棘手幸潘鼎新一軍迎頭截擊驅

之西去仍應防守賈魯河沙河以扼回竄之路  
已檄劉銘傳潘鼎新張樹珊三軍仍如前議又  
添周盛波一軍分段畫守並咨河南撫臣李鶴  
年迅撥豫軍分防朱仙鎮及黃河南岸一帶據  
報任賴張牛四逆均竄至裕州葉縣以西去襄  
陽漸近勢將兩股合併現劉銘傳等業已興工  
修浚紳民亦肯效力防河之議或可辦成自古

辦流寇本無善策惟有束之使不得逞猶是得寸則寸之道現在除防兵外尙有鮑超劉秉璋楊鼎勳劉松山張詩日等五支游兵俟防河辦成則令防河者與遊擊者彼防此戰更番互換庶足保常新之氣奏入

上諭曰潘鼎新軍出力員弁准其存記俟續有戰功彙案請獎現在捻蹤西趨防河之議可成卽著該

大臣督飭地方官紳實力修浚以杜紛竄並著飭  
鮑超等軍往來遊擊迅殲醜類以慰廑念

曾國藩又奏言臣行抵雙溝卽聞劉松山張詩  
日兩軍自六月十七至二十三日在西華上蔡  
等處四獲大勝殺賊近萬據各路探報及豫撫  
來咨大略相同其詳細情形俟該鎮呈報到日  
再行具奏臣在臨淮感受暑溼留住數日七月

二十八日登舟西上擬由懷遠入渦河至蒙亳  
察看形勢徑赴周家口奏入報

聞

初六日

壬辰

李鶴年奏言張牛兩逆竄擾西平舞

陽等處在沙河南北分股行走爲牽掣官軍之  
計總兵宋慶截勦張總愚一股大小十餘戰敗  
諸新野鄧州等處張逆情急與牛逆合股併力



抗拒七月初十日宋慶復督同副將李寶林等帶兵奮勇追勦將賊踞村莊奪回數處殪賊百餘名正在得手之際忽見後路賊旗渡過刁河布滿我軍之北宋慶遂同副將蔣東才分投督戰該逆紛紛倒斃我軍久戰子藥俱罄都司鄧開成力竭陣亡而騎賊下馬相持誓以死決宋慶將隊伍撤至刁河橋口扼堵倉卒甫成一營

該逆已樹柵空溝四面圍裏是夜宋慶派守備  
鄧林楓等突圍而出一面督飭蔣東才等與賊  
梭戰前後三晝夜糧盡兵疲適鄧林楓等到鄧  
州城西軍營激勵軍士由北面突圍而入宋慶  
親督遊擊屈聖祥等自內而出兩面夾擊始將  
長圍平毀奪回村莊十餘處生擒長髮老賊百  
餘名陣斃數百名敗匪悉遁乃河南岸查此次

逆匪圍攻幸宋慶遇變不驚以寡勝衆而轉危  
爲安實賴鄧林楓之力合無仰懇

天恩將守備鄧林楓免補都司以遊擊留於河南儘  
先補用陣亡都司鄧開成應請

飭部從優議卹至任賴逆股近復回竄沙河北岸擾  
及臨潁鄆城一帶現飭前敵各軍相機截剿奏

八

上諭內閣曰逆匪張總愚一股經總兵宋慶督軍剿  
敗與牛洛紅合股併拒圍裏官軍宋慶派守備鄧  
林楓等突圍而出兩面夾攻將賊圍平毀奪回村  
莊十餘處生擒長髮老賊百餘名陣斃數百名敗  
匪悉竄刁河南岸勦辦極爲得手其尤爲出力之  
守備鄧林楓著免補都司以遊擊留於河南儘先  
補用陣亡都司鄧開成著交部從優議卹以慰忠

魂

李鶴年又奏言候補總兵張曜久在行閒於豫  
省地勢民情瞭如指掌運籌戰守事宜洞中窳  
要前蒙

賞假回籍現在假期已滿豫省軍務萬緊將領需材  
合無仰懇

天恩飭下浙江巡撫催令趕緊來豫俾臣得收指臂

之助奏入

上諭內閣曰候補總兵張曜前經告假回籍現在假期已滿著馬新貽飭該總兵迅赴河南軍營帶隊剿賊以副委任

初九日乙未劉毓楠奏言豫省自本年六月賊陷

杞縣高陽寨後省城戒嚴二十九日大股自東來麴聚南門外城內並無兵勇盡驅民夫守城

五門緊閉糧價頓昂窮黎尤苦城外居民任賊  
殺掠逃難男婦號泣之聲不絕七月初二日賊  
勢稍卻始將難民放入城中臣思豫省居天下  
之中省城重地理宜講求戰守防範加嚴民丁  
止可以助聲勢設有緩急萬不足恃應令該撫  
遴委道府大員按門設局督同公正紳董經理  
一切濬城濠製軍械編保甲查奸細籌款積糧

捐資募勇關外調集大兵分扼要隘庶賊匪不  
敢窺伺至難民填街溢巷非妥爲撫恤亦恐日  
久生變可否請

旨飭下河南巡撫李鶴年審度情形妥籌辦理以資  
捍衛而奠民生奏入

上命軍機大臣傳諭李鶴年曰據給事中劉毓楠奏  
本年六月間杞縣高陽寨陷後省城戒嚴城內並



無兵勇盡驅民夫守城糧價頓昂窮黎尤苦城外  
居民任賊殺掠逃難男婦號哭不絕請飭李鶴年  
籌辦省防等語開封省城最關緊要現當賊蹤飄  
忽自應先事防範俾緩急可恃劉毓楠所奏是否  
實情其所稱濬城濠等事現在是否辦理著李鶴  
年按照該給事中所奏察看情形斟酌辦理以期  
有備無患

十四日庚子官文會國荃奏言臣曾國荃於七月

二十六日起程出省臣官文派綠營步隊馬隊  
各百名爲護衛親軍三十日抵德安府城駐紮  
探報捻逆窺伺襄棗光化邊境因鄂省防軍嚴  
陣以待不敢深入而任賴等股盤踞葉縣舞陽  
境內擾及西平張牛等股竄至鄧州及新野西  
鄉一帶向浙川內鄉之意現在官軍形勢東

南北三面兵力皆已厚集惟西北究嫌空虛儻  
賊從浙川內鄉上犯西南則爲鄖陽正西則達  
荆子關西北則可至潼關皆入陝之通衢若徒  
以追軍馳逐萬一鋌走入秦則淮齊楚豫各軍  
皆不能就近用其所長各省轉餉尤非易事計  
惟有屏蔽入秦之路蹙賊使向東南較易勦辦  
現浙江提臣鮑超率霆軍行抵棗陽已會咨該

提督隨時覘賊所在或徑達浙川或繞過內鄉  
總須注意西路空虛之處攔頭截擊如賊折而  
東趨卽檄福建提臣郭松林候補藩司彭毓橘  
合軍從桐柏唐縣橫截而出迎頭勦擊並派候  
補總兵劉維楨候補道唐協和向新野一路進  
發遙爲霆軍聲援鮑超郭松林等饒有智勇必  
能與劉松山張詩日會合夾擊以收聚殲之效

第恐賊蹤剽疾若先霆軍而西則全賴豫省秦  
省扼關嚴守方免入秦之患已咨會李鶴年劉  
蓉查照辦理奏入

上命軍機大臣傳諭官文曾國藩曾國荃李鶴年劉  
蓉曰張牛等股竄至鄧州一帶有向浙川內鄉之  
意而荆子關潼關等處爲入陝通衢賊若被擊西  
竄殊慮空虛官文曾國荃已令鮑超隨時覘賊所

在或徑達浙川或繞過內鄉攔頭遮擊如折而東  
趨卽令郭松林等從桐柏唐縣橫截而出並令劉  
維楨等向新野一路進發遙爲霆軍聲援調度甚  
合機宜曾國荃業已馳赴德安鮑超一軍亦已馳  
抵棗陽卽著就近傳諭該提督規賊所向迎頭勦  
擊毋令賊騎入陝荆子關等處有險可扼著劉蓉  
調派兵勇妥爲防範該署撫一日在陝當盡一日

心力不得存五日京兆之見儻任賊入秦定惟劉  
蓉是問宋慶一軍前次剿賊甚爲出力並著李鶴  
年嚴飭宋慶激勵部勇會合霆軍前截後追以收  
聚殲之效省防河防並須認真籌辦勿稍疏懈會  
國藩已由臨淮赴周口何日到營殊深塵系任賴  
等股盤踞葉縣舞陽擾及西平著曾國藩督飭周  
盛傳等軍剿辦仍兼顧陝省門戶該大臣並當與

官文曾國荃隨時函商統籌全局以期廓清餘孽  
速竟全功

十八日甲辰曾國藩奏言臣於途次接據劉松山

等稟報張牛兩逆分股竄擾西平上蔡等屬逆  
氛連成一片六月十七日劉松山張詩日等由  
歸村至西華進剿張逆大股馬賊齊至步賊亦  
三道並出官軍力戰逾時追殺十餘里直抵上



蔡之雙廟擒斬敵斃約逾千名據獲賊供稱該  
逆欲往西平約牛洛紅救援劉松山等以牛逆  
來援必經歸村恐首尾不能相顧遂於十九日  
將歸村老營移紮永平寨該逆偵知伏賊千餘  
於萬金寨旁意圖截取輜重總兵李祥和等合  
軍夾擊斬獲多名旁竄各村莊者亦搜勦殆盡  
二十日劉松山張詩日等分路進攻雙廟老巢

賊以大股迎敵各營槍礮齊發斃賊無算有賊  
馬千餘包抄我軍後路復經擊退各營乘勝猛  
進逆尸枕藉追抵洪河落水淹斃者數里不絕  
綜計擒斬轟斃者約三千名淹斃者過之張逆  
被創折向西趨二十三日我軍追及於圍城之  
召陵敗之直追至四合莊沿途擒斬數逾二千  
臣查張逆縱橫於齊豫皖鄂之間從未大受創

懲今經湘軍節次奮擊精銳損傷三分之一兇  
燄頓衰實足快人心而伸天討各營將士於盛  
暑泥淖中徒涉遄征忍飢苦戰可否容臣查明  
出力員弁彙案奏獎以昭激勸出自

逾格恩施

曾國藩又奏言任賴一股久居舞陽葉縣之交  
八月初間邊馬常至襄城鄆城勢將回竄東北

劉秉璋楊鼎勳於初四日由周家口前赴鄆城  
堵剿張牛一股經劉松山張詩日暨豫省宋慶  
三軍跟蹤追剿七月二十一二十二等日又在  
新野鄧州續獲勝仗追至南召魯山該逆折竄  
寶豐葉縣等處邊馬至長葛洧川一帶有回竄  
東北再窺山東之意 臣檄劉銘傳潘鼎新兩軍  
由中牟尉氏一路迎剿旣與長葛洧川相距甚

近且可與劉秉璋楊鼎勳之師聯絡聲勢又令  
劉松山張詩日兩軍跟蹤回剿鮑超由汝甯北  
出迎擊總期力扼東竄以收兜剿之效至防河  
之策自朱仙鎮以下業由劉銘傳等興築隄牆  
工程約及八分現在一經調撥尙未能分汛堅  
守如果各軍遏賊西趨仍當一面追剿一面防  
河以符初議

曾國藩又奏言 臣在臨淮時感受暑溼醫治未  
痊力疾西上八月初九日抵周家口沿途調理  
外感漸愈惟用心輒汗須靜懾以冀速痊合無  
仰懇

天恩賞假一月在營調理奏入

上命軍機大臣傳諭曾國藩曰張牛等逆經劉松山  
等軍急追折竄寶豐葉縣等處有回竄東北再窺

山東之意東省曹單等處應如何抽撥勁旅扼賊竄路之處著曾國藩妥爲布置前據官文曾國荃奏張牛等股竄至鄧州恐被擊西竄當令鮑超率軍由西路繞截該大臣現今鮑超由汝甯北出迎勦力扼東竄此時東路各軍兵力尙敷勦辦而西路甚屬空虛若不嚴爲之備萬一西竄入秦又成不了之局鮑超一軍自應遵照前旨由內鄉一帶

纂要卷之四十三  
三十一  
一八

攔截倂賊東趨以收聚殲之效著曾國藩與官文  
曾國荃悉心籌畫相機調撥該大臣患病未痊殊  
深塵系著賞假一箇月在營安心調理各路緊要  
軍情仍著隨時調度不可稍有疏懈

上諭內閣曰湘軍在西華上蔡等處勦賊七日之內  
連獲大勝賊之精銳損傷三分之一實足快人心  
而伸天討著曾國藩督飭各軍乘勝追勦盡殲醜



類無留餘孽各營出力員弁著由曾國藩彙案奏  
獎以昭激勸

十九日乙巳李鶴年奏言張牛兩逆經豫軍擊敗

後向新野地方奔竄劉松山張詩日兩軍由南  
陽追至與宋慶一軍會合躡勦沿途奪回賊踞  
村莊四五十處斃賊數百名解散脅從以數千  
計七月二十二日追至新野縣西南之上仙岡

復大敗之斃悍賊二千餘名生擒頭目及長髮  
老賊三四百名該逆由鄧州之西磨山羊山等  
處北竄宋慶以賊蹤偏近南陽恐其擾及郡城  
遂於二十六日進紮郡城西北該逆由南召竄  
魯山一帶湘豫各軍跟蹤追躡因山路崎嶇驟  
難繞過賊前適臣先期咨調提督馬德昭一軍  
駐汝州八月初三日該逆自魯山縣竄至汝州

所屬之仙狐三山等寨馬德昭出隊截擊斃賊  
多名該逆敗向乾溝寨我軍乘勢追殺奪回賊  
砦村莊十餘處生擒賊目三十九名斃賊無算  
賊衆敗匿於州北焦村張村等處次日馬德昭  
督隊進剿該逆向郝縣禹州竄遁現在兵勢旣  
合臣惟有激勵豫軍與湘軍協力剿洗以期早  
靖妖氛至此次陣亡之擬保千總沈金把總鄧

士炳奮勇捐軀殊堪憫惻合無仰懇

天恩飭部從優議卹以慰忠魂

李鶴年又奏言自捻逆倡亂以來征討頻年掃

除未盡

皇上屢降恩言脅從罔治 臣承宣

德意每於軍前刊布告示諭令賊中裹脅自拔來歸  
頃准馬德昭咨據參將李承先稟稱有山東人

桂錫楨向在親王僧格林沁軍營帶勇勦賊曹  
州敗潰時被其部下魏羣勾結任柱將桂錫楨  
脅至賊中嚴密看守比因家有老母又無次丁  
一念之愚未能引決以後屢思立功自贖罕遇  
汲引之人此時密通官兵情願面縛營門甘就  
誅戮等語查桂錫楨陷賊偷生罪在不赦惟念  
解散之法散其黨與不若散其頭人且揆厥反

正之情出於臆誠迫切合無仰懇

天恩准令招撫以觀後效儻乏微勞足錄甚至野性  
難馴仍以軍法從事斷不稍存姑息

李鶴年又奏言任賴等逆竄擾襄城一帶八月  
初一日委叅領全福千總余振清帶兵迎勦於  
李莊地方正鏖戰閒賊首魏羣糾領馬賊拌命  
衝撲兇猛異常各將士奮勇向前全福槍擊魏

羣落馬余振清等上前擒獲餘逆潰散南遁臣  
查魏羣係宿州著名賊首前與擒匪張落刑等  
在各處滋擾旋投入親王僧格林沁軍營迨僧  
格林沁陣歿復入賊中擄掠焚殺實屬罪大惡  
極此次就擒足快人心除派員審明盡法懲治  
外所有陣擒該犯尤爲出力各員分別懇

恩獎敘其餘出力弁勇容臣查明彙案請獎奏入

上命軍機大臣傳諭曾國藩李鶴年曰張牛兩逆由南召魯山竄入汝州經馬德昭擊敗遂向郟縣禹州遁去該逆屢經敗挫其膽已寒正可乘此機會痛加剿洗著曾國藩李鶴年分飭湘豫兩軍協力進剿迅將此股逆匪盡數殲除毋任再行奔竄陣亡之擬保千總沈金把總鄧士炳均著交部從優議卹桂錫楨一犯前因僧格林沁曹南之敗竟甘



心從逆本難稍從寬貸惟現當解散賊黨之時若不暫准投誠恐賊中疑懼其黨愈固桂錫楨著准由李鶴年招撫暫事羈縻如不能奮勉立功或仍心懷叵測卽將該犯立行正法毋稍姑息

上諭內閣曰賊首魏羣前隨捻匪張落刑等在各處滋擾罪大惡極此次任賴等逆竄擾襄禹一帶經官軍迎剿該逆魏羣糾領馬賊衝撲兇猛異常各

將士鼓勇爭先登時擒獲卽著李鶴年於訊明後  
盡法懲治以快人心所有尤爲出力之全福著以  
驍騎校卽補並賞戴花翎千總余振清著免補守  
備以都司儘先補用其餘出力員弁由李鶴年查  
明彙案保奏毋許冒濫

二十一日 丁未 浙江道監察御史盧士杰奏言擒

匪竄擾楚皖東豫自上年曹州官軍失利逆燄

益張我

皇上特簡曾國藩爲

欽差大臣資以滅賊該大臣老成重望萬不至畏葸  
遷延而曠日持久未能削平者蓋南北異勢堵  
剿異用機宜有未協也南方水道紛歧稻田交  
錯賊匪往來有一定之路堵其前則賊不能越  
斷其後則賊無所歸故利在以扼爲剿北方平

原曠野千里無阻賊合力以趨我分兵而守萬不能制其死命惟有跟蹤追擊不令喘息殺一賊則少一賊平一股則少一股故利在以勦爲扼此南北異勢不能強同也曾國藩自移營以來首定四路屯兵之策令山東守運河河南守沙河以遏賊勢是仍以南方制勝之法施之北路臣未見其可也自上年以來歸德曾屯兵矣

而賊之由宋竄曹州者兵不能扼也周日亦屯  
兵矣而賊之由陳竄開封者兵不能扼也卽本  
年西華上蔡屢獲小勝而賊之由汝竄南陽者  
兵亦不能扼也運河能守與否臣不深知至沙  
河淺處蹇裳可涉其不足制賊也明矣伏見曾  
國藩奏報勝仗皆在六七月之間自七月以後  
賊衆麕聚南陽而周口各營安然不動鮑超之

兵遲延不來楚省各軍亦不爲迎頭剿賊之計  
惟宋慶馬德昭余承恩各帶數千人追逐數萬  
敢死之寇賊衆兵單賊騎我步設有挫衄後悔  
何及夫賊匪非多也合則見其多我兵非少也  
分則見其少今計會國藩所帶各營合之鮑超  
一軍不下四五萬人楚豫皖三省現有兵勇亦  
不下五六萬人若齊心同力勦此餘孽如摧枯

拉朽耳乃不爲合剿之計而惟籌分扼之策臣  
所謂未協機宜者此也伏祈

飭諭曾國藩迅督各省兵勇剋期合剿以伸

天討而快人心奏入

上命軍機大臣傳諭官文曾國藩曾國荃李鶴年曰  
御史盧士杰奏南方水道紛歧稻田交錯利在以  
扼爲剿北方平原曠野千里無阻利在跟蹤追擊

以勦爲扼宜合楚豫皖三省兵勇爲合勦之計不  
宜但籌分扼等語所奏不爲無見著官文曾國荃  
李鶴年酌度現在軍情會籌妥辦曾國藩總統師  
干尤應統籌全局督率湘淮各軍視賊所向前截  
後追不可僅以扼守沙河爲劃疆自守之計鮑超  
一軍並著曾國藩飭令迅速由鄂入豫相機兜勦  
毋任延緩



二十四日庚戌李鶴年奏言臣前准兩江督臣曾

國藩咨以豫省平曠須擇地設防自朱仙鎮北  
至汴梁又北至黃河南岸用全豫兵力窆濠扼  
守當經臣以該處地係飛沙挑築棘手並前敵  
各軍不能悉數調同等情奏蒙

聖鑒又因餉需支絀止就現有兵力添募兩營劃段  
興修無如省南至朱仙鎮四十里中蘆花岡仙

人莊兩處均係積年沙壓勉施版築性不堅凝  
其濠上則積沙二三尺以下處處見水水旋涸  
而旋生沙旋挑而旋卸故此二處濠牆經臣日  
夜嚴催迄無成效而四十里內防兵祇有四千  
每里百人不敷分布本月初十日以後任賴張  
牛四逆自中牟尉氏一帶合股東趨擾及近省  
之李口等處沿路搜搶鋤等物意在平毀濠

牆守濠員弁屢求添隊是時省城祇有兵勇千  
名無論不能舍城而守濠卽全撥守濠亦屬車  
薪杯水省外之兵可以調回者祇有馬德昭一  
軍除已調保英四營挑築省北濠牆外其餘之  
營尙須西顧河洛北顧河防且已爲賊阻隔不  
能剋期而至十三四五等日該逆邊馬竄近省  
南各營分地均經兵勇擊退十六日賊至省北

黑岡地方偏近河岸守備劉洪泰帶礮船轟擊  
斃賊多名賊乃循岸東奔又經北面守濠兵勇  
槍礮擊退該逆遂併歸南路乘夜以全股分撲  
各段濠牆我軍聯營力戰三時之久該逆潛分  
悍股各持鈎鏃於蘆花岡填濠擁入我軍復分  
兵搶護賊勢稍卻詎大股馬步旋分數處越濠  
而走我軍傷亡旣多黑夜中顧此失彼勢難堵

過臣登城守禦焦灼萬分該逆遂合股由陳留一帶竄向東北除由臣函致曾國藩並飛咨直隸山東安徽江南各省視賊所至派兵攔截一面飛札總兵宋慶會合湘淮各軍趕緊追躡外應請

旨將臣交部議處

同日閩敬銘奏言運河隄牆於八月初旬據各

營稟報竣工正在查看閒旋據探報任賴股匪  
自襄許北竄隨准豫撫咨稱已竄至中牟新鄭  
一帶臣當飭運河各營籌備迎剿八月二十日  
探報賊竄蘭考一帶荷澤曹縣已見賊蹤臣卽  
於河段汎地可省兵力之處抽撥一軍赴曹迎  
剿以固邊防現自長溝至沈口河岸百九十里  
經曾國藩劃歸東軍防守除濱湖隔水之區均

飭聯營布置並令礮船沿河連布爲陸營聲援  
另撥知府王成謙一軍赴鉅野一路迎探攔擊  
以遏賊鋒令遊擊王正起帶振字五營赴鄆鉅  
策應自長溝以南至韓莊臺莊經曾國藩留派  
道員李昭慶所部駐守臣亦一體知照飭令嚴  
防至黃河北岸臣曾調提督傅振邦一軍駐防  
張秋參將韋應麒同知劉時霖等分帶兵勇駐

防壽張及范縣蓮花池一路現均飭令聯布河  
干嚴密巡守濮州一帶雖爲直隸防守地段 臣  
仍派礮船駛往嚴密梭巡惟有激勵諸軍奮勉  
自效一面恪守防河之策以維大局一面分兵  
雕勦以固邊隅均奏入

上命軍機大臣傳諭曾國藩劉長佑吳棠張之萬喬  
松年英翰閻敬銘李鶴年曰任賴張牛四逆合股



東趨竄近汴省河岸經礮船轟退該逆遂併歸南  
路於蘆花岡等處填濠越牆而進由陳留一帶竄  
向東北賊勢劇疾異常開州東明長垣等處河防  
最關緊要著劉長佑飭令在事文武嚴密防範並  
添調精銳兵勇或卽令臬司張樹聲前往大名一  
帶就近調度以資得力不可稍涉大意運河東面  
濠牆閘敬銘當已補修齊備卽著該撫嚴督所部

各軍實力防守並著曾國藩檄飭李昭慶督率所  
部聯絡東省將士互相援應遇賊北竄此時湘淮  
豫各軍均落賊後東省守備空虛尤爲可慮曾國  
藩務當酌度機宜飛催湘淮諸軍星夜折回東北  
緊躡賊蹤盡力兜剿並著李鶴年檄飭宋慶之師  
視賊所向會合追剿毋稍鬆勁賊蹤飄忽靡定皖  
北淮徐等處均宜豫籌布置著喬松年英翰調派

皖軍分布皖北邊境以備迎擊淮徐一帶水陸防  
務及運河防守事宜吳棠當迅籌布置並著張之  
萬速赴漕督新任接辦以專責成吳棠喬松年均  
應實力經畫不得存五日京兆之見致滋貽誤此  
次賊匪竄越汴南濠牆雖由兵力單弱所致究屬  
疏於防範李鶴年著交部議處正在寄諭閒據閩  
敬銘馳奏捻匪竄至蘭考偪近東境現籌布置一

摺繪衆倏忽東竄蒗澤曹縣等邑已見賊蹤閻敬  
銘擬撥出王成謙一軍赴鉅野一路迎探攔擊並  
令王正起另帶振字五營赴鄆鉅策應卽著飭令  
相機勦辦運河牆工已竣有險可扼並著分飭各  
軍嚴防汛地毋任竄越惟東省兵力尙單仍恐不  
敷分勦曾國藩尤當迅飭各軍星馳援勦並著李  
昭慶將長溝以南汛地一體嚴防張秋濮范一帶

黃河防務更宜嚴密並著劉長佑圖敬銘隨時聯絡援應不可稍分畛域致誤事機

二十九日乙卯曾國藩奏言八月十三日疊據各

路稟報張牛任賴等逆屬聚許州禹州一帶決志東竄臣所部遊擊之師如劉秉璋劉松山等軍由西路追賊東回先後趕至許州襄城而賊復迤邐北竄防河之師如劉銘傳潘鼎新等軍

八月初開分防各汛一律工竣十一十二兩日  
趕赴汴梁幫修省北濠隄十四日劉銘傳回至  
尉氏潘鼎新回至樊寨十五日據擒賊供稱該  
逆欲於中夜由汴梁左右東竄劉銘傳等移紮  
朱仙鎮以上一面牽制北路賊勢一面兼顧本  
管汛地十六夜瞭望火光漸熄而北偏近豫軍  
長牆派馬馳探行至離汴省十餘里見隄牆已

毀塌數處詢據余承恩云二更時賊股潮湧撫  
標三營所守隄牆當被衝破賊已竄逸東去等  
語劉銘傳卽派烏爾圖那遜等馬隊向東追剿  
派唐殿魁一軍向北截剿未過之賊烏爾圖那  
遜追至杞縣頗有擒斬唐殿魁行至汴梁城南  
遇牛逆後股當卽攔腰猛擊截回馬步賊千餘  
向南逃去臣查河防陸路七百餘里水路九百

餘里地段太長自張市朱仙鎮直至黃河浮沙  
壅塞卽使竭數月之力認真修防猶未敢謂百  
無一失臣固早已慮及今一處疏失功敗垂成  
半由於人力未周半由於賊勢過重聞信之餘  
實深焦憤現已檄劉銘傳潘鼎新兩軍由虞城  
單縣一路劉秉璋楊鼎勳兩軍由徐州韓莊一  
路均赴山東跟蹤追剿又飭張樹珊一軍由徐



州馳赴曲阜豫衛

孔林其李昭慶一軍本留濟甯韓莊等處防守運河  
計臣所調度之淮勇七軍除周盛波一軍暫留  
周家口外餘均飭赴山東與羣賊縱橫追逐至  
運河防務自夏水盛漲隄牆坍塌七八月閒又  
經加土修築差覺可恃但此次賊衆且悍誓欲  
渡運東竄深秋水落能否堵禦完固殊未敢必

且賊蹤紛竄無定黃河防務同時喫緊應請  
旨飭下直隸督臣山東撫臣堅守黃河令礮船上下  
梭巡屏蔽畿輔務保萬全

曾國藩又奏言此次捻匪全股東竄出於各處  
所不及料查朱仙鎮以上豫省防兵係余承恩  
及撫標三軍在所轄汛地失事本應從嚴叅辦  
惟該處係屬沙地難於挑挖七月下旬始行興

工時日過迫濠牆未能堅深兵不足三千賊勢  
浩大不克抵禦尙屬情有可原臣是以未及查  
取職名會商叅辦初一日臣聞賊將東竄卽檄  
劉銘傳潘鼎新兩軍赴中牟尉氏攔剿若該兩  
軍果至中牟十五十六兩日當可攔頭痛剿乃  
僅進駐朱仙鎮之北相隔稍遠遂失機宜亦有  
不合惟自朱仙鎮以至槐店陸路四百里沿河

迂繞則五百里皆劉銘傳等糾約淮軍晝夜修築八月初旬一律畢工其張市以上六十里亦係沙地潘鼎新力任其難修築堅固該兩軍又曾助豫軍修挖汴北二千餘丈頗著勞勩雖未赴中牟迎勦稍失機宜而所守汛地究無疏失劉銘傳潘鼎新均應免其置議至籌防沙河賈魯河之議經 臣 兩次函商安徽河南撫 臣 趕緊

興辦屢接覆信均稱照議辦理厥後安徽認真  
修防而河南未遽舉行李鶴年旋有沙多難辦  
之奏辦事遲疑不無可議惟該撫亦有大可諒  
者河南各官之議均謂賊衰宜於速剿不必防  
河賊勢急欲西趨不至東竄幾於衆口一辭並  
聞京師人士持議亦多如此李鶴年惑於衆論  
並非有意執拗迨聞淮軍皖軍河防次第畢工

乃續調馬德昭回防汴北而爲時已遲矣其宋  
慶一軍在南陽勦賊得力李鶴年不欲調回修  
防尙係救民水火之至意業經該撫奏明儻李  
鶴年自請議處顛懇

聖恩暫予免議以觀後效臣主持防河之策辦無成  
效分應引咎自責惟目下不叅疏防汛地之員  
亦宜暫緩請處儻東竄之賊蔓延太廣局勢日

壞臣甘受

嚴譴不敢諉咎他人臣非不知防河爲拙計奈馬隊  
遠不如賊專恃步隊追剿斷不能制流寇不得  
已乃出於防河之下策若賊再回竄仍當扼防  
沙賈兩河遏賊不得復東庶軍務漸有歸宿仰  
祈

皇上豫飭河南撫臣爲將來同心設防之計

曾國藩又奏言上年九月欽奉

諭旨派李鴻章帶兵馳赴洛陽彼時洛陽並無賊蹤  
而臣所帶之兵均係李鴻章所部察看賊志實  
在東而不在西李鴻章亦恐一離本任則糧餉  
軍火均無所出彼此據實奏覆事遂中止今則  
賊趨東路而臣駐紮周家口相距較遠且值因  
病請假期內萬難迅速移營徐州濟甯若移紮



東路又恐賊匪折回西竄仍覺調度不靈伏查  
嘉慶道光年閒黃河防汛時兩江總督出駐清  
江或駐徐州本有成例可否籲懇

### 天恩特降

諭旨飭令李鴻章攜帶兩江總督關防駐紮徐州專  
顧本轄之徐海淮泗各府并與山東撫臣商辦  
山東軍務俟東路軍情稍鬆仍回駐金陵或駐

清江竭力籌餉以固軍心而維大局至西路現  
雖稍鬆亦不可不豫爲籌備臣弟曾國荃業已  
出省駐紮德安惟歷年賊勢在豫時多在鄂時  
少捻匪若擾南汝光及汝洛等屬不特鮑超可  
以馳勦卽曾國荃所部諸軍亦可越境會勦可  
否請

旨飭下湖北撫臣曾國荃遇河南緊急時攜帶關防

移紮南陽府與河南撫臣商辦軍務俟豫事稍  
鬆仍回駐德安或回武昌兼籌餉項臣現駐周  
家口正居數省之中如中路有事臣與豫皖兩  
省撫臣商之東路有事李鴻章與山東撫臣商  
之西路有事曾國荃與河南撫臣商之庶可聯  
絡一氣呼吸相通

同日劉長佑奏言豫捻被勦回竄河防又緊且

節逾秋分水勢漸涸當經分檄水陸各軍嚴密  
巡查聯絡聲勢相機防勦派總理營務臬司張  
樹聲酌帶馬步小隊馳往大名一帶就近調度  
並嚴飭水陸將士協同各屬鄉團齊心守禦聯  
絡豫東在防兵勇互爲聲援再 臣 欽奉

諭旨添調精銳兵勇查余承恩於畿南情形最熟所  
部素稱精銳前經調赴豫省現值賊蹤擾逼東

岸可否仰懇

天恩飭將余承恩一軍仍調回直省以資熟手而重  
河防均奏入

上命軍機大臣傳諭官文曾國藩劉長佑李鴻章吳  
棠張之萬閻敬銘李鶴年喬松年英翰曾國荃曰  
張牛任賴四逆合股東竄曾國藩現飭劉銘傳等  
分赴山東追剿著卽嚴檄各軍視賊趨重處所盡

力追剿閩敬銘尤當督軍嚴扼運河毋任賊騎東  
渡黃河爲畿輔屏蔽防務尤關緊要著劉長佑閩  
敬銘嚴督水師礮船梭織巡防並飭陸軍實力堵  
遏張秋濮范一帶尤宜不分畛域互相援應余承  
恩於畿南情形較爲熟悉卽著李鶴年將余承恩  
大軍調回直隸以固河防賊股分合靡常趨向無  
定江皖邊境亦須力籌堵截並著吳棠喬松年英

翰督軍扼守要路以備迎擊曾國藩現駐周家口  
距濟甯徐州較遠難於兼顧著李鴻章迅卽攜帶  
關防出省馳赴徐州駐紮就近調度淮湘各軍防  
務保衛淮徐以東各路並與閩敬銘商辦山東軍  
務互相策應李鴻章未出省以前淮徐防務仍著  
吳棠辦理並著張之萬遵奉前旨迅赴漕督新任  
儻賊折回豫西曾國荃亦當督率鄂軍越境馳赴

南陽會同豫師合勦並隨時與李鶴年商辦軍務  
聯絡聲勢總期合數省之力迅掃狂氛不可稍分  
彼此曾國藩總領師干尤宜統籌全局毋得專諉  
地方督撫致軍事散漫無紀鮑超一軍並著官文  
曾國荃飭令趕緊赴豫由曾國藩相機調遣毋再  
遷延干咎李鶴年疏防濠牆前已降旨交部議處  
劉銘傳潘鼎新到防雖遲據奏分守濠牆尙無貽



誤著從寬免議汴省應修濠牆仍著李鶴年實力  
興辦防賊回竄毋稍弛懈至勦辦機宜固須博采  
衆議而軍情變幻無常更當隨時酌度內斷於心  
朝廷總以辦理有無成效爲憑該大臣督撫等惟  
當同心竭力掃除餘孽速竟全功毋得各懷疑忌  
致負委任

曾國藩又奏言 臣前曾練馬隊數營派馬德順

一營歸左宗棠統轉赴浙厥後馬德順屢著戰  
功授處州鎮總兵其原帶哨官副將楊世俊等  
均稱得力本年因浙省肅清已久無須留防經  
臣咨調楊世俊等帶馬隊赴豫勦捻旋據馬德  
順稟稱生長中州熟悉地勢賊情懇檄調助勦  
等語臣查該總兵於北方人地相宜可期得力  
應請

旨飭下浙江撫臣馬新貽迅飭馬德順來豫以資臂助奏入

上命軍機大臣傳諭馬新貽曰曾國藩奏處州鎮總兵馬德順向帶馬隊素稱得力請調來營等語著馬新貽飭令迅速馳赴曾國藩軍營聽候調遣

中央研究院  
歷史語言研究所  
第一〇一〇號

中央研究院  
歷史語言研究所  
館藏書

欽定剿平捻匪方略卷二百六十 丙寅年

中央民族  
學院圖書

九月初一日丁巳調任陝西巡撫喬松年

欽定四庫全書

賴等股由鄭州一帶擾及舞陽葉縣臣已嚴飭

派出各軍認段嚴防督臣曾國藩由淮河上駛

行至懷遠臣卽前往晤商一切曾國藩旋由渦

河上行於月之初九日已抵周口臣由懷遠旋

壽後卽督英翰張得勝各軍於沿河一律挑築

長圩挖濠塹以期固守又以地廣兵單必須  
全力扼防復調原駐六安之總兵朱淮森四營  
原駐雒河之總兵蔣得遇四營添駐協防所有  
沿河長圩皆已一律興築各營防守尙爲周妥  
並令總兵黃鳴鐸督帶沙河水師各營認段巡  
防與陸軍聯絡一氣俾期穩固此時賊蹤游弋  
於鄧州葉縣一帶斷難北竄東面既有防河諸

軍及曾國藩派出追剿之軍南路又有曾國荃  
鄂軍及鮑超所部且曾國藩既抵周口提綱挈  
領統籌調度定可以次掃除 臣惟有嚴飭各軍  
妥籌防守奏入

上諭曰該逆現已合股竄入東境著恪遵疊次諭旨  
嚴防回竄毋稍鬆懈

喬松年又奏言已革總兵郭寶昌經 臣檄調來

學士 卷三十一 二  
皖臣現與曾國藩議守沙河分段認防素延甚  
廣必須將領得人乃可得力查該員熟悉沿河  
情形若暫留皖營帶隊必可得力商之曾國藩  
意亦相同仰懇

天恩俯准將該員暫留皖營效力出自

鴻慈奏入得

旨允行



初四日庚申曾國荃奏言臣於八月二十三日行

抵隨州准兩江督臣曾國藩咨稱捻股竄過東  
路業飭各軍跟剿並催鮑超統率霆軍迅赴周  
家口聽候調遣等語臣查從前賊勢西趨本圖  
犯鄂乃游騎至襄陽光化邊境知我軍有備無  
隙可乘於是張牛等逆退回襄禹任賴各股竄  
及長新方期進兵上下夾擊不意狡賊又復東

竄是鄂省籌備防剿便當移步換形鮑超之軍  
星馳前赴周口福建提臣郭松林一軍亦可出  
境臣卽日馳往樊城襄陽布置妥協由水路回  
省料理餉項如果東路有警仍當親赴黃州麻  
城周歷東北隘口務令守境之兵各扼要害毋  
許寇氛闖入卽出境之軍亦必籌畫接濟方免  
饑潰之憂奏入

上命軍機大臣傳諭官文曾國荃曰此股賊衆剽悍  
異常若探知有西趨之信再行布置恐已不及著  
該撫仍遵上月二十九日諭旨馳赴南陽會同李  
鶴年妥籌防勦事務或先赴襄樊一帶駐紮如賊  
匪有西趨之信卽日馳抵豫疆合力勦辦嚴防回  
竄總之此股賊衆非數省大吏同心協力不能蕲  
功該撫務當隨時與曾國藩妥商進止機宜以副

委任曾國荃一軍餉項著官文妥爲經畫源源接濟毋任缺乏

初五日 辛酉 閩敬銘奏言此次捻衆分股入東任

柱賴汶洸牛洛紅由荷澤西南直撲鉅野張總  
愚逆股由曹縣東北直撲金鄉勢甚剽悍據各  
處獲匪供稱均欲竄渡運河蓄謀甚銳 臣 飛飭  
知府王成謙遊擊王正起兩軍迎前勦賊飛飭

總兵楊飛熊副將王心安各軍緊守河隄八月二十四日王成謙一軍由鉅野進勦任賴股匪在代義集地方遇賊守備李炳武帶領馬隊奮勇衝殺陣斬馬賊四五十名賊遁竄西南次日王成謙復督隊向西南進勦該逆分股衝撲副將曾玉森首先衝入賊隊殺賊數名賊遂敗退各軍乘勝窮追陣斃馬賊一百餘名是夜該逆

三  
三

悉數東竄於二十六日徑從鄆城東北竄徧運  
河王成謙正在追擊因探南路張總愚股匪由  
金鄉西南蠡擁而來卽飭隊向南迎擊適遊擊  
王正起在鄆城之南拔隊南進兩軍分路進兵  
至李家樓地方該逆列仗來拒王成謙飭參將  
姚紹修遊擊黃日華帶兩營爲前鋒迎頭衝擊  
自督六營繼進姚紹修等縱橫馳擊斃賊多名

各軍追壓數里忽該逆大隊萬餘四面包至經  
王成謙分軍迎戰王正起之軍亦從西南衝殺  
陣斬多名賊遂狂奔南竄計王成謙一軍殺賊  
七八百名王正起一軍殺賊二百餘名二十七  
日任賴逆股竄踞運河西岸韓家堂一帶分布  
賊衆直撲河牆已革總兵楊飛熊督飭防軍開  
礮轟擊賊始退卻分股往撲開河圩牆亦經防

軍開礮擊退臣日夜督飭各軍嚴守並派隨營  
文武大小員弁悉數馳往隄上同力守禦又調  
東平汶上各州縣赴沿河民圩親爲守寨自二  
十七日起賊衆或分或合多方撲犯我軍日夜  
相持並派隊越河雕剿擒斬悍匪多名而張總  
愚逆股自被勦後乘夜遁往西北折竄開河西  
岸與各股合併力撲運河二十九三十等日攻



撲愈緊我軍槍礮不絕礮船水師亦飛棹河中  
上下轟擊該逆力攻五晝夜我軍嚴密防堵賊  
勢始衰九月初一日該逆悉數西竄又經楊飛  
熊飭軍過河追勦擒斬數十名各逆均由鄆鉅  
西南遁去臣查逆衆拌死渡運各軍勦力堵扼  
卒保無虞但逆謀詭譎異常猶慮僞遁以懈軍  
心再圖猛撲臣仍飭水陸各軍始終不懈並飛

勸王成謙一軍由鉅扼擊截其歸路調王正起  
一軍回紮河干以防回竄現在潘鼎新一軍已  
抵濟甯之安居劉銘傳一軍已抵鉅野劉秉璋  
劉松山張樹珊各軍陸續亦抵東境但使逆蹤  
不遽遠遁可以前後合圍以成兜剿之勢防剿  
各軍同力守禦藉保運防伏懇

天恩准 臣 擇尤彙案請獎奏入

上命軍機大臣傳諭曾國藩劉長佑吳棠張之萬李  
鴻章閻敬銘李鶴年喬松年英翰曰捻衆合股東  
竄直撲鉅野經知府王成謙遊擊王正起等督兵  
迎勦該逆竄徧運河往來撲渡官軍晝夜嚴防水  
師亦飛棹河中上下轟擊該逆均由鄆鉅西南遁  
竄此次東軍拒守河岸五晝夜之久克保無虞均  
屬異常出力著准閻敬銘擇尤彙案請獎該逆狡

悍無比雖被擊敗竄並未大挫兇鋒誠恐以僞遁  
懈我軍心再圖猛撲閣敬銘仍當督飭地方印委  
各員並在事員弁實力嚴防不得以賊已退卻稍  
涉大意該撫現今王成謙由鉅野截賊歸路潘鼎  
新一軍已抵濟甯劉銘傳劉秉璋劉松山張樹珊  
等軍均陸續抵東正可乘此聲威合力兜剿著會  
國藩飛飭各軍力勦務須一鼓殲除毋任再有竄

突如能奮勇擒渠朝廷不難破格獎賞如或縱寇  
殃民卽由曾國藩等嚴叅治罪勿稍姑息賊向西  
南必由蘭考入豫李鶴年務當督飭各軍防其回  
竄並與湘淮各軍聯絡聲勢用收夾擊之效張之  
萬已否前赴新任賊如竄徧淮徐窺伺皖境吳棠  
張之萬喬松年英翰當各飭防軍出境會剿不得  
強分畛域坐觀成敗致干重咎李鴻章仍遵前旨

帶印出省駐紮徐州會同閩敬銘等商辦軍務潘  
鼎新等皆係淮軍該署督卽酌帶親軍一二營趕  
緊赴徐布置不必瞻前顧後致有耽延黃運河防  
務喫緊著劉長佑督飭張樹聲等將大名等處加  
意籌防以期益臻周密

初七日 癸亥 調任閩浙總督吳棠奏言捻衆竄至

山東單縣境內難保不下竄淮徐 臣 添調清淮

標兵二千名前赴成子河防堵並飭淮揚鎮總  
兵歐陽利見候補總兵姚廣武張從龍等各率  
所部水陸馬步諸軍照舊分防扼守隨時聯絡  
民團以壯聲勢其運河圩工桃源境內將次告  
竣宿遷境內築有五六分數邳州境內河水尙  
未全消興修較遲現已飛飭在事委員星夜趕  
辦勒限全完並檄飭鹽運使李元華馳往邳宿

桃一帶嚴加催築督率布置並將各邑圩練事宜實力經理如果賊圖東竄臣卽馳赴衆興駐紮就近調度奏入報

聞

十三日己巳漕運總督張之萬奏言臣欽奉

諭旨調任漕運總督初任漕臣諸未諳悉且有應辦防堵事宜曾國藩近在周家口臣卽日先赴該



處面商一切庶幾稍有頭緒到任便可次第料理目下捻蹤肆竄道路多阻擬繞道山東由運河一帶行走就近查看臺莊以下牆濠藉可布置防守奏入報

聞

同日閩敬銘奏言逆股圖撲運防狡謀莫逞向西遁竄九月初一日劉銘傳由馬村截勦將至

蔡家陵地方遇賊接仗獲勝潘鼎新亦同時由  
三官集截擊至琉璃井北迎頭進擊該逆驚潰  
亂竄兩軍於馬家莊地方合力截殺殲賊甚多  
該逆奪路西奔陷於泥淖復被我軍追殺無數  
該逆盡向蒗澤一帶西遁官軍追至武安集地  
方是時劉秉璋楊鼎勳由鉅野章縫集西向定  
陶進發王成謙一軍亦由鉅野進赴城武該逆

探知南路俱有重兵遂繞從蒗澤西北狂奔又  
經劉銘傳潘鼎新兩軍追至張世店地方接仗  
獲勝賊遂全股竄出東境向考城一帶逃逸劉  
銘傳潘鼎新兩軍跟蹤追剿劉秉璋楊鼎勳兩  
軍亦由定曹繼進又張樹珊一軍原係曾國藩  
派赴徐州一帶防剿之兵前抵虞城後探聞逆  
股全在運河之西亦卽連夜折入東境茲聞賊

衆西遁已由單赴曹相繼追逐豫軍之蔣希夷  
保英二軍前抵曹縣現回考城鮑超一軍已抵  
豫境豫軍亦力扼東面如迎頭勦擊更恐賊蹤  
復竄回東刻下各路援軍俱已出境追勦而東  
省兵力有限若使遠追恐難回顧臣當飭王成  
謙一軍暫在曹郡擇要駐紮俟賊有定向再籌  
布置奏入

上命軍機大臣傳諭曾國藩劉長佑吳棠張之萬曾  
國荃閻敬銘李鶴年曰捻逆西遁經各軍兜截疊  
勝遂全股竄出東境向西南考城一帶竄逸著曾  
國藩督飭劉銘傳潘鼎新劉秉璋楊鼎勳張樹珊  
等軍奮力追逐勿令該逆再行竄撲他處蔣希夷  
保英二軍現已由曹縣折回考城著李鶴年督率  
馬德昭宋慶等軍與蔣希夷等軍會合夾擊惟豫

軍究嫌單薄恐難得手曾國藩務須嚴飭劉銘傳  
等無分畛域認真合勦以免疏失鮑超一軍現抵  
豫境著飭該提督迎頭痛勦曾國荃著仍遵前旨  
趕赴南陽一帶駐紮防賊上竄之路逆蹤無定河  
防仍形喫緊劉長佑閻敬銘仍當督飭在事各員  
晝夜防範萬不可稍涉鬆懈張之萬已交卸起程  
前赴周口與曾國藩商辦防勦事務卽著迅赴清

淮任事與吳棠悉心商酌以期益臻周密吳棠應  
俟李鴻章到徐後布置穩固再行起程赴閩浙新  
任

十六日壬申李鶴年奏言捻逆志在撲渡運河晝

夜狂奔豫軍分投追剿遊擊朱榮春率領偏師  
襲之於考城紅廟寨殺斃頭目李姓一名餘賊  
無數生擒八十餘名總兵余承恩敗之於東明

縣屬董家莊殺斃百數十名時宋慶保英及蔣  
希夷等各帶所部由睢州曹考一帶前進與提  
督劉銘傳等軍聯絡聲勢以爲犄角余承恩扼

守東明河岸屏蔽畿南豫軍水師礮船與直隸

礮船約期會哨部署釐定臣於九月初二日馳

往周口與曾國藩會商軍事適賊由山東鄆鉅  
一帶回竄豫疆陳留通許之間已見烽火臣卽



晝夜疾行於初八日回抵省垣布置城防並咨  
令近省駐紮之提督馬德昭派隊截擊初九日  
與賊接仗於祥符縣屬太平岡陣斬馬步悍賊  
四十餘名生擒十數名賊知近省有備遂向南  
奔竄經臣飛檄宋慶等軍跟蹤截勦務與湘淮  
諸軍前後夾擊其總兵余承恩一軍已飭由東  
明撥回直隸歸督臣劉長佑調遣奏入

上命軍機大臣傳諭李鶴年曰賊匪回竄豫境陳留  
通許之間俱有匪蹤該撫聞警由周口星夜回省  
派馬德昭一軍迎頭截擊小有斬擒該逆向南奔  
竄賊蹤剽疾異常此拏彼竄是其慣技亟應設法  
兜圍杜該逆紛擾之路著李鶴年懷遵前旨檄飭  
馬德昭宋慶等軍與蔣希夷等軍會合夾擊迅殄  
逆氛惟豫軍尙嫌單薄必須與湘淮諸軍聯絡聲

援會籌進勦方可爲一鼓聚殲之計著該撫咨商  
曾國藩相機布置務將該逆就地殲除毋令再肆  
蔓延

十九日乙亥曾國藩奏言宋慶一軍在刁河被圍

劉松山等於七月十四日拔隊馳援行抵南陽  
探知豫軍業已解圍該逆向東南竄過瓦店一  
帶二十一日劉松山等行抵灑灘與宋慶晤商

會勦之策是時賊方攻破南陽之尹家寨屯聚各村劉松山與宋慶張詩日等軍議定三路進兵行二里許步賊大隊分路撲進馬賊從兩旁包抄勢甚狡猾我軍迎戰賊遂退守尹家寨爲負隅死拒之計劉松山揮衆猛攻一鼓下之各軍跟追二十餘里至桑莊寨將賊踞村莊四十五處悉數奪回該逆大潰直奔侯橋寨一路共

計斃賊千餘人解散脅從甚夥二十二日整隊  
進抵侯橋寨賊隊蟻聚對河相距四五里各軍  
商定仍分中左右三路而於中右兩路又各分  
中左右三路回環策應蟬聯而進由河之南轉  
折向東追至新野所屬之上仙岡賊股愈出愈  
多劉松山見賊挾全勢來抗嚴飭各營屹立穩  
持槍礮步步轟擊未幾馬賊漸包漸近而中路

賊勢尤厚先以大腹衝撲中路之右經彭秀清  
羅朝雲率兩營抵住該逆卽直撲中路之左我  
軍當中路之左者爲同知朱式雲督率星豫三  
營施放噴筒步賊稍卻而馬賊又從星左營後  
盤旋而入步賊於煙燄中持矛衝突我軍以短  
兵鏖戰一以當十血戰半時之久星左營受敵  
最久幾不能支朱式雲持刀躍馬往來督陣賊

勢漸靡劉松山張詩日約同宋慶等率隊猛擊  
立斃悍賊六七百名合軍追殺十餘里遂收隊  
至上仙岡暫息是日計殺斃生擒及解散者不  
下三千名臣查張牛二逆前經劉松山張詩日  
兩軍敗之於上蔡等處茲又追及南陽之尹家  
寨新野之上仙岡奮勇鏖戰雖殺賊不及前此  
之多而賊勢之悍臨陣之猛亦近所罕見劉松

山等聞豫軍被圍卽日馳援及解圍後卽與宋  
慶聯絡一氣同心苦戰尤得師克在和之義容  
將出力各員附入上蔡案內彙獎其陣亡之花  
翎都司鄒明立一員仰懇

天恩飭部照陣亡例議卹

曾國藩又奏言劉銘傳一軍於八月二十七日  
馳抵城武潘鼎新一軍於二十六日馳抵濟甯



是時賊正屬聚鄆鉅之間閩敬銘派出之王成謙王正起兩軍三次進剿疊獲勝仗二十六至三十等日該逆猛撲運河之袁口靳口開河等處東軍抵禦嚴密未能搶渡其長溝以下之運防李昭慶一軍修築堅固又經潘鼎新一軍趕至濟甯軍威頗壯該逆未敢撲犯三十日劉銘傳潘鼎新會於汶上境內之馬村探知賊俱盤

踞梁山前後九月初一日劉銘傳潘鼎新兩軍  
分道直薄梁山賊之馬隊由東至西包抄而來  
張景春烏爾圖那遜督馬隊迎勦劉盛藻唐殿  
魁率步軍繼進陣斬悍賊數十名馬賊敗走其  
另股步賊三千餘名馬賊數百人自北而南正  
與潘鼎新一軍相遇潘鼎琛余在榜等施放炸  
礮潘鼎立率隊從旁抄擊賊卽轉向西奔我軍

三面齊進該逆盡向王莊奪路竄走烏爾圖那  
遜追至王莊徑入賊隊手斬馬賊身受矛傷五  
處猶不稍卻經張佩之率隊衝進救護回營北  
路劉盛藻唐殿魁從後追到南路潘鼎琛等攔  
頭擊之賊遂悉數狂奔我軍追至二十餘里殲  
賊無算次日賊向南回竄劉銘傳潘鼎新兩軍  
併力緊追在鄆城蒗澤曹縣東明等處或一日

一戰或一日再戰該逆被躡窮急殺傷逃散甚  
多初八日潘鼎新一軍趕至杞縣接仗小勝劉  
銘傳一軍趕至睢州該二軍於兩旬之間往來  
一千六七百里縱橫追逐迄未停趾現在杞縣  
陳留一帶籌備米糧仍卽跟蹤追剿此次賊鋒  
已挫其勢或可稍衰惟旣不得志於東必仍狂  
竄而西臣已檄令劉松山一軍由扶溝以北向

前迎勦並檄鮑超一軍由南陽至南召魯山一  
帶遮截賊入洛陽之路如驅賊南趨鄂境當一  
面派兵與鄂軍合勦一面留兵再辦沙賈兩河  
防守事宜冀收夾擊之效

曾國藩又奏言臣前因病請假蒙

恩允准一月以來服藥調治外證全愈惟用心稍久  
輒復煩燥出汗耳聾亦時作時止九月初九日

忽昏暈倒地雖旋卽無恙而衰頹之態實難支  
持據醫者云心氣過虧必須加意靜攝或可不  
再添病合無仰懇

天恩俯准續假一月在營調理至目下羣賊西竄淮  
軍湘軍豫軍鄂軍或勦或防徵調紛紛臣當與  
各督撫妥商調度雖在病中不敢稍涉大意奏

八

上命軍機大臣傳諭官文會國藩曾國荃李鶴年曰  
劉松山張詩日兩軍馳往南陽攻破尹家寨等處  
踞匪與宋慶所部在上仙岡合剿悉力鏖戰屢次  
獲勝殺斃悍賊甚多所有出力各員著曾國藩彙  
入上蔡案內保獎其陣亡之都司鄒明立著交部  
照例議卹劉銘傳潘鼎新兩軍追賊至山東汶上  
境內將梁山之賊三面攻剿並在鄆城荷澤曹縣

東明等處屢次獲勝盡力窮追至豫省睢杞一帶  
賊勢已挫著曾國藩檄飭劉銘傳等趕緊追剿務  
乘該逆疲乏之餘窮其所向不令喘息並檄劉松  
山一軍由扶溝以北向前迎剿一面催令鮑超由  
南陽至南召魯山前進截賊西趨洛陽之路李鶴  
年亦當檄飭豫省諸軍前截後追與湘淮各軍聯  
絡聲勢並著官文曾國荃分布鄂軍嚴防邊界仍



另籌游擊之師出境迎擊與豫省各軍會合兜剿  
不可稍分畛域曾國荃卽行出省擇要駐紮相機  
調度毋稍延緩沙賈兩河之防仍著曾國藩李鶴  
年嚴密布置毋任賊蹤再行東竄曾國藩病尙未  
痊著再行賞假一箇月在營調理

二十二日 戊寅 李鶴年奏言捻逆被剿南竄有由

中牟境內撲犯河干之勢訊據獲賊供稱賊衆

仍欲搶渡運河此次南來誘官兵撤防仍行北  
竄如無隙可乘便於汴省之西空開河隄引水  
南流該逆由長垣一帶乾河北犯等語臣查黃  
河隄岸有工處所省城北爲黑岡迤西爲石家  
橋又西爲胡家屯爲滎澤壩各段臨黃埽面或  
三五里不等惟石家橋連年出險十數里隄工  
埽段因工帑支絀尙未鑲築堅實情形尤屬可

慮臣當將保英蔣希夷各隊檄令北行一面飛  
催宋慶趨程追截適守備孔廣恩管帶一哨礮  
船於九月十一日起至黑岡又懷慶紳民構造  
礮船二隻亦由知府師長治等乘駕東來行抵  
該處見該逆正在黑岡刨挖隄身該守備等一  
齊開礮宋慶所部同日趕到併力向前當將隄  
邊賊衆殺敗奪獲欽鋤多件賊酋任柱遂率賊

股分踞各莊意在乘夜再掘宋慶乃令遊擊鄧  
林楓等潛襲賊營賊衆拌命抗拒我軍勇氣百  
倍斃賊二百餘名生擒數十名遠近踞賊驚起  
西奔副將崔廷桂統帶水師礮船與總兵宋慶  
水陸並進偵知賊中詭計欲誘官兵西追然後  
折回掘空隄岸乃將步隊密布於石家橋隄上  
崔廷桂礮船緊泊埽前該逆馬步果蠶擁回竄

一路縱火焚燒料物延及隄段崔廷桂督水師  
開放大礮宋慶督參將李承先等從烈燄之旁  
殺入賊中所向無前礮船連環轟打賊衆紛紛  
倒地宋慶乘賊勢稍卻親督全隊前進賊始潰  
敗沿隄西去次日於上游三十餘里之滎澤壩  
復行窆劄該壩乃黃河坐灣之所連日西北風  
大作礮船上駛節節爲難而埽面犯風之處波

浪滔天埽根料礮半被焚燬壩工場蟄岌岌堪  
虞正在人力難施忽見風轉東南水勢平順礮  
船起篷飛駛頃刻已至滎澤壩工次步隊隨亦  
趕到大礮旋轉轟擊鄧林楓李承先孔廣恩等  
首先殺斃悍賊數十名兵勇銳氣倍加計斃悍  
賊數百名賊始怯退南竄至滎澤縣屬李寨地  
方適遇蔣希夷伏兵齊起衝賊隊爲數段礮斃

賊首任雙追殺數里傷斃賊衆千餘名生擒十  
餘名訊據獲賊供稱該逆仍欲竄渡運河擾及  
山東等語查驗壩頭已被逆衆挖開二十餘丈  
深至丈餘及數尺不等水勢洶洶已將汜濫當  
經該鎮將等督兵搶護轉危爲安出力員弁可  
否仰懇

天恩准 臣酌保數員以示鼓勵該逆雖經官兵擊退

阻其狡謀難保其不故智復萌 臣訪求河勢霜  
清水落險工祇此數十里如夏秋盛漲在在堪  
虞兼顧通籌則廣武山以東朱仙鎮以西二百  
餘里之間非鱗次設防不足以臻完密雖非豫  
省之力所能及而金隄一綫南北大局攸關 臣  
惟有殫竭血誠勉求保護現已函商兩江督 臣  
曾國藩應如何辦理之處再行奏請



訓示奏八

上命軍機大臣傳諭曾國藩劉長佑蘇廷魁李鶴年  
閻敬銘曰逆匪被勦窮蹙希圖竄越河北並將榮  
澤壩空開二十餘丈水勢幾於汜濫經豫省水陸  
官軍擊退該逆蓄謀甚狡現雖折向南趨仍恐乘  
虛反噬河防關繫南北大局甚重李鶴年務當督  
飭豫軍嚴密分布不可稍涉大意此次水陸官軍

力戰數晝夜之久保獲長隄尙屬奮勇著准其酌  
保數員以示鼓勵其南竄股匪並著曾國藩飭令  
湘淮諸軍會合豫師跟蹤追擊一面嚴催鮑超之  
師迎頭探勦迅掃狂氛豫境黃河由廣武山以東  
至朱仙鎮綿長二百餘里均須鱗次設防豫省兵  
力未厚應如何辦理之處著曾國藩李鶴年統籌  
全局速行酌辦務臻妥協開濮東垣及張秋一帶

爲畿南保障黃河隄岸劉長佑闡敬銘尤須加意  
嚴防應如何添撥水陸各營鱗次分布著該督撫  
悉心妥籌榮澤壩隄岸雖經豫軍倉猝搶護而工  
未能堅著蘇廷魁趕緊修築堅固並將黑岡被掘  
河隄一併補修毋稍延誤

二十四日庚辰李鴻章奏言臣於九月初九日由

江甯啟行十五日行次清江與漕臣吳棠晤商

大略十六日卽接劉銘傳飛報該軍與潘鼎新  
所部在鄆北梁山接仗大勝後捻逆由鄆城西  
竄銘鼎兩軍緊躡其後初四日追抵曹州該逆  
屢次拒敵與我軍一日數戰見仗卽敗擒殺解  
散極多該兩軍由考城分追一進杞縣一走睢  
州初八日劉銘傳抵睢是日五鼓賊卽由睢州  
西南竄走揆其趨向似由扶溝一帶過賈魯河

等情又據徐州鎮道稟稱捻衆有由歸德南竄  
潁亳之說豫皖交界均形喫重賴有劉銘傳潘  
鼎新劉秉璋楊鼎勳張樹珊分道兜剿或可不  
虞滋蔓而徐州雖屬重鎮日下軍情較鬆臣適  
感冒風寒在清江舟次延醫服藥數劑擬卽力  
疾循運河北上察勘沿隄長牆籌商戰守責成  
再赴徐郡從容布置奏入報

聞

二十五日辛巳閻敬銘奏言九月十九日由豫回

竄賊股駛入曹縣境內運河西岸各莊已有賊  
馬往來經副將張得魁帶隊往勦殺賊數名據  
獲匪供稱任柱賴汶洸等知追軍俱在豫境意  
圖晝夜疾奔乘我不備竄突運防故自豫境東  
竄等情二十一日夜該逆大股在袁口西岸各

持門板樹椿捆紮長梯並持刀矛直進鳧水撲  
牆經遊擊張青雲帶領勇丁極力堵禦斃匪無  
算並奪獲長梯器械甚多賊始敗退仍在西岸  
麕聚查該逆竄徧運河乘夜攻撲河牆兇悍已  
極我軍防守尙嚴故未墮其詭計現在各路援  
軍均在豫省一時未能卽來惟有先籌嚴守挫  
其兇銳再圖進剿現臣督飭東省各軍嚴密布

置慎守河牆至長溝以下至石佛一帶運河係  
曾國藩派李昭慶所部之提督張桂芳等八營  
扼守昨曾國藩調令該軍赴豫尙未起程 臣卽  
飛咨張桂芳等仍督所部嚴爲防守以專責成  
並飛咨曾國藩李鴻章吳棠查照現在賊勢猛  
疾防務戒嚴遊擊張青雲獨能奮勇立功亟應  
賞不逾時以期激勵士氣相應請



旨將候補遊擊張青雲以參將留東儘先卽補並  
賞加副將銜出自

天恩再 臣宿疾大發懇請

賞假一月在營調理現在賊勢猖獗 臣當力疾辦理  
不敢稍懈奏入

上命軍機大臣傳諭曾國藩劉長佑李鴻章閻敬銘  
李鶴年曰任柱賴汝洸等逆回竄曹縣糾合大股

進撲袁口經官軍擊退在事出力之遊擊張青雲  
著以參將留於山東儘先卽補並賞加副將銜以  
示鼓勵現在賊股尙踞河西著閻敬銘卽飭在防  
各軍乘該逆喘息未定痛加勦洗掃蕩狂氛賊謀  
狡詐往往注彼竄此亟肄罷我此時賊蹤雖又東  
竄豫省布置仍未可稍形疏懈著曾國藩李鶴年  
劉長佑督飭張樹聲統率所部嚴密布置遇賊卽

擊毋令偷渡東省兵力甚單如該逆合股竄入勢  
恐不敷抵禦李鴻章移紮徐州距曹縣較近著卽  
酌撥兵勇迅赴山東協同進剿以資厚集閻敬銘  
患病未痊著賞假一箇月在營調理惟賊蹤現又  
東竄防剿正形喫緊該撫仍當力疾從公妥籌兼  
顧以副委任

二十八日  
甲申安徽巡撫英翰奏言  
臣與前撫  
臣

喬松年籌商酌分步隊兩營水師四營留駐壽  
州交署壽春鎮總兵徐鷓統領防守淮河一帶  
臣卽於九月十一日起程十三日馳抵潁州連  
據探報前竄東境之賊因各軍截擊復折回曹  
考睢杞一帶由陳留擾及中牟已抵鄭州境內  
並接曾國藩來函囑仍料理沙河防務臣查捻  
逆奔突靡常前次合股東趨沙河之防幾無成

效今賊又渡河而西自當嚴益加嚴以杜竄突  
現仍飭各軍將認防長圩趕緊修竣一面飛飭  
郭寶昌一軍由亳州折回豫境之槐店駐紮程  
文炳一軍移赴豫皖交界之沈邱集駐紮並通  
飭各營無分畛域但遇賊氛竄近卽行越境迎  
擊臣自帶親軍各營駐紮潁州視賊勢趨重何  
路卽由何處督剿以期戰守兼備力捍兇鋒奏

入報

聞

同日鮑超奏言接准湖北撫臣曾國荃函商刻  
下捻逆大股已羣趨新野鄧州南陽等屬晝夜  
兼馳囑由隨棗一路繞出襄樊庶於豫省局勢  
較緊兼可堵其入楚之路當卽由樊城前進該  
逆聞風東竄臣仍由新野趕至南陽據探大股

之賊復由蘭考折回盤踞許州邊馬擾竄襄城  
葉縣一帶遂於九月十六日由南陽拔隊取道  
裕州前赴襄葉迎頭截擊十九日至裕州葉縣  
交界之間復據探稱該逆又旁遁寶豐郟縣前  
隊已至魯山境內當卽率隊由魯山迎勦二十  
一日行抵魯山賊又遁往汝州所轄之臨汝白  
沙地方去魯山不下二百餘里該逆馬匹甚多

飄忽無定 臣連日奔馳未遇一賊現仍尋蹤跟  
追務期盡殄逆氛奏入

上諭曰賊現避兵奔竄卽當覘賊所向迎頭撓剿以  
遏狂氛著懍遵疊次諭旨妥速籌辦用副委任



欽定勦平捻匪方略卷二百六十一

丙寅年

中央民族  
學刊

十月初三日 戊子 閻敬銘奏言九月二十一日夜

捻股屬集河西猛撲袁口河牆旋由南路劉老

口一帶折竄東南突攻開河圩牆經各軍槍礮

齊施斃賊無數該逆忽折竄東北直撲安山戴

廟等處以擾長溝自二十二至二十六等日官

軍迎勦疊有斬擒賊股現遁嘉祥之羊山一帶

潘鼎新一軍已從豫境追援去賊不遠劉銘傳  
一軍聞亦卽入東境 臣查該逆此次入東狡悍  
情狀較歷次尤甚或北或南一日數變其搶渡  
奪路專在黑夜幸各軍勦力堵剿晝夜相持故  
逆賊計無所施現在援軍將進 臣當督飭各軍  
前後夾擊復據獲匪供稱該逆因在豫無從覓  
食拌命東竄如此路防守甚密卽將改竄韓莊

臺莊及清淮一帶圖撲運東等語 臣卽飛咨漕  
臣吳棠及郎中李昭慶各軍一體準備以期周  
密一面飛催潘鼎新各軍相機進擊大加勦洗  
同日趙長齡奏言據報捻逆張總愚賴汝洸等  
各率大股復由山東曹單回竄豫省直向西趨  
已至永甯縣之河底鎮其邊馬擾及新安縣之  
磁礪並陝州之硤石驛等處查硤石驛距山西

茅津渡不過五十餘里與垣曲芮城二縣亦復相近聞陝州一帶並無重兵駐紮豫省大兵均在東南躡蹤追剿以致逆氛漸向西竄晉省邊防倍形喫緊亟應豫爲之備已由臬司陳湜飛飭各軍馳赴垣曲芮城等處會同各該地方文武協力防守並添撥各營往茅津渡永樂鎮等處分段梭巡一面飛飭沿河州縣調集團練分

紮河干以壯聲勢沿河渡船一律提歸北岸所  
有新造礮船經臣飭該臬司趕緊招募水勇分  
泊渡口晝夜盤查使賊無從偷渡惟晉省地廣  
兵單支持不易誠恐該逆於陝州一帶日久盤  
踞將來黃河冰凍成橋實屬防不勝防更恐該  
逆分犯靈寶閿鄉偃近潼關則全陝亦爲震動

應請

飭下河南撫臣李鶴年遵照前奉

諭旨飛飭各軍繞前攔截或令鮑超分撥數營進紮  
陝州所屬地方攔頭遏剿毋使該逆撲犯河干  
不獨晉省邊陲藉資保衛卽靈寶閩鄉以及潼  
關重鎮亦可共保無虞均奏入

上命軍機大臣傳諭曾國藩吳棠張之萬李鴻章閻  
敬銘李鶴年趙長齡曰捻逆現遁嘉祥之羊山一

帶或南或北飄忽靡定其搶渡奪路專在黑夜蓄  
謀尤爲詭譎亟應嚴密布置力堵該逆紛擾之路  
潘鼎新劉銘傳等軍業已次第入東著閻敬銘檄  
飭東省官軍與調到援軍聯絡聲勢晝夜嚴防遇  
賊卽擊迅掃逆氛該逆因在豫無從覓食拌死東  
竄如此路防守甚密卽將改竄韓莊臺莊及清淮  
一帶圖撲運東著吳棠與李鴻章悉心會商妥籌

戰守與東豫各軍合力會剿張之萬計已抵淮卽  
著將清淮防務妥爲接辦張總愚賴汶洸等各率  
大股併力西趨已至永甯縣之河底鎮邊馬擾及  
新安縣之磁礪陝州之硤石驛等處著曾國藩李  
鶴年探明賊蹤相機擊剿逆氛旣經西竄晉防極  
爲喫緊卽著趙長齡督同臬司陳湜添調兵勇嚴  
爲備禦節節設防毋令偷渡豫省西路空虛若該



逆於陝州等處盤踞日久將來黃河冰凍成橋晉  
省防不勝防更恐該逆分犯靈寶閿鄉偏近潼關  
全陝亦爲震動關繫極爲緊要著曾國藩李鶴年  
抽撥勁旅迅赴陝州一帶繞前截擊力杜該逆西  
竄之謀鮑超一軍現在魯山應否卽令該提督移  
紮陝州一帶專顧西路之處著曾國藩李鶴年相  
機調度曾國藩節制數省責無旁貸務當統籌防

勦力顧全局以副委任

初八日癸巳趙長齡奏言探報豫捻前隊已由陝

州硤石驛竄至八里店等處計距茅津不過二

三十里九月二十六七八等日該逆在太陽渡

對岸屬集河干勢將搶渡經臬司陳湜等督率

水陸各軍施放槍礮隔岸轟擊斃賊多名水師

礮船亦相繼趕到協同堵擊賊始竄至閩鄉盤

院一帶正在永樂鎮對岸測探水勢經防軍開  
礮隔河轟擊賊見官兵守禦甚嚴漸向西路遁  
去臣查該逆連日撲河搶渡屢經官兵擊退現  
竄靈寶閩鄉勢將窺犯陝境聞該省潼關商雒  
等處並無重兵扼守晉省防務正緊兵勇無多  
勢難分兵越鞬屢經飛咨陝西撫臣劉蓉速調  
勁旅攔頭堵截並咨河南撫臣李鶴年飛催大

軍繞前邊勦一面飭蒲州協副將王巨孝駐紮  
風陵渡妥速布置並飭該臬司親率隊伍視賊  
所向跟蹤追擊萬一該逆在陝州所屬日久盤  
踞轉瞬河凍成橋沿河數百里防不勝防恐非  
陳湜一人所能兼顧 臣當隨時察看情形如果  
河防再行喫緊卽酌帶省標精兵親赴適中之  
地就近調度奏入

上命軍機大臣傳諭會國藩閻敬銘趙長齡李鶴年  
喬松年劉蓉曰張總愚等各率大股西竄陝州破  
石驛等處復在太陽渡對岸麕集河干搶渡經水  
陸各軍協同堵擊賊始由閩鄉盤陀一帶漸向西  
路遁去勢將犯陝潼關商雒等處並無重兵扼守  
著喬松年劉蓉速撥勁旅迎頭截擊無任關入腹  
地喬松年計可到陝地方情形恐未熟悉劉蓉仍

當會商防剿或出省扼要駐紮不得遽行抽身引  
退儻新舊交替之際少有疏虞仍惟劉蓉是問內  
鄉浙川等處防兵甚稀著李鶴年飛催大兵繞前  
邊剿前諭曾國藩調鮑超防陝州一路未知該提  
督曾否與賊相遇如尙在魯山南召正可移師南  
陽以防浙川一帶著卽相機調派該逆竄豫無從  
覓食恐仍垂涎山西完善之地稍爲鬆勁卽恐墮

其狡謀趙長齡務當督率陳湜等晝夜隄防不可  
稍涉大意如晉省邊防喫緊恐非陳湜一人所能  
兼顧卽著趙長齡出省督辦上年冬閒防河山東  
山西均雇覓小船敲冰最爲得力該二省沿河雖  
有礙船尙恐不敷調遣仍應照上年辦法多雇民  
船輪織敲冰以防逆匪偷渡著閩敬銘趙長齡妥  
爲籌辦

十一日丙申李鶴年奏言逆捻自中牟南竄旋分

兩股東股任賴等逆由陳留蘭儀考城竄向東  
北擾及金鄉以南西股張逆南竄許州疊據諜  
報及賊中逃人供稱東竄之賊如不能搶渡運  
河仍將回竄豫省偷決黃河隄岸等語豫中祇  
此兵力勢難兼顧西路祇得令宋慶一軍暫於  
近省駐紮專顧河防以備東股回竄至張逆一



殷則曾國藩游擊之師如浙江提督鮑超江蘇  
臬司劉秉璋蘇松鎮總兵楊鼎勳各軍均在襄  
許之間足敷追剿該逆竄許州後九月十五至  
二十五等日經官兵屢次擊退遂由韓城鎮觀  
音堂一帶竄向陝州二十六日屬集州城西北  
之太陽渡意欲搶渡黃河幸各渡口船隻均先  
時提集北岸凡可紮筏之木植板片悉數搬運

州城約會山西北岸防兵一見對岸賊至施放  
槍礮轟斃多名該逆計阻攻撲陝州東南兩門  
該州知州周仁壽等施放大礮轟斃紅衣賊目  
及馬賊十數名匪勢稍退次日該逆由靈寶一  
帶向西竄逸訊據獲賊供稱有由商雒仍回湖  
北之語現在提督鮑超臬司劉秉璋各軍均已  
追至河南府接該提督函稱二十七日統率全

隊攜帶十日乾糧由洛陽所屬之彭婆鎮出宜陽永甯邊界每日趨行百數十里卽日可抵陝州函知劉秉璋仍由大道進發另派奇兵由韓城鎮翻山越嶺出盧氏以達靈寶防賊南趨內鄉之路等語計日內必可見仗俟有捷音卽行馳奏以慰

宸廑奏入

上諭曰該逆避實擣虛鮑超此番閒道出奇當可制勝該撫卽咨行鮑超妥速進剿並豫計該逆必由之路伏兵待之可期得手仍隨時與曾國藩會商辦理確探各路軍情賊情迅速奏聞

十二日丁酉李鴻章奏言臣於十月初三日行抵

徐城據徐州鎮道面稟初二日賊騎先由金鄉竄至豐縣是日大股南趨離徐百數十里臣卽

將隨帶親兵三營並李昭慶留徐四營分布城  
廂嚴爲守禦惟據劉銘傳擒獲賊供任賴等逆  
竄東旣不得逞仍圖竄擾淮徐窺撲運河臣在  
徐州尙可力扼要衝但恐該逆避兵繞竄睢宿  
泗靈處處空虛已檄調南贛鎮總兵王永勝統  
開字十一營進紮皖徐交界之雙溝古州鎮總  
兵劉士奇統奇字七營進紮運河西岸舊邳州

三才圖會卷之三十一 十一  
拾衆若卽東竄卽會合該二軍迎頭兜剿內可  
屏蔽清淮以東各州縣外可與劉銘傳李昭慶  
等軍前後夾擊又添調水師分扼運河上下使  
無旁逸之患仍隨時會商曾國藩妥爲調度以  
期迅滅賊氛奏入

上諭曰昨據李鶴年奏該逆東股分竄金鄉西股由  
陝州折竄靈寶已諭令鮑超將西路之匪跟踪追

擊其東路賊股該署督仍當督飭將弁妥籌防剿  
與曾國藩隨時會商相機調度以期迅掃逆氛

十三日戊戌曾國荃奏言臣於九月二十六日出

省十月初二日行抵黃安欽奉

諭旨飭臣與官文嚴防邊界另籌游擊之師出境與  
豫軍會剿並令臣出省調度臣思捻逆流竄時  
分時合倏東倏西歷經官軍窮追賊乘虛而入

苟一處稍鬆各路卽受蹂躪鄂邊與豫境毗連  
將近二千里在在均關緊要刻下張總愚等股  
竄至宜陽澠池而賴汝洸等股尙在東境臣若  
移紮南陽僅能堵禦鄂之西偏不能顧及中路  
而東路更無論矣萬一山東另股回竄光固則  
鄂之東路實爲可憂查廣水驛最爲適中之地  
又係扼要之區可以上下兼顧臣俟巡閱麻城



後卽移紮廣水驛相機調度至另籌游擊之師

出境迎擊一節前已咨調福建提臣郭松林一

軍於九月初旬出境屯紮唐縣臣所部採買口

馬冬月可以到營交提督伍維壽訓練月餘稍

有把握卽可隨同郭松林步軍赴豫協剿奏入

上諭曰前據李鶴年奏該逆東股分竄金鄉西股由  
陝州折竄靈寶已諭令鮑超於彭婆鎮等處設伏

截剿惟賊蹤分合靡定南陽一帶空虛該撫務當  
確探賊情相機進紮並檄飭郭松林一軍越境會  
剿仍隨時與會國藩咨商調度毋得顧此失彼

同日

上諭內閣曰署甘肅按察使劉典著幫辦陝甘總督  
左宗棠軍務

十四日 己亥 劉蓉奏言據潼商道稟報山東曹州

擒匪已竄陝州邊馬擾至閩鄉西關距潼關僅  
六十里當飭各軍扼要防剿該逆偵知潼關有  
備折由蒿峪小路分股竄入華陰朝邑等處維  
南一路又有賊馬滋擾並聞張逆有由魯山竄  
擾漢中之說臣查擒逆在山東河南疊被官軍  
截剿早料其鋌而走險必圖偪入陝疆現在該  
逆大股分路狂竄潼關以西平原路歧無險可

扼若不厚集兵力深虞難遏兇鋒臣已抽調邱  
時成等馬步各隊暫赴省東以顧眉急合無籲  
懇

天恩飭浙江提臣鮑超親督所部分由潼商前進與  
陝軍合力迎擊迅圖掃蕩並請

飭下河南撫臣李鶴年派撥勁旅扼紮陝州要隘以  
期前後夾擊至襄陽鄖陽一帶均與陝境毗連

並懇

飭下湖廣督臣官文湖北撫臣曾國荃派兵嚴備力  
固鄂邊山西撫臣趙長齡布置風陵渡上至龍  
門一帶河防以免偷渡晉境

劉蓉又奏言臣所部楚軍共祇一萬四千餘人  
從前東西分防早已不敷布置現值西回東捻  
兩路同竄欲防則無迎擊之旅欲剿則無守隘

之兵竭蹶萬分不得已請調鮑超一軍萬一該  
提督又爲魯山一股牽掣未能整軍前來恐局  
勢糜爛不可支持伏懇

飭下兩江督臣曾國藩通籌全局迅撥大枝勁旅來  
陝會剿奏入

上命軍機大臣傳諭官文曾國藩崇實駱秉章李鶴  
年趙長齡喬松年劉蓉曾國荃曰捻匪由靈寶閩

鄉西趨折由蒿峪小路分股竄入華陰朝邑等處  
維南一路又有賊馬滋擾逆首張總愚有由魯山  
竄擾漢中之說劉蓉現抽調邱時成等隊暫赴省  
東著卽激勵諸軍奮勇堵剿力遏兇鋒商維一帶  
仍籌防軍妥爲遏截省垣防務亦須嚴密布置不  
可稍涉大意鮑超一軍卽著曾國藩催令入關助  
剿並趕緊添派湘楚各軍赴援陝境陝州洛陽一

帶李鶴年當分撥豫軍堵截以防賊蹤回竄襄鄖  
一路官文曾國荃亦宜迅撥兵勇扼要駐守以防  
賊由商維回竄鄂疆之路並著相機出境越勦不  
可劃疆自守同州朝邑等處與晉省僅隔一水黃  
河隄岸絲長防守尤關緊要趙長齡當抽撥兵勇  
交陳湜妥籌堵禦儻任賊東渡黃河惟趙長齡陳  
湜是問漢中毗連川境著崇實駱秉章迅派得力



兵將嚴防邊境曾國藩總統師干各路將士均歸  
調度若不將此股捻匪設法殄滅咎將誰歸喬松  
年現在行抵何處著卽趕緊馳赴新任妥籌防剿  
劉蓉俟喬松年到任後當與之會辦軍務不得遽  
行回籍置身事外

十五日庚子鮑超奏言臣兼程行抵洛陽捻匪已

遁往陝川遂派提督唐仁廉曾成武兩軍由盧

氏小路前進自率各軍出韓城閒道以達陝州  
均日行百數十里冀收夾擊之效及將抵陝州  
賊又由閩鄉遁往秦之維南商州一帶連日狂  
奔晝夜不停沿途拋棄馬匹頗多據逃出難民  
均稱該逆明知秦中無糧可食不過暫避追師  
意欲仍由商境折竄湖北就糧等語查商州與  
楚之鄖陽豫之內鄉接壤逆蹤飄忽難保不乘

虛出此臣思與其尾追於後不知迎截於前擬  
率軍折赴南陽爲兜勦計師旋灑陝之處值臬  
司劉秉璋總兵楊鼎勳兩軍由商城追賊至灑  
共相籌商該兩軍卽在洛陽新鄭擇要駐紮以  
防回竄臣準賊情以度地勢似宜以南陽爲肆  
應之處擬卽率隊馳往迎勦奏入

上諭曰陝省兵力甚單該提督若不兼程往援誠恐

爲患益深洛陽新鄭一帶既有劉秉璋等軍駐紮  
防其回竄該提督仍當遵照昨日諭旨趕緊入關  
助剿迅殄逆氛

十六日辛丑趙長齡奏言十月初一至初三等日

捻逆在渭河上游擄船紮筏搭造浮橋均經臬  
司陳湜督同遊擊陳怡昇等帶領礮船奮力擊  
退斃賊多名惟渭河北岸尙屬空虛儻被該匪

竄越於秦晉兩省皆大有關繫現已檄飭該臬  
司酌撥精勇數百名遴派得力營官帶赴渭河  
北岸協同該處民團扼要防守並調太原鎮總  
兵蔣臨照大同鎮總兵馬陞迅帶各營弁兵於  
西北一路分段扼守該臬司卽在蒲州風陵渡  
一帶就近督率水陸各軍與渭河防兵聯絡一  
氣相機堵剿總期始終弗懈力固藩籬

趙長齡又奏言捻逆竄擾陝境適值陝省東路  
兵力無多致被闖入若不早爲掃蕩竊恐滋蔓  
難圖前聞鮑超二十餘營其頭隊早已行抵河  
南陝州至今未見進剿合無仰懇

天恩迅飭鮑超分撥勁旅十餘營星夜前進仍由陝  
州沿河直達潼關會合陝軍趕緊剿洗以免紛  
擾之虞奏入

上命軍機大臣傳諭會國藩趙長齡李鶴年喬松年  
劉蓉鮑超曰捻逆於渭河上游擄船紮筏搭造浮  
橋均經防兵擊退該撫已調蔣臨照等帶兵分段  
扼守陳湜卽在風陵渡一帶就近督率所籌均妥  
惟恐晉省兵勇無多渡口林立防不勝防著趙長  
齡於各鎮標兵內添調一二千名交陳湜訓練或  
令陳湜添募勇丁一二營藉壯聲勢如南岸防軍

足敷分布仍可酌量分撥渭河北岸以資協助該  
撫卽傳諭陳湜認真籌辦務出萬全鮑超一軍前  
令由陝州追勦昨據該提督奏移師南陽當經批  
令趕緊入關若由內鄉浙川以趨荆子關不數日  
卽可入陝一與賊遇可以痛加勦洗著曾國藩卽  
飭該提督酌度地勢賊情何路最爲捷便卽由何  
路前進總期痛挫兇鋒力保完善豫省之宋慶等



軍留爲防守隘口之用劉秉璋等軍卽可酌量分撥赴陝與鮑超互爲聲援並著曾國藩李鶴年相機調度援軍未到以前喬松年劉蓉當就現有兵力移緩就急設法堵剿勿任鴟張

十七日 壬寅 英翰奏言准曾國藩函稱捻逆又分

爲二張總愚一股竄至鞏洛任柱一股竄至蘭考有乘隙回巢之意 臣當卽親督各軍馳紮太

和邊境豫備迎勦連日探悉西路一股仍在偃  
師一帶東路一股由曹縣徑撲運河被官兵擊  
退竄至鉅野盤踞據逃出難民供稱該逆欲由  
豐單竄窰灣偷渡如不得逞卽肆擾東路完善  
之區等語查該逆雖距皖較遠而剽疾異常仍  
須嚴爲之備 臣現派提督黃秉鈞一軍移紮距  
蒙五十里之西洋集總兵程文炳等兩軍分紮

亳州暨距亳五十里之義門集槐要駐守郭寶  
昌一軍仍駐豫境之槐店其餘各軍均暫紮太  
和境上聯絡聲援太境距周口較近臣擬日內  
馳往與曾國藩面商機宜奏入報

聞

二十日乙巳曾國藩奏言據劉銘傳潘鼎新呈稱  
九月初一日該兩軍在梁山破賊後追至鄆城

之季家莊與賊相隔半程初三日行抵安興孔  
集等處探知賊在曹州府東之新集初四日潘  
鼎新一軍先馳至新集之南該逆正思西竄我  
軍衝入賊陣截殺數段逆勢奔潰劉銘傳一軍  
馬步亦到追殺十餘里賊由曹州城北西奔兩  
軍督隊緊追截殺多名並生擒捻首及賊黨二  
百餘名初五至初八等日又追賊於曹縣朱家

寨及新考城之敵勝寨統計大小六戰縱橫盪  
決無役不勝等語 臣查逆衆東犯銳意竄渡運  
河自梁山一戰賊勢稍卻尙思留戀東境爲覓  
食苟延之計劉銘傳潘鼎新兩軍盡力追剿窮  
賊所往遂使悉數敗竄東省運防無恙固由守  
禦之嚴亦賴追兵之速在事出力人員應卽歸  
入前案彙保以昭激勸

會國藩又奏言任賴一股徘徊黃河南岸黑岡一帶九月十一日賊至滎澤壩十二日偷窆河隄十三日豫軍礮船趕到會同陸軍宋慶等將賊擊退張總愚一股由扶溝紛竄西南十四五等日攻撲許州適張樹珊一軍由山東追賊回豫十五日聞許州告警卽率隊馳援一擊敗之劉秉璋楊鼎勳兩軍亦馳抵許州之小召鋪逐

賊於潞河東岸頗有斬擒由是各賊遂分東西  
兩路其東竄者爲任柱賴汶洸一股西竄者爲  
張總愚全股牛洛紅已死其子牛喜接管賊黨  
或東或西尙無定向臣於十八日檄令劉銘傳  
潘鼎新張樹珊三軍馳勦東路鮑超劉秉璋楊  
鼎勳劉松山專辦西路潘鼎新一軍二十日自  
朱仙鎮拔隊四日而馳抵定陶該逆一日夜行

二百餘里先於二十一至二十五等日猛撲運  
河之袁口開河等處經東軍竭力擊退潘鼎新  
趕到後逆蹤盤旋於郟城鉅野金鄉等處二十  
八九兩日潘鼎新在嘉祥勦賊獲勝劉銘傳於  
二十九日至鉅野之葛店派張景春等選帶馬  
隊馳勦十月初一日在羊山擊賊獲勝追至金  
鄉東北之周圩收隊現在劉銘傳紮金鄉潘鼎



新紮濟甯之安居賊在金濟之間張樹珊一軍  
由虞城馳赴單縣聞賊若不得逞於山東卽竄  
徐淮圖撲運河李鴻章已至徐州諸軍畢集當  
可保全運防徐圖兜擊賊之西竄者由襄城邾  
縣汝州一路奔竄鮑超於九月十六日由南陽  
拔隊初聞賊竄襄城擬由裕州一路進剿及行  
抵裕州知賊已竄汝邾卽兼程行走二十一日

馳抵魯山而賊已遁往汝州之臨汝白沙地方  
旋由宜陽永甯連夜狂奔鮑超亦由汝州洛陽  
跟追二十九日抵宜陽之韓城鎮十月初二日  
至陝州之章茂寨每日均行八九十里至百里  
不等劉秉璋楊鼎勳兩軍自許州獲勝後取道  
新鄭汜擊一路初二日行至陝州之觀音堂賊  
知追兵將至遂於關鄉西南之太峪口繞越潼

關以南關入陝西之商州一帶各軍餉項未到  
米糧罄盡陝閩商雒萬山之中初冬苦寒士卒  
寒衣未備萬難再進據逃出難民聲稱賊以陝  
西無食可覓意欲由荆子關竄往湖北等語商  
州與鄖陽毗連又近南陽之內鄉鎮平等處鮑  
超現擬由章茂寨回至南陽劉秉璋擬由觀音  
堂回至新鄭一面籌備米糧一面備剿回竄之

賊劉松山拔隊稍遲初三日甫至汝州因賊去  
已遠卽在汝屬暫駐續候調度查東竄一股劉  
銘傳各軍尙能追及邀擊西路一股鮑超等奔  
馳千里未及接仗實深焦憤至陝西艱苦已極  
不特官軍米糧子藥籌運萬難卽該逆志在擄  
掠恐亦無所得食不久仍將回竄山西防務僅  
恃一河賊若北渡竄晉爲患正長伏乞

皇上飭下山西撫臣嚴扼河防保全完善之區若僅  
在秦境則數月之內又將回竄豫鄂臣已檄飭  
各軍沿途確探相機迎剿

曾國藩又奏言臣因病難速痊仰蒙

天恩兩次賞假在營調理兩月以來加意靜攝而心  
氣過虧不時出汗不能多閱文牘說話逾十餘  
句舌端卽寒澀異常耳亦重聽似此病軀久膺

重任斷無不償事之理再四籌思不得不仰懇  
聖慈准開各缺安心調理惟臣受

恩深重有不敢遽請離營者人臣事君之義苟有所  
長所短皆可直陳於

聖主之前臣不善騎馬未能身臨前敵親自督陣又  
行軍過於遲鈍十餘年來但知結硬寨打呆仗  
從未用一奇謀制敵於意計之外此臣之所短

也 臣昔於諸將來謁無不立時接見諄諄訓誨  
上勸忠勤以報

國下戒騷擾以保民別後則寄書告誡頗有師弟  
督課之象其餘銀米子藥搬運遠近亦必計算  
時日妥爲代謀從不誑以虛語此 臣昔日之微  
長也今 臣病勢日重憚於見客卽見亦不能多  
言豈復能殷勤教誨不以親筆信函答諸將者

集三 卷之三十一 三十一  
已年餘矣近則代擬之信稿亦難核改稍長之  
公牘亦難細閱是 臣 昔之長者今已盡失而用  
兵拙鈍勦粵匪或尙可倖勝勦擒匪實大不相  
宜明知必誤大局而猶貪戀權位不肯直陳是  
欺

君也明知湘淮各軍相信頗深而必遽求離營不顧  
軍心之渙散是負



恩也惟有顛懇

天恩准開協辦大學士兩江總督實缺並另簡

欽差大臣接辦軍務臣以散員留營不主調度賞罰

之權但以維繫將士之心庶於軍國大事毫無

所損而臣之寸心無忝卽病體亦可期漸愈感

激

鴻施曷有旣極

曾國藩又奏言臣於同治三年七月蒙

恩錫封一等侯爵世襲罔替祇承

恩命懼弗克勝維時金陵倖克屢立功績皆賴諸將  
之力

朝廷論功行賞

恩賚有差各將士皆邀

殊榮臣忝居統帥不敢立異固辭然自拜

命以來無日不兢兢業業恐負非常之

寵而貽不稱之譏去歲奉

命勦捻至今已一年零五箇月毫無成效雖

聖主不加譴責而臣心實覺悚惶應懇

天恩收回

成命飭部將臣所得封爵暫行註銷此後臣效力行

閒如果病體全愈續有微勞再當乞

恩賞還爵秩謹法古人自貶之義以明臣抱歉之忱

同日李鴻章奏言疊據劉銘傳報稱十月初二日賊由金鄉抵豐縣之肅堰初四日我軍截擊斬獲數十人賊折回魚臺初五日追至魚臺李家溝初六日又追至金鄉之羅屯賊先排隊待戰以馬賊抄我輜重經張景春等馬隊擊敗遂悉遁走初七日乘霧回竄東南圖走豐沛初八

日追至魚臺擒斬尾賊百餘名賊首劉洸遠朱  
導等率衆投降初九初十等日賊由羅屯羊山  
一帶南竄劉銘傳追至金鄉城北而賊在城西  
十一日劉銘傳令劉盛藻由城南黃桂蘭劉朝  
幹由城西分進唐殿魁在後接應馬隊由旁抄  
擊賊遂駭潰擒斬三百餘名追至單縣之雞黍  
集是日張樹珊已與劉銘傳函約會勦由碭山

至豐縣十里外趙家集卽遇馬賊數百張樹珊  
派閃鳳來馬隊擊之賊縱騎遁去十二日追至  
豐縣西關外甯家莊探知大股將至紮營甫定  
馬賊由西北紛來圖偪我營張樹珊先令閃鳳  
來在前誘敵午刻派各營分路迎勦自率開花  
礮隊接應賊漸回遁追至距豐縣十八里之橫  
隄賊整隊回撲爲開花礮轟斃無數賊勢不支

竄孫寨東北是夜賊方駐足張樹珊令各營乘  
勝急追至豐縣東南張武樓探知馬步大股麕  
聚仍分三路一擁而上賊不及備惶遽奔逃我  
軍盡力砍殺僅逸去馬賊數十騎計共斃賊千  
餘名生擒悍賊二百餘名救出難民無數據獲  
賊供稱任賴二逆爲我軍截斷任向北竄賴向  
東南劉銘傳復於十三日追至豐縣北四十五

里之渠家寨賊適攻寨聞信東走遂併入沛縣  
湖團臣現檄催劉銘傳由西路張樹珊潘鼎新  
由北路約期齊進並令李昭慶調到濟甯馬隊  
四營步隊三營會合徐城留防各營馳往迎勦  
以圖夾擊之效均奏入

上命軍機大臣傳諭官文曾國藩李鴻章吳棠張之  
萬閻敬銘曾國荃李鶴年趙長齡曰劉銘傳潘鼎



新兩軍九月閒在鄆城等處盡力追賊屢獲勝仗  
所有在事出力人員著曾國藩歸入前案彙保曾  
國藩令劉銘傳潘鼎新張樹珊馳勦東路股匪鮑  
超劉秉璋楊鼎勳劉松山專辦西路股匪本日據  
李鴻章奏劉銘傳等於豐縣追勦將任賴二逆截  
斷任向北竄賴向東南劉銘傳復追賊至豐北之  
渠家寨賊遂併入沛縣湖團李鴻章現檄劉銘傳

等約期會勦卽著督飭諸軍合力勦滅此股以收  
夾擊之功西路賊股已至同朝華陰節經降旨令  
鮑超入關未知該提督現抵何處曾國藩以該逆  
股到陝無從覓食數月後又將回竄不知陝之朝  
邑韓城等處尙多完善地方陝境兵力單薄若無  
大枝勁旅援應恐關內益遭蹂躪爲患滋深著卽  
嚴催該提督遵照連日所奉諭旨取道入關探賊

所向痛加勦洗勿再遷延干咎劉秉璋等軍能否  
入陝與鮑超一軍互爲聲援並著酌度調遣內鄉  
鎮平等處著李鶴年派兵嚴防回竄郟西二竹一  
帶官文曾國荃督飭派出各軍妥爲防勦曾國荃  
應否至襄陽一帶駐紮以圖迎勦並著酌量具奏  
山西河防前諭趙長齡督飭陳湜增兵防守著傳  
諭該臬司督率兵勇晝夜嚴防如應調兵添勇卽

當趕緊辦理毋惜小費而誤大局曾國藩以病未能痊請開各缺在營效力另簡欽差大臣並請暫行註銷封爵覽奏深用馳念該大臣勲望夙著積勞致疾自係實情著再賞假一箇月在營安心調理欽差大臣關防著李鴻章暫行署理曾國藩俟調理就痊卽行來京陛見一次以慰廑系朝廷賞功之典具有權衡該大臣援古人自貶之義請暫

行註銷封爵著毋庸議李鴻章接署欽差大臣湘  
淮各軍均歸節制必須迅將東股辦竣方可騰出  
兵力專意西路卽著通籌全局妥爲辦理應否移  
紮豫境適中之地並著酌量奏聞吳棠諒未起程  
著專辦淮徐一帶防務並派兵協剿竄入湖團股  
匪俟此股賊衆殄滅淨盡再行馳赴新任張之萬  
何時到淮著將漕河各務認真經理並著飭裏下

河各州縣嚴防竄匪入境勿稍疏失湖團地方偏  
近東省閩敬銘當派兵協剿毋令闖入東境仍隨  
時籌辦河防不得稍有懈怠

上諭內閣曰山東布政使丁寶楨前因髮捻竄擾所  
轄境內未能助剿降爲四品頂戴比年以來逆匪  
屢圖東竄巡撫閩敬銘出省督剿該藩司布置省  
城防守事宜均屬妥協尙知奮勉丁寶楨著加恩

賞還二品頂戴

二十五日庚戌吳棠奏言本年自夏徂秋臣瘡疾

甚劇交冬將次就痊醫者謂經年氣血受傷仍須避風靜攝方可就道合無仰懇

鴻慈俯准賞假兩月調理再臣原籍安徽盱眙屢遭兵燹瞻望松楸時深感愴仍懇

恩俟假滿後另給假二十日繞道盱眙回籍省墓卽

由滁州六合渡江赴浙斷不敢稍事稽延奏入  
上諭曰吳棠著遵奉前旨專辦淮徐防務卽在營調  
理毋庸給予假期俟防務事竣再行賞假二十日  
回籍省墓假滿卽行赴任

吳棠又奏言欽奉

諭旨飭將抗拒官兵之已革知縣陳繼煥等審訊遵  
查四年三月間捻匪由東省竄入贛邑西南鄉



二十四日大股虜至偏近城垣陳繼煥卽會同  
在城員弁督率兵練上城防守一面傳諭各圩  
紳董聯絡保衛是時練丁張幹楊存跟隨練長  
魏清上城防守西門馬步各匪屢次撲城陳繼  
煥日夜督軍固守該匪無隙可乘扮作官兵屢  
向哄誘均經開礮擊退二十五日僧格林沁統  
兵追勦抵境陳繼煥先期未奉飭知又因守城

契緊無從探悉嗣後僧格林沁派弁持令至城  
前傳話守城士民仍疑是匪假扮不肯開城又  
放礮轟擊並有鄉民獲送形跡可疑二人訊明  
雙和富明係僧格林沁大營兵勇因在鄉買物  
誤被獲送正申查聞陳繼煥接奉僧格林沁札  
調赴營士民疑懼哀求堅留二十六日陳繼煥  
委縣丞劉清漣等縋城代謁適有弁兵又至城

前喊令開城士民愈懷疑懼仍指爲匪魏清及  
張幹等先後開槍各傷一人迨劉清漣等回城  
備述前奉令札實係僧格林沁所發並傳諭趕  
緊辦糧陳繼煥卽曉諭士民釋疑二十七日辦  
糧出城並送營勇雙和等歸隊維時僧格林沁  
已拔營追剿出境此案已革前署贛榆縣知縣  
陳繼煥因捻匪竄撲督練守城不知僧格林沁

到境情尚可原迨經派員持令札傳爲士民堅  
留致未卽時往謁究非尋常疏忽可比業已革  
職應毋庸議練長魏清等隨同守城疑匪開槍  
打傷弁兵實非有心致死惟軍火傷人非他物  
可比未便置之不問除魏清業經病故外張幹  
楊存應請各發雲貴兩廣煙瘴少輕地方充軍  
奏入得

旨刑部議奏旋經刑部議覆均應如該督所奏辦理  
上從之

二十七日壬子劉長佑奏言據臬司張樹聲等先

後稟報捻逆前次東竄搶渡運河經官軍擊退  
分竄黃河柳園等渡口均經直省水師副將龔  
文林等開礮轟擊斃賊多名餘逆帶傷潰走其  
大股循隄西竄至鄭州中牟一帶被官軍追及

悉數南奔賴汶洸任柱股匪因與張逆不睦仍  
折而東經過東明縣境分撲金隄集寨該團紳  
等悉力守禦並督勇出寨衝擊當斃賊目三名  
餘賊向東南潰奔現復由江南豐縣回竄山東  
之金鄉魚臺等處曹州東北又見邊馬其張總  
愚一股極意西竄聞已擾入秦境猶思赴渭渡  
黃圖竄晉省臣查該逆東奔西突飄忽靡常今

豫東湘淮各軍或跟蹤緊躡或分投夾擊該逆  
計窮勢蹙尤虞其鋌險撲河轉瞬河淤凍結礮  
船難於駛行沿河各岸益當嚴密布置以備不  
虞臣惟有嚴飭張樹聲陳鳴志等率領在防水  
陸各軍實力堵剿奏入

上諭曰著督飭在防員弁嚴密堵剿不准稍形疏懈

二十八日癸丑李鴻章奏言臣聞任賴等股併入

沛縣湖團催調各軍兜擊詎該逆狡猾異常因湖團近水恐爲我軍所蹙十月十五日復由新團邊界回竄金鄉劉銘傳遇於姜家樓卽整隊追擊賊從旁路狂奔馬隊追及於魚臺舊城小有斬獲十六日由程莊南竄劉銘傳又追及之賊乃分股回繞我後劉銘傳當派唐殿魁等西擊任逆劉盛藻等東擊牛賴等逆其馬賊先爲



張景春等擊敗劉盛藻督隊迎擊甫開槍礮賊  
卽潰奔任逆亦欲撤走唐殿魁等躡跡猛追斃  
馬賊十餘名賊分兩路南趨至豐縣之龔橋十  
七日劉銘傳抵豐縣賊又折向東北山魚臺竄  
至金鄉羊山一帶潘鼎新於十九日在魚臺縣  
北迎剿獲勝仍與劉銘傳張樹珊分路進追惟  
東徐交界地勢平曠無險可扼賊情雖漸窮蹙

往往避兵急走我軍馬隊過少偶一追及交臂  
旋失幸運河防守尙嚴又有重兵跟蹤堯勦該  
逆計不得逞恐又他竄臣已飭劉銘傳等往東  
境追逐李昭慶帶隊暫駐豐縣由南路堯扼俾  
收夾擊之效奏入

上諭曰逆蹤現竄金鄉羊山一帶著飭劉銘傳等軍  
馳入東境跟蹤堯勦毋任狂竄

三十日乙卯署西安將軍副都統穆隆阿西安副

都統圖明額奏言十月初間突有大股捻逆由河南直趨潼關繞由南原竄至華陰華州當經

撫臣劉蓉檄調西路兵勇赴東援剿昨據探稱我兵在華州北門外與賊接仗擒斬多名逆勢稍卻然大股仍在華陰及南原山邊盤踞查此股捻匪若不大加懲創深虞旁竄使我首尾不

能相顧刻下甯夏防務已鬆合無仰懇

天恩飭穆圖善令金順督帶本起馬隊兼程來陝協  
同勦辦擒匪以期迅掃逆氛其布置城防稽查  
出入臣等責無旁貸業已嚴爲備禦並派兵駐  
紮教場無論何處緊急卽赴何處策應奏入

上命軍機大臣傳諭曾國藩李鴻章穆隆阿圖明額  
喬松年劉蓉曰擒逆竄入陝境若無大軍助勦任

賊久踞爲患不可勝言著曾國藩李鴻章迅催鮑  
超等軍剋期入關相機勦辦陝省回民固宜防範  
值此外匪竄入之時但當示以誠信不可使之疑  
懼著劉蓉會同穆隆阿圖明額不動聲色暗爲防  
閑毋令變生肘腋喬松年現在行抵何處陝省軍  
情如此喫緊該撫當兼程前進豈可觀望徘徊希  
圖委卸著卽迅速赴任會同劉蓉妥爲經理陝省

情形喬松年自不如劉蓉之熟悉喬松年到後劉  
蓉仍當實心籌辦隨時奏報喬松年不得稍形掣  
肘甯夏防務雖鬆金順馬隊難再抽調穆隆阿等  
所奏著毋庸議

欽定剿平捻匪方略卷二百六十二 丙寅年

十一月初一日 丙辰 李鴻章奏言欽奉

諭旨曾國藩著再賞假一箇月在營調理欽差大臣

關防著李鴻章暫行署理仰蒙

聖慈簡畀

訓示周詳欽感之餘培增惶悚伏念 臣 一介庸儒毫  
無知識前在蘇省薄立寸功猥蒙

中央民  
學院圖書  
館藏書

厚賞夙夜懷慙茲復奉

命接署

欽差大臣 臣智術短淺實難勝此艱鉅惟當此軍情  
孔急若再三堅辭恐無以仰體

宵旰之憂勞謹就目前局勢有必須豫爲籌度者有  
不敢豫爲限制者爲

皇上一一陳之上年九月奉



旨令臣帶兵馳赴河洛臣卽恐一離本任則糧餉軍  
火均無所出當將可慮三大端據實覆陳年餘  
以來曾國藩在前督師臣在後籌餉患難與共  
休戚相關雖士馬未盡飽騰而臣之心力實已  
交瘁怨謗亦所不辭自臣來徐甫踰一月後路  
糧餉轉運相隔漸遠每恐呼應不靈若再逐賊  
出境遠駐豫省軍務大局未必遂能有濟而各

軍餉需必多貽誤 臣從軍十數年稔知軍情利  
鈍之由其樞紐不在賊之難辦而在糧餉軍火  
之難接濟曾國藩老病侵尋自萌退志 臣每諄  
切懇勸謂若不耐軍事之勞頓卽請回任籌餉  
坐鎮要區彼亦以勦捻全軍專恃兩江之餉若  
經理不得其人全局或有震撼與 臣再四密商  
意見相合是不得不仰懇

朝廷之善爲區處矣今

諭旨並未令人接辦江督而詢及應否移紮豫境  
臣若至豫省離江甯千餘里離蘇滬千數百里軍  
儲之調發未有不遲誤者

皇上若仍令臣兵餉兼籌須以駐紮徐州而止若專  
責臣以討賊則進駐別省卽不能兼管地方軍  
需缺乏責之何人此必須豫爲籌度者也至捻

逆久成流寇而臣軍馬隊太少不及賊馬之多  
蓋賊敗後拔隊急走日百餘里我軍步隊至速  
七八十里賊隨地擄糧我軍須齎糧而行現各  
軍略置車駝齎糧不過旬日旬日之後就地採  
辦而賊過處人煙荒涼往往停留三四日不能  
謀一日之食我停一日賊去已數百里此勦擒  
追賊之苦前親王僧格林沁所統馬隊尙多而

仍屢蹶不振者職是之由曾國藩接手後有鑒於此故始則設立四鎮旋議扼守運河沙河使地勢收窄較易兜勦目下運防水深隄密尙可扼住冬春淺涸尤須加意其賈魯河沙河地段太長人力難齊終辦不成爲今之計自應用謀設閒徐圖制賊或蹙之於山深水複之處棄地以誘其入然後各省之軍合圍困之或陰招其

飢疲裹脅之衆使之內亂否則投降免死給資  
遣回以解散其窮蹙致死之心而離其黨與或  
另有設守致困之法容臣與湘淮諸將帥及各  
省督撫相機妥籌軍事隨時隨地變幻無常此  
不敢豫爲限制者也至任賴等逆東竄之股蓄  
意撲運河不動卽下竄清淮經劉銘傳潘鼎新  
張樹珊各軍分路兜擊該逆已於十月二十三

日由鉅野西北竄去似向鄆城一帶劉銘傳等亦跟蹤而進趁地勢以圖夾擊惟前有黃河水套之阻西南出曹考地勢散漫無可控扼恐仍由此入豫或回永碭均未可知准曾國藩來咨已派劉秉璋周盛波兩軍東來如能早到當飭會合兜剿以厚兵力而期聚殲

李鴻章又奏言據潘鼎新稟稱十月十六日由

金鄉劉家樓追賊至魚臺舊城賊在豐境相距  
二十餘里十七日賊由豐北回走適該軍自東  
而南至瞿家莊與賊大股相遇直前奮擊截賊  
隊爲數段總兵方有道直入賊中專搏賴逆已  
奪其坐馬乃中槍陣亡賴逆得脫仍由金鄉邊  
界竄回魚臺東北十八日復敗之於羅官屯十  
九日由孫家橋一路進追賊將由唐堍集北奔



濟境我軍攔頭迎截賊見兵少乘勢猛撲我軍  
悉力進戰自辰至午賊屍徧野追至徐家店賊  
步隊撤遁馬賊尙踞大莊不動我軍繞後痛  
擊殲斃悍賊甚多賊由西南奪路狂奔此潘鼎  
新一軍十七至十九日戰勝情形也張樹珊一  
軍於二十二日與劉銘傳合軍追賊至鉅野西  
北探知賊已竄往鄆城查疊次陣亡總兵方有

道守備袁正泰千總侯鳳德把總劉日清均請  
旨飭部照陣亡例分別從優議卹

李鴻章又奏言欽奉

諭旨飭吳棠專辦淮徐防務俟此股賊衆殄滅再赴  
新任並令張之萬督飭裏下河各州縣嚴防竄  
匪入境伏思今日勦捻機宜往往不能應手皆  
由各督撫自有兵將自行進止難得呼吸一氣

若清淮距徐僅三四百里既有督臣在徐又有鄰省督臣專辦防務又有漕臣督飭州縣嚴防事權不一號令歧出文武兵弁無所適從臣愚以爲將來臣卽偶爾赴豫赴東但擇一大將辦理淮徐運防妥籌布置設賊警漸近再另調大枝游擊之師跟追而牽制之臣仍往來其閒督率調度免得多添一帥索餉爭兵致生意見所

集賢堂  
有吳棠向籌地方之餉均歸臣處撥用以免紛  
歧吳棠部下現實無整枝勁旅可當一面者亦  
無可調派協勦可否

飭下該督臣假滿後迅赴新任俾專責成又奉

諭旨以西路賊股已至同朝華陰嚴催鮑超取道入

關臣前准鮑超函稱探悉陝地無食賊欲仍竄  
湖北覓糧過冬該營因餉解不到兵勇凍餓堪

虞仍率隊由洛汝回紮南陽昨准會國藩咨稱  
據南召縣稟報賊欲竄鄖陽過冬老湘營劉松  
山稟報入秦之賊已回竄盧氏霆軍仍應在豫  
鄂防剿不必遽行入秦且入秦之後銀米子藥  
萬難接濟各等語想會國藩必已據實覆陳臣  
維嶠函古稱天險秦中徧處榛蕪賊似無可留  
戀萬一深入與甯州踞回東西相距二千餘里

有劉蓉支柱其閒豈能遽合既無從掠食則終  
必回竄鮑超軍勢浩大入關後糧運艱難恐生  
意外之變仍宜留在豫鄂有曾國荃李鶴年爲  
籌轉運必可得力應請

旨勿庸嚴促於西路全局有裨臣又習聞劉蓉軍事  
老練撫秦數年諸資整頓所統湘勇三十餘營  
分守要隘如臂使指際此軍情緊急似難遽易

生手該署撫 臣雖已引疾可否仰懇

聖慈曲逮

降旨慰留 臣爲大局起見冒昧直陳是否有當伏候  
采擇

李鴻章又奏言 臣督勦捻逆亟須添練馬隊倉  
卒採辦苦無良騎若派員出口冬令雪深爲期  
已誤查察哈爾商都太僕寺牧羣及理藩院所

屬內外各扎薩克蒙古捐輸馬匹爲數甚多可  
否請

旨飭下察哈爾都統督率該總管等擇其肥壯口輕  
堪以乘騎打仗者挑選一千匹仍交上次解馬  
來營之佐領何布登額等三員分起管解迅速  
來營以資熟手仍請

旨飭理藩院於各扎薩克蒙古捐輸馬內酌撥五百



匹派員併解來營 臣當督飭各將領認真訓練  
以期早蕩寇氛奏入

上命軍機大臣傳諭曾國藩李鴻章劉長佑吳棠閻  
敬銘李鶴年喬松年劉蓉曰李鴻章奏剿賊大略  
情形本日已明降諭旨令曾國藩回兩江總督本  
任授李鴻章爲欽差大臣專辦剿匪事宜該大臣  
膺此重任自當益加奮勉以竟全功曾國藩回任

後可暫緩來京陛見卽在江甯安心調理俟賊勢稍平再行奏請該督在省坐鎮前敵軍餉自不難從容辦理李鴻章必不致有掣肘之慮劉銘傳等軍已於金鄉等處各獲勝捷賊雖逸去其膽已寒著李鴻章督飭諸軍認真追剿勿任旁竄陣亡之總兵方有道守備袁正泰千總侯鳳德把總劉曰清均著交部照陣亡例分別從優議卹賊竄鄆城

距河甚近難保不乘閒北竄著劉長佑闔敬銘嚴  
飭在事文武各員弁認真防守勿令一賊偷渡闔  
敬銘並須派隊攔截與劉銘傳等追師聯絡聲勢  
以資得力李鴻章俟此股賊匪剿盡再行酌量移  
營進紮吳棠諒已痊愈著賞假二十日回籍省墓  
卽赴新任吳棠所部兵勇均歸李鴻章節制調遣  
以一事權東賊恐由鄆城曹州仍竄豫境蘭考一

帶李鶴年飭軍迎截河南省城防務著李鶴年督同藩司卞寶第等妥辦如該撫須出省督師省城防務卽交卞寶第認真經理西竄之賊仍在華陰一帶盤踞逼近省門劉蓉穆隆阿等屢次請兵援剿是以令鮑超一軍入關該提督不知已抵何處劉蓉雖係知兵所轄各營亦復不少而此大股悍賊一意西行回捻交乘兵分力薄實屬支持不易

鮑超已否入關抑或另派援軍入秦助剿卽令鮑超於楚豫境上防賊回竄著李鴻章酌度情形仍與曾國藩隨時籌商妥辦務期萬全無失未可謂陝省有備遂可置之膜外也喬松年諒已到陝卽著與劉蓉妥籌防剿之策劉蓉須俟此股賊衆擊退陝防無恐方准卸肩李鴻章請調察哈爾等處馬匹已諭知理藩院察哈爾都統等照數調撥矣

上又命軍機大臣傳諭理藩院裕瑞玉亮曰李鴻章  
現在駐軍徐州督勦捻逆亟須添練馬隊著裕瑞  
玉亮於察哈爾商都太僕寺牧羣內挑選馬一千  
匹擇其肥壯口輕堪以乘騎打仗者仍交上次解  
馬赴營之佐領何布登額等分起管解速赴李鴻  
章軍營不准以瘦弱充數並著理藩院於各扎薩  
克蒙古捐輸馬內酌撥五百匹派員併解李鴻章

軍營

上諭內閣曰曾國藩著回兩江總督本任暫緩來京  
陞見李鴻章著授爲欽差大臣專辦剿匪事宜

初二日丁巳張之萬奏言臣於九月二十一日自

汴起程由東境陸路行至臺莊登舟順流而下  
察看江境邳宿桃三州縣圩牆經夏閒大雨坍  
塌過半現在分段補築將次蒞功其清淮各軍

經吳棠飭各鎮將水陸分紮極爲嚴密至桃源南岸之成子河爲清淮最要門戶臣親至該處詳加察度圩牆均各完整防兵亦甚嚴肅惟西南濱臨洪湖現當湖水消落涸灘竟有五六里之遙當飭在防將弁於該處挑挖深濠以資備禦伏思清淮當四達之衝裏下河完善之區賴以屏蔽而兵單餉絀籌措極難臣抵浦後接晤



吳棠詳細咨詢一切悉循其舊以後軍情如有  
變遷自當隨時相機措置總期力圖捍衛共濟  
時艱連日接據探報捻蹤尙在豐魚一帶 臣擬  
稍爲部署卽赴徐州與李鴻章籌商一切奏入  
報

聞

同日英翰奏言 臣前赴太和料理防務後卽馳

往周家口與曾國藩晤商一切維時張逆一股  
尚在豫境故於槐店一帶酌留郭寶昌等軍觀  
釁而動十月十六日由周家口回潁州途次接  
據探報前竄山東任賴等逆東擾豐縣碭山一  
帶復折向金單四出紛撲而張逆入秦一股盤  
踞商州境內勢向南趨將擾楚境臣體察情形  
雖西北兩路均距皖境尙遠但任逆等股剽疾

異常往來靡定蒙亳爲捻匪故巢尤宜嚴備當  
調郭寶昌一軍由槐店移紮蒙城提督黃秉鈞  
一軍移紮徐州之湖溝而以同知方長華一軍  
移紮蒙城之西洋集西應亳雉之軍北聯徐州  
之隊以期周密臣俟清釐緊要公務完竣後卽  
親赴蒙宿一帶察探賊蹤相機布置奏入

上諭曰著卽督飭郭寶昌等嚴防蒙宿一帶與徐州

嘉雉等軍互相聯絡該撫將地方公事稍爲清理  
卽親赴前敵察看並多設偵探防賊回竄老巢不  
可稍涉疏忽

初三日 戊午 閻銘敬奏言捻逆任賴各股竄擾曹

濟等屬經潘鼎新劉銘傳等軍追剿屢獲大勝  
惟據獲賊供稱逆情窮蹙極思竄突黃運兩河  
等語現計運河各防營均已列堞布置並於河

牆安設礮臺聯絡聲勢仍飭各將弁設法打冰  
密布椿柵以爲憑守至黃河之防一至嚴寒河  
冰卽凍結成橋去歲設船打冰而隨鑿隨合力  
無可施茲擬自張秋鎮至范縣豆腐店東省應  
防汛地多撥兵勇併力據守查提督傅振邦道  
員衛榮光所部共有四千餘名均在北岸趕築  
河牆又總兵趙三元所帶礮船水師六營均泊

黃河天凍之時礮船無所施展飭將各船挽入  
內河安放船上礮座一律調赴黃河北岸自張  
秋至豆腐店每里設礮臺二座協同陸營駐守  
以爲防黃之計惟期仰賴

天威冬防鞏固一俟春融再行派隊出勦庶免疏虞  
至賊蹤肆竄尙無定向現有劉銘傳潘鼎新張  
樹珊三軍與之角逐尙可力加勦擊

閻敬銘又奏言 臣渥荷

天恩賞假一月在營調理查 臣於九月二十一日具  
摺請假是日下午捻股卽突至運岸堵剿數日  
捻氛稍退旋有黃崖之變內外交訁事在倉猝  
不敢不力疾視軍一月以來不惟不能調養焦  
慮奔馳較前倍甚現在軍務方殷而 臣病日深  
不能巡視營壘稽查將弁並文檄案牘亦不能

閱辦軍事非可臥治設有貽誤負疚滋深仰懇  
天恩准 臣 開缺俾得安心調理山東巡撫員缺懇

恩迅賜簡放以重職守如新任之員尙在遠道並求  
簡員先行接署辦理目前軍務 臣 如仰蒙

福蔭或得就痊仍當勉效犬馬上報

主恩

閻敬銘又奏言布政使丁寶楨帶兵有年打仗



勇往賦性明直東省將弁多係本地隨時錄用  
非臣舊有部曲往年勦賊皆爲丁寶楨統帶且  
有前隨丁寶楨來自湖南者山東各軍實與丁  
寶楨相習現在軍務爲要人才難得用人行政  
聖心自有權衡非臣下所敢妄言謹陳該司品地伏  
祈

聖鑒奏入

上命軍機大臣傳諭閻敬銘丁寶楨曰任賴等股逆  
匪在曹濟等屬竄擾屢經劉銘傳潘鼎新各軍追  
擊屢勝該逆蓄意渡河現經閻敬銘將運黃兩岸  
嚴密設防並於黃河林立礮臺布置頗爲嚴密該  
撫以軍務積勞病勢增劇懇請開缺本日已明降  
諭旨賞假三箇月並令丁寶楨暫署山東巡撫矣  
丁寶楨接奉此旨卽著馳赴東平接辦防務督飭

在營將士振刷精神力籌守禦闔敬銘俟丁寶楨到營後卽回省城安心調理假滿後仍出任事毋庸開缺以副委任

上諭內閣曰闔敬銘著賞假三箇月安心調理山東巡撫著丁寶楨暫行署理

初四日己未李鶴年奏言據西路探稱捻匪盤踞

華陰廟又由華陰華州等處向西竄擾經陝軍

擒斬甚多大股退向華潼一帶等語查潼關距豫省闕鄉止六十里關入甚近且茅津太陽各渡口密邇三門時交冬令冰結成橋晉省雖有防兵恐不能兼顧南岸 臣先期派總兵保英率豫勝四營馳往陝州聯絡晉軍合力防堵如賊由大峪口一帶回竄卽可就近扼守險隘至東省股匪據報十月二十三日竄至荷澤二十五

日賊騎至曹縣金隄頭等語 臣檄宋慶一軍及善慶馬隊馳赴睢杞一帶探蹤迎勦查現在東西兩路戰守均關緊要 臣惟當督飭將弁會合各路遊擊之師與扼防之隊聯絡聲勢乘此賊分勢蹙以期合力兜除奏入

上諭曰西路賊匪旣退向華潼一帶距豫晉甚近著卽嚴飭保英聯絡晉軍合力防堵不得稍有疏忽

東路股匪卽飭宋慶等探蹤迎剿以杜回竄

初五日

庚申

劉蓉奏言捻逆竄踞華陰及南原潼

峪嵩峪一帶蔓延七八十里時思北渡渭河竄  
擾同朝疊經山西所派防渭各師會同朝邑民  
團沿河堵剿焚燬該逆所造木筏疊有斬獲維  
時副將彭體道駐擡頭堡遊擊陳照台駐五方  
村相距十餘里文報不通十月初四五等日該

逆分股圍攻兩堡彭體道等依堡轟擊殲賊數十名初八日提督劉厚基率兵行抵渭南之赤水鎮猝與賊遇鏖戰多時因賊衆兵單未能前進仍折回渭南初九日劉厚基挑選奮勇夜襲赤水鎮踞匪斬獲不少該逆卽於是夕遁去是日彭體道陳照台亦各將撲營之賊奮力擊敗初十日臣所調隴邠防軍副都統西蒙克西克

等各率馬步隊相繼到省 臣慮各軍心力不齊  
復委知府唐炯總理行營籌商進剿機宜又派  
道員呂儁孫督辦各軍糧運並調提督蕭集山  
總兵王九齡兩營由鳳翔駐紮渭南保護後路  
糧道各將領當卽率師陸續進發適副將孫立  
士由亳州招募馬步各一營亦於初十日行抵  
潼關當飭暫駐關外相機防剿十四日蕭德揚



西蒙克西克等行次華州十五日該逆馬步大  
股來攻州城經唐炯會商諸將四面截擊各軍  
鼓勇直前無不以一當百賊向東北狂奔我軍  
追殺十餘里斃賊五六百名十八日劉厚基等  
會合邱時成進紮太和鎮湘果彝字等軍亦進  
紮北洛村是夜唐炯與諸將會議以蕭德揚率  
湘果軍居左西蒙克西克率吉林黑龍江馬隊

居右黃鼎率彝字全軍居右三路並進十九日  
黎明蕭德揚拔隊先發西蒙克西克黃鼎等繼  
進行至敷水河遙見溝東樹林內賊蹤密布蕭  
德揚等列陣以待該逆傾巢而出四面包裹復  
縱馬賊橫衝將我軍截爲兩段湘果弁勇死傷  
七八百人蕭德揚西蒙克西克等各率親兵衝  
突日暮始得潰圍而出黃鼎亦於是夕二鼓全

師而歸當各軍之被圍也該逆復分股攻樸北  
洛村營壘唐炯兩次督勇擊退黃鼎蕭德揚等  
仍紮北洛村劉厚基彭體道等仍紮太和鎮尙  
與該逆相持臣復調邠州防回之鄆太愚楊得  
勝洪殿元馬步各營撥赴東路會剿惟渭華一  
帶曠野平原向屬用衆用騎之地賊馬萬騎疾  
如風雨實非步隊所能制勝查鮑超劉秉璋等

軍業於十月初開行抵盧氏閩鄉一帶逮聞張  
總愚等已入陝境鮑超退回南陽劉秉璋亦折  
趨新鄭雖荷

諭旨屢次催令入關迄無音耗 臣頃接鮑超覆函謂  
探聞賊意欲竄湖北擬率所部赴宛南迎擊是  
該提督竟無西來之意陝省現有兵力萬不能  
支合無籲懇

天恩嚴飭鮑超所部霆軍迅速入關會勦以支危局  
至此次補用提督漢中鎮總兵蕭德揚失律喪  
師雖由衆寡不敵而恃勇輕進究難辭咎相應  
請

旨將蕭德揚撤銷提督並摘去翎頂以示薄懲至西  
蒙克西克等爲湘果軍牽率致敗請免置議

劉蓉又奏言深報楊鼎勳一軍早到陝州劉松

山一軍亦抵內鄉皆去陝境甚近惟劉秉璋一  
軍有折回新鄭之說鮑超旣無意入關伏乞

飭下曾國藩改撥劉秉璋楊鼎勳劉松山三軍來陝  
會勦劉松山卽由商州前進劉秉璋楊鼎勳卽  
由潼關前進當較迅速此時張逆專恃馬賊馳  
騁若能併力會勦扼諸潼關之南原潼峪嵩峪  
一帶澗谷之閒則逆衆無所施其馳突或可全

數殲除即使逸出豫境仍令鮑超分扼閩鄉盧氏及浙川之荆子關等處截其去路亦不難悉數聚殲

劉蓉又奏言捻逆張總愚現踞華陰復分布悍黨盤踞迪南及華山廟等處地偏渭河同朝各屬實形喫緊臣前請

旨飭山西撫臣添設風陵渡至龍門一帶河防原慮

該逆撲過渭河偷渡晉境嗣經山西臬司陳湜  
派撥礮船駛赴三河口一帶梭巡防護並親赴  
各處督同朝邑紳團嚴備北岸疊有斬獲卒能  
扼賊竄犯同朝之路防河不如防渭實爲要策  
惟渭河水淺天寒易凍非礮船所能爲力民團  
非仗兵威心志每難自固陝中兵力太單無可  
抽撥 臣現函商陳湜派撥步隊四營分紮渭水



北岸以壯民團之氣並令將礮船上下巡駛敲  
擊河冰庶水陸相依兵團協力以保同朝門戶  
以固晉省邊陲奏入

上命軍機大臣傳諭曾國藩李鴻章趙長齡李鶴年  
喬松年劉蓉曰漢中鎮總兵蕭德揚恃勇輕進致  
有損傷著撤銷提督並摘去翎頂以示薄懲著劉  
蓉隨時察看如仍不得力卽行嚴叅懲辦捻逆仍

在華州一帶卽著督飭劉厚基等相機進剿至鮑  
超一軍旣未入關著曾國藩李鴻章檄飭劉松山  
一軍由商州前進劉秉璋楊鼎勳兩軍由潼關前  
進如能扼之於潼關南原潼峪嵩峪澗谷之間當  
可痛殲醜類卽催該提督等分道迅進毋得遲延  
觀望鮑超一軍卽令分扼閩鄉盧氏及浙川之荆  
子關一帶務須痛加剿洗勿再與賊相左致誤戎

機喬松年曾否到陝著與劉蓉隨時籌商並將省  
防妥辦陳湜辦理河防奮勉可嘉劉蓉請令該臬  
司派步隊四營分紮渭水北岸並令將礮船上下  
巡駛敲擊河冰著趙長齡卽傳知該臬司妥爲照  
辦務期兵團協力水陸相依不可稍涉疏懈豫境  
邊防李鶴年當督飭各軍認真堵截

中興  
集古圖  
卷之三

欽定剿平捻匪方略卷二百六十三

丙寅年

十一月初六日辛酉李鴻章奏言十月二十一日

劉銘傳追賊至金鄉之羊山令劉盛藻等分路  
抄擊賊悉奔逃張景春率馬隊追至戴義集賊  
竄鉅野城南二十二日賊走鄆城之武安集張  
樹珊馳抵葛店與劉銘傳合軍追至鉅野二十  
三日賊走曹州境之郭明日二十四日我軍追

及之賊隊正向北竄探見兵到復折而南先有  
馬賊數百竄至濮州適遇官軍橫截擒獲百餘  
名餘衆悉爲民寨殺盡二十五日賊由曹州竄  
至定陶城東之土店劉銘傳等會議以兵落賊  
後必趕走百里出其不意攻之遂一日馳抵定  
陶劉盛藻唐殿魁由東進擊劉銘傳張樹珊由  
西進擊直闖賊館賊已結束將行邊館之賊悉

被殲殺餘賊乘暗奔逃我軍一齊猛追二十六  
日劉盛藻唐殿魁追及曹縣之孫老寨正值任  
牛二逆率黨喘息我軍猛進復棄輜重南奔張  
樹珊追至曹縣遇賴逆繞城南走當令劉克仁  
等率隊進擊劉銘傳復飭黃桂蘭等迎頭截之  
殲斃不可勝計生擒賊酋十數名悍賊數百名  
賊眷數千口餘賊復爲民圩截殺逆首賴汝洸

僅率數十騎向南遁去餘黨數百名棄械乞降  
劉克仁等復追至土岡集擒獲賊首楊大阜餘  
賊遂狂竄豫境歸德西南一帶被官軍追急狼  
狽不堪日行幾二百里獲賊供稱該逆等圖竄  
光固就糧臣查擒逆任賴等股自九月二十日  
以後復窺東境屢撲運河旋由梁山南竄金魚  
豐沛欲犯清淮經我軍往來緊蹙每戰必挫計



不得逞又盤旋曹濟前後已及一月始潰逃入  
豫若南走光固則皖豫鄂交界趨向不定宜乘  
其餓走窮困合力蹙之臣在北路相距較遠已  
飛咨李鶴年英翰曾國荃各就近派兵攔截仍  
飭張樹珊李昭慶周盛波等分道西進一面扼  
其北竄劉銘傳潘鼎新所部馳逐數月疲乏過  
甚擬令劉銘傳暫駐周家口略爲休息仍會商

李昭慶料理沙河防務潘鼎新暫回濟甯休息  
均相機再圖進剿此次各軍忍飢耐寒日無停  
趾一月之中先後敗賊二十次使該逆一日未  
息一寨未破黨衆折損其半尙屬著有微勞其  
出力員弁容 臣查明彙案保獎

同日張之萬奏言據報捻逆被擊回竄屢次闖  
入徐州府屬之豐沛碭山等縣現復由魚臺北

竄等情竊思豐沛等處圩寨繕完野無可掠且  
有李鴻章駐軍徐州相機兜剿賊蹤斷難久停  
惟裏下河一帶向稱完善賊所垂涎難保不勢  
窮思逞且現當冬令洪湖涸落水面去原築圩  
牆已七八里尤爲難防當飭派防成子河總兵  
張從龍將涸灘處所督率兵練實力興挑務令  
直達洪湖勒限完工以資守禦現據稟報日內

卽可告成並飭將挑出之土加築圩牆一面添  
設營壘安置礮臺臣又派遊擊李紹銘管帶礮  
船於洪湖水面巡防與成子河圩牆礮臺爲犄  
角之勢至裏下河爲軍餉漕糧所出之地尤應  
加意保衛惟裏下河以清淮爲門戶清淮以成  
子河爲門戶能守成子河則清淮安而裏下河  
亦與之俱安然必北運河之防能固而後能守

成子河勢實相倚無可偏重是以吳棠曾國藩  
皆力籌運河與成子河之防聯絡淮軍與山東  
之軍一氣固守蓋深得其要也 臣仰蒙

恩命責無旁貸惟有竭力圖維保全完善均奏入

上命軍機大臣傳諭曾國藩李鴻章張之萬曾國荃  
英翰李鶴年曰劉銘傳等軍由金鄉鄆城曹州等  
處追賊幾於無日不戰先後敗賊二十次斬馘甚

多使該逆一日未息一寨未破實屬異常出力著  
李鴻章查明彙案保獎該逆率其餘黨狂竄歸德  
圖擾光固李鴻章已派張樹珊李昭慶周盛波等  
軍分道西進著卽督飭諸將躡蹤追剿會合豫軍  
先將此股殄盡豫省歸德光固一帶何人駐守李  
鶴年卽飛飭各軍就近截剿勿再任賊狂竄偵探  
爲行軍第一要著往往賊至附近一帶而豫省大

吏或未之前聞則探報不實可知李鶴年務當出  
省駐紮催督諸軍合力辦賊多設偵探豫爲準備  
逆匪如趨光固則竄皖竄鄂均屬甚近曾國荃英  
翰務當激勵防軍力圖迎勦以免闖入完善地方  
此股竄賊勢窮食盡無難合力殄除如各該省派  
出之軍意存觀望不能盡力追勦致賊蹤再有蔓  
延著該大臣督撫申明紀律將玩寇之帶兵官弁

卽以軍法從事如該大臣等調度無方致窮蹙之  
賊死灰復燃卽與縱寇殃民無異國典具在亦不  
能爲該大臣等寬也成子河爲清淮門戶自當趕  
緊興挑務須一律寬深方足以資保衛張之萬當  
與曾國藩李鴻章隨時會籌辦理東賊入豫李鴻  
章自應移營進紮以資控制清淮防務著張之萬  
認真經理



初八日癸亥會國藩奏言西竄之匪十月二十二

日以前臣接各路探報均稱賊將回竄豫鄂自  
二十三日以後探報並無西股回竄之說臣恐  
該逆深入秦境遂於二十七日檄令鮑超統帶  
霆軍由鎮平內鄉浙川進荆子關以達商州入  
秦援勦東路一股劉銘傳張樹珊等軍二十六  
日在曹州接仗獲勝該逆南竄二十八日邊馬

已至太康 臣恐該逆回至豫境又將西竄汝洛  
圖犯秦晉晉省防務僅隔一河陝州之三門茅  
津渡一帶河淺石多冰結成橋若乘閒偷渡蔓  
延晉境尤屬可慮因檄劉松山統帶一軍迅赴  
汝州攔頭截擊遏其西去之路並至陝州三門  
等處與山西臬司陳湜夾河設守力保晉省完  
善之區惟是霆軍入秦湘軍防晉不特秦省米

糧極少有錢無市卽豫省洛陝一帶糧食亦艱  
貴異常臣已函商兩省撫臣李鶴年趙長齡請  
其爲該二軍辦糧並函致陳湜囑其設法多辦  
糧米舟運入涓接濟鮑超一軍陸運渡河接濟  
劉松山一軍不知能源源購運無誤軍食否相  
應請

旨飭下李鶴年趙長齡採辦解濟其糧價運價或由

應協 臣餉項下扣抵或由 臣另籌解還均無不  
可抑 臣更有慮者鮑超軍中向少明幹之員料  
理米糧等事前在皖南由 臣派員辦糧源源接  
濟在江西時各官紳亦竭力助糧全無缺乏故  
能專心打仗所向有功一離江皖至福建者卽  
有上杭缺糧之譁赴甘肅者又有金口棄舟之  
變若入秦以後糧米不繼深恐滋生事端 臣此

次檄調鮑超文內有云如實無米可辦到萬分  
爲難之際亦可中途折回重許以兵行至西安  
省城爲止不再西征仍奏明專剿擒匪不剿回  
匪等語臣蓋鑒於金口之變故特參以活筆豫  
爲維繫軍心之地伏乞

皇上曲賜原諒臣仍一面嚴催鮑超西行得尺則尺  
得寸則寸總期有益秦疆不生他患冀副

聖主眷顧西陲之意

會國藩又奏言正封摺閒據報東路股匪由太  
康竄至陳州所屬之中和寨等處臣派楊鼎勳  
張錫嶸各軍追勦斬擒二百餘人賊蹤直奔沙  
河以南據擒賊供稱任賴等逆將由光固以竄  
鄂境臣意賊旣回竄或南竄光固西竄汝洛均  
未可定且東股縱不竄陝亦恐西股由秦回竄

劉松山一軍仍令由汝洛進兵總以力保黃河  
先顧山西爲重至西路之賊續據陝州閿鄉等  
處稟稱又回竄潼關過西一帶並云已至閿鄉  
境內臣察看情形張逆回竄之說恐不甚確鮑  
超一軍仍令從荆子關一路進兵援秦

曾國藩又奏言欽奉

諭旨該大臣積勞致疾自係實情著再賞假一箇月

在營安心調理欽差大臣關防著李鴻章暫行署  
理會國藩俟調理就痊卽行來京陛見跪誦之下  
感悚莫名查統兵大員非身任督撫有理財之  
權者軍餉必不應手士卒卽難用命臣前以侍  
郎辦賊五年卒無寸功後以江督辦賊四年乃  
有成效深知其中之甘苦現在湘勇及淮北勇  
月餉須七萬有餘淮勇月餉須三十萬有餘李



鴻章或任江督或任蘇撫必有實缺一席乃能  
籌此每月四十萬之巨款一離江南境內則糧  
餉軍火均無所出淮湘軍心立見渙散李鴻章  
旣難離江境則接署關防似可暫而不可久臣  
自問行軍太呆不能平此流寇精力太衰不能  
當此大任一俟霆軍西行就緒病體調理稍痊  
卽當入京

陞見面懇

鴻恩准開各缺並懇於李鴻章外另

簡大臣來豫接辦臣但求開缺以減事權斷不求回  
籍以圖安逸仍留軍營幫同照料一切維繫湘  
淮各軍之心聯絡蘇鄂兩路之氣旣無置身局  
外之想亦免病軀戀棧之譏庶臣之寸心稍安  
而於大局毫無所損奏入

上命軍機大臣傳諭曾國藩李鴻章李鶴年趙長齡  
喬松年劉蓉曰西路捻股竄入秦疆盤踞多日陝  
省兵力本單蕭德揚等勦辦失利該匪若東竄晉  
省西連回逆則蔓延益廣防勦更形棘手值此軍  
情緊急之時自當迅派援軍入關助勦前據劉蓉  
奏請飭劉松山劉秉璋楊鼎勳等軍分由商州潼  
關入陝援勦當諭曾國藩李鴻章檄飭劉松山等

分路入陝並令鮑超一軍分扼閿鄉及浙川荆子  
關一帶現據曾國藩奏稱劉松山一軍已令在汝  
州截擊東股捻匪並至陝州與晉軍夾河設防楊  
鼎勳一軍現在陳州所屬追賊是該二軍能否迅  
速入秦尙未可定鮑超一軍旣由曾國藩檄令入  
陝卽著飭該提督星夜兼程前進總以迅速援秦  
爲主不可稍涉遲疑劉秉璋一軍當可由陝州就

近先入潼關著曾國藩李鴻章迅飭前往總之陝  
省緊要諸軍無論何部務令就近者迅往援剿如  
鮑超能卽入陝應令嚴申軍律毋任將士擾累所  
過地方東路捻股竄至陳郡經劉松山等軍追剿  
獲勝著飭盡力截擊勿令他竄晉省兵力未厚現  
值河凍漸合防務萬分喫緊曾國藩派劉松山一  
軍馳赴汝洛與陳湜所部分防黃河南北兩岸尙

合機宜卽飭星馳前進惟諸軍分赴陝州及關中  
諸處均係糧米極少之區採買維艱著李鶴年迅  
飭豫西各屬地方官速行籌備糧米以供軍食並  
著趙長齡籌運糧米由渭河船運入秦均須源源  
接濟不可稍涉推諉喬松年劉蓉亦當迅儲糧米  
接濟前有旨令李鴻章爲欽差大臣並因軍餉緊  
要特令曾國藩回兩江總督本任籌辦餉需暫緩

來京茲據曾國藩所奏軍需緊要情形與朝廷諭旨相符著曾國藩卽遵前旨將軍務交與李鴻章接辦該督卽回兩江總督本任辦理餉需軍火俾李鴻章得離江境統兵進剿籌餉與剿匪之功均爲國家倚重正不必以開缺赴營始足爲朝廷宣力也李鴻章俟曾國藩回任後辦餉有人卽馳赴前敵軍營就近調度曾國藩公忠體國與李鴻章

同辦一事所有該營餉需軍火自能不分畛域妥  
籌接濟無俟朝廷諄諭也

初十日乙丑閻敬銘奏言賴任逆股於十月二十

三四等日竄擾蒞澤定陶一帶邊馬擾及城武  
二十五日經劉銘傳張樹珊兩軍追及於定陶  
乘夜出勦衝踏賊營數處賊衆驚潰該兩軍漏  
夜追殺直抵曹縣城外兩路分勦斃賊無算二



十六日該逆併股抗拒又經兩軍合剿擣賊中  
堅殲其悍銳數千名並生擒逆首多名該逆向  
南奔竄二十七日潘鼎新一軍亦由定陶南追  
且經沿途民團截殺賊遂不敢回戀東境於二  
十七日全數由豫省睢州竄逸各軍均追躡出  
境日來逆股已向睢州南竄臣查擒逆盤旋曹  
境約四十日經各路援軍剿擊痛挫兇鋒現既

南竄豫疆去東漸遠且有追軍在後一時尙難  
北犯惟時際天寒河防尤爲緊要茲復飭令各  
營將運河之防益加整飭並將沈口一路迅築  
隄牆卽日可成又長溝以南地段原係李昭慶  
所部汎地現屆湖乾冰結之際亦慮地遠人稀  
臣復飭濟甯州就近添設礮臺藉資協守至黃  
河北岸防務尤要昨經奏明有兵勇四千餘名

茲復添調千人以厚兵力自張秋鎮以抵豆腐  
店共計五千人扼守其自張秋鎮以抵沈口原  
係黃河三道汊流嚴寒之際河凍成橋更慮逆  
匪從河內東奔越過運河繞出我軍之後現檄  
提督傅振邦所部千七百人卽在沈口張秋一  
帶河內灘上分立營壘礮臺力扼賊匪繞越之  
路再臣渥荷

天恩賞假回省調理並

飭傳諭丁寶楨馳赴東平接辦防務現在逆氛已遠  
事機稍鬆丁寶楨藩司任內事務繁多若急於  
出省恐有錯誤臣病稍養數日擬將防軍再爲  
布置於初十日回省交卸俾丁寶楨在省接任  
得以從容清交藩司公事至河防事宜各營俱  
有統領約束不至遽生鬆懈俟丁寶楨接印後

酌度緩急出省督防庶省中各事無虞積壓而防務亦可兼顧奏入

上命軍機大臣傳諭閻敬銘丁寶楨曰東股捻逆經劉銘傳等軍追勦該逆現由曹縣一帶回竄豫省睢州閻敬銘以天寒水涸河防益宜加密所籌尙屬周妥著卽督飭各軍認真堵禦晝夜梭巡不得因賊蹤已遠稍形疏懈閻敬銘現擬回省著丁寶

植懷遵前旨星速馳赴東平督飭在營將士嚴密  
布置以副委任

十一日丙寅英翰奏言據探捻逆因官軍擊剿甚

力由單竄虞經過柘城已抵鹿邑勢甚飄忽臣

恐逆股又折而南行遂改道太和繞向西北一

路迎頭攔擊臣抵太和後連接亳州守將程文

炳稟報十月二十八日賊在鹿邑之王家橋盤

踞該軍出隊往剿逆衆已於二十九日黎明向  
陳州奔竄據擒賊供稱任逆等股欲竄過沙河  
入山度歲又據西路探報槐店周家口一帶已  
見火光各等語 臣卽親督道員史念祖等裹糧  
疾行循沙河而上並另派參將牛師韓等從南  
岸包抄期於沈項境內趁其半渡痛加剿擊詎  
該逆探知官軍緊追盡兩晝夜之力狂奔四百

餘里於十月初一日晚閒由距陳七十里之新  
站集渡淺南竄復派總兵李顯安等帶馬隊追  
至沈邱縣迤西該逆已過項城其去益遠臣因  
出隊者僅有六營未便深入窮追當卽收隊竊  
思該逆旣欲竄入山非由新息趨黃麻卽由  
汝信竄隨應鄂中有曾國荃親自督師必能攔  
頭截擊該逆被創後如東竄潁霍臣當以全力



禦之備賊游弋於光固新息之間臣當多撥勁  
旅入豫會勦現在北路各軍除渦陽亳州仍留  
重兵駐守外其餘均令拔至潁西皖豫交界一  
帶扼要駐紮臣暫回潁州俟諸軍調齊卽親往  
各處相度機宜妥爲布置奏入

上命軍機大臣傳諭官文曾國藩李鴻章英翰曾國  
荃李鶴年曰捻逆由單縣竄過柘城鹿邑勢甚飄

忽程文炳等出隊追至沈邱匪衆已過項城逆蹤  
竄入豫境勢將南趨鄂疆李鶴年務當督飭豫軍  
盡力攔截不可徒事尾追致令賊由汝信西竄南  
陽曾國荃已經出省東赴黃州著卽探蹤北趨黃  
陂麻城一帶杜賊由光固竄鄂之路並著官文曾  
國荃分布各軍於襄樊應山隨棗一帶嚴密堵遏  
槐店周家口俱有火光曾國藩現住周家口必當

有兵迎擊其被擾輕重及接仗情形著卽隨時具  
奏賊去東省已遠劉銘傳等軍會合豫師夾勦務  
須窮賊所向不可稍形懈弛著曾國藩李鴻章妥  
爲調遣仍著英翰嚴扼潁六一帶防賊回竄皖境

十二日丁卯劉長佑奏冒據余承恩稟報十月二

十四日帶隊至東明之西泰集見賊騎往來游  
駛當經我軍擊退追至東臺寺該逆馬步分股

來撲復經我軍擊斃多名賊向東南奔竄余承  
恩仍督隊追至海頭集地方斃賊數十名生擒  
賊目三名訊明正法並據各路探報擒逆竄往  
曹定後又經劉銘傳等軍截擊大獲勝仗餘賊  
南竄勢極窮蹙各等情查該逆雖屢經懲創難  
保不爲困獸之鬪復圖紛撲河干現飭張樹聲  
陳明志等嚴督兵勇於沿河一帶加意備禦實

力巡防不可稍形鬆懈奏入

上命軍機大臣傳諭劉長佑曰捻匪擾及東明經余承恩帶隊迎擊餘衆逃向東南復被劉銘傳等軍痛勦於曹定之交向南竄逸勢極窮蹙畿南河防最關緊要現值天寒冰沍之時到處皆可涉淺搶渡劉長佑仍當嚴飭防河諸軍加意堵扼並密築隄牆礮臺以資守禦

同日李鶴年奏言西路捻匪前股進逼華州之  
羅文橋大股仍踞華陰邊馬擾及潼關陝西撫  
臣業已派有重兵扼守西路鮑超一軍經曾國  
藩咨令西行又派劉松山帶領老湘營駐防陝  
州力保黃河以顧晉省計與臣所派之保英一  
軍可以先後到防兵力較厚足杜該逆回竄之  
謀卽黃河冰結成橋亦可遏其偷渡其東路竄

匪曼經劉銘傳潘鼎新等軍於魚臺金鄉往來  
勦擊該逆不得逞志於東復行回竄豫境十月  
二十五至二十九等日擾及商邱甯陵柘城等  
縣沿途被官軍追殺甚衆該逆遂由太康奔向  
淮甯晝夜兼馳極其剽疾維時臣所派總兵宋  
慶之軍駐紮睢杞探知賊蹤回駛卽向太康一  
帶追勦三十八馳抵淮甯知賊在西南連夜追

至陳州府屬萬寨地方適該逆屬聚各莊宋慶  
等揮兵進戰連破賊踞村莊十餘處陣斃悍逆  
三四百名生擒五十餘名賊衆敗向西趨訊據  
獲賊供稱該逆因我兵追至淮軍亦由東路追  
來乃於昨夜將輜重渡過沙河以南等語我軍  
立即啟行追至牛家口而賊衆已由淺處渡過  
沙河宋慶即跟蹤南渡視賊所向盡力兜勦現



在商水上蔡等縣已見賊蹤探悉賊有由光固  
竄往湖北之說臣一面飛咨鄂省派兵迎擊一  
面檄飭宋慶激勵三軍兼程進徧無論在鄂在  
豫總當痛加勦洗迅殄逆氛奏入

上諭曰仍遵昨日寄諭飭令宋慶渡河追勦毋稍鬆  
懈

十四日己巳會國荃奏言欽奉

諭旨鄖西二竹一帶著官文曾國荃督飭各軍妥爲  
防剿曾國荃應否至襄陽一帶駐紮以圖迎剿並  
著酌量具奏臣出省後周歷黃陂黃安麻城一帶

於十月十四日抵應山縣之廣水驛十八日移  
紮中路武勝關頃接鮑超函開以張逆竄往商  
雒並據賊供有窺犯鄂疆就食過冬之意查商  
雒與鄖陽府屬處處毗連誠恐闖入爲患當卽

咨會督臣札飭唐協和一軍拔赴鄖陽所屬擇  
要扼紮並令劉維楨一軍繼進以厚兵力就現  
在賊情度之西竄一股有秦軍遮截於前曾國  
藩業已咨會鮑超統率勁旅西向援應軍到之  
日賊勢自必窮蹙但恐張逆狡獪避兵而行閒  
道旁溢則各路堵剿未可稍爲鬆勁臣所派紮

河南唐縣之軍爲提臣郭松林紮西路隨州之

軍爲藩司彭毓橘二將皆足當一面西路可以  
無慮至東路股匪經官兵追勦於豐沛之間截  
爲兩股仍圖南竄鄂省東路與皖豫接壤將弱  
兵單臣不得不暫駐中路豫爲防範查武勝關  
爲東西適中之地可以兼顧目前未便移動俟  
任賴等逆殲滅東路解嚴後臣乃可由水路移  
紮襄樊專注西路奏入

上命軍機大臣傳諭官文曾國荃曰賊匪有窺犯鄂疆就食過冬之意該撫駐中路之武勝關目下東股任賴等逆已由沈邱過項城勢將南趨鄂疆距該撫駐紮之地不遠著卽督軍迎勦並飭郭松林彭毓橘認真防守伺隙兜截鄂境門戶固宜力顧然亦不可過分畛域任賊旁趨其毗連秦豫各隘口官文曾國荃務當懷遵本月十一日諭旨嚴密

堵遏如賊勢趨重何路卽令附近防兵會合夾擊  
併力殲除

十八日癸酉李鴻章奏言臣欽奉

恩命授爲欽差大臣專辦勦匪事宜嗣又奉

諭旨飭臣俟曾國藩回任後辦餉有人卽赴前敵軍  
營調度並蒙

皇上洞鑒兩江所出餉需實關勦捻全軍命脈

特命曾國藩回任籌辦俾臣後路無掣肘之虞  
聖慈曲逮俯察艱難無微不至臣等應如何感激奮  
興復何敢稍有推諉致誤事機謹當恪遵

諭旨俟曾國藩回任後料理交卸馳赴前敵惟臣屢  
接曾國藩來函深以地方政務繁重精力不支  
必欲堅辭回任查捻股現盡入豫曾國藩適在  
西路計鮑超劉松山所部湘軍已由曾國藩檄

往陝汝一帶其餘各大枝皆臣淮軍舊部臣卽未受

欽差關防本可籌商調度臣暫不赴豫亦尙無妨設臣與曾國藩皆離督任根本重地孰與維持於大局確有關礙奏入

上諭曰著該撫卽將剿匪事宜妥爲布置應否馳赴豫境居中調度之處著與曾國藩悉心籌商相機



辦理

同日趙長齡奏言查捻匪竄擾無定形同流寇  
晉爲完善之區垂涎已非一日前此屢次撲犯  
幸得隨時擊退詎該逆由閒道竄踞華陰華州  
等處逼近渭河渭河爲同朝保障同朝以北又  
皆與晉僅隔一河保渭卽所以守晉臬司陳湜  
由潼關入渭親加布置添派遊擊章福春等帶

領水師入渭控扼十月二十二十一等日賊由沿河安家渡一帶連日搶撲均經章福春等督師擊退是該逆窺伺山西狡謀未釋又值甘回時圖竄陝所有晉省西北一帶河防均宜添兵扼守經臣咨大同鎮臣馬陞移紮磧口以北太原鎮臣蔣臨照移紮禹門以上並飭河東道楊寶臣分守禹門渡與陳湜聯絡策應一面抽撥

省標官兵並各鎮標兵合計一千數百名與原  
紮澤州之勇丁兩營均赴西南沿河分守並於  
河邊築壘設卡以期有備無患所慮晉省河路  
綿長兵力單薄且須越境協守渭河難免顧此  
失彼亟應遵

旨增兵添勇藉壯聲勢臣與藩司王榕吉臬司陳湜  
再四籌商查晉省各州縣均練有勇丁自數十

名至百餘名不等原以備緩急之用擬飭籌防  
局司道趕緊查明調集前項練勇三千名統限  
月內齊赴陳湜行營聽候擇要分在所需口糧  
軍火均由局樽節酌發俟黃河開凍邊防稍鬆  
遣回亦易一面飛催副將閻文忠卽將新募勇  
丁五百人妥速訓練並將現紮甯條梁楚勇五  
百名就近檄調回晉統交該臬司酌量布置至

陝西撫臣劉蓉商由晉省派撥四營協守渭河  
北岸俟各勇丁調齊後該臬司自可斟酌情形  
分派前往柳臣更有陳者籌防固費足兵而增  
兵宜先籌餉查晉省司庫通年進款僅得三百  
二十餘萬兩奉撥京協各餉以及本省兵餉等  
項須銀四百數十萬兩已屬進不敷出現又由  
司庫陸續墊用防費銀四十餘萬兩河東道庫

墊發勇糧銀二十萬兩有奇雖蒙

恩准留本年地丁十五萬兩河東鹽課五萬兩僅敷  
冬季支發之用一交來春必致挪無可挪墊無  
可墊合無仰懇

飭下部臣於奏撥來年京餉時將晉省應撥之數格  
外從減另在東南各省勻撥庶晉省添勇增船  
費有所出實於大局有裨

趙長齡又奏言正在繕摺閒准兩江督臣曾國藩咨稱任賴兩逆股匪已至太康仍恐西竄汝洛乘閒偷渡蔓延晉境已派老湘營拔赴汝州攔頭迎擊與山西臬司陳湜夾河設防請由晉省代購米石接濟軍食一面飛飭敬字三營由周家口前赴汝州會剿等因並准河南撫臣李鶴年來咨亦經派總兵保英統率四營赴紮陝

州盧氏等處務與晉兵聯絡聲勢共保無虞臣  
查連日探報陝省華陰踞匪已向西南遁走其  
後隊尙在華州境內仍虞返竄任賴股匪又有  
西趨之勢恐與張逆互相勾結雖有豫軍追堵  
而晉省茅津渡等處現在防兵無多亦宜早爲  
之備臬司陳湜已於西路防軍內抽撥參將蕭  
紹珂等軍分紮茅津太陽等渡副將凌耀安管



帶水師移泊平陸以資策應又潞澤空虛不能  
不豫爲防範晉省營數無多調赴河防尙苦不  
足若再兼顧潞澤更屬力有未逮且該處山路  
紛歧勢難徧堵不如於彰衛懷沿河一帶豫籌  
布置較有把握相應請

旨飭下河南撫臣李鶴年嚴飭彰衛懷三府將河防  
認真籌辦不惟河北完善之地免遭蹂躪卽晉

省後路亦藉資屏蔽湘軍如需米石自當儘力  
籌辦奏入

上命軍機大臣傳諭李鶴年趙長齡喬松年劉  
前據劉蓉奏捻股竄至華渭一帶該署撫已調集  
各軍進剿究竟此賊是否爲久踞之計抑已另行  
出竄未據劉蓉續報殊深焦盼劉蓉派出各軍勢  
分相堵若無大員統率斷難得力該署撫自應趕

緊出省調度以一事權喬松年應已到省即使中途有阻亦應迅速奏聞乃日久未見奏報不知於何處遷延卽著會合鮑超等軍剋期赴陝以副委任正在寄諭間據趙長齡奏捻逆尙踞陝西等語臬司陳湜由潼關入渭布置該撫復添調省兵及各州縣練勇交陳湜管帶自更得力卽著督飭該臬司妥籌辦法力顧全局所請將來年應撥晉省

京餉從減身在東南各省勻撥之處已令戶部斟酌辦理任賴股匪又有西趨之勢恐由孟津渡河翻山越嶺襲竄山西趙長齡請飭河南嚴防彰衛懷三府著李鶴年卽飭保英等認真截剿並令彰衛懷各屬地方文武嚴密防守勿使一賊渡河陝省華陰踞匪向西南遁去究向何路奔突鮑超駐紮楚豫之交自可就近邀擊著李鶴年等卽催鮑

趙探蹤勦洗毋誤戎機豫省兵力不少馬德昭宋慶等近紮何處何以未聞與賊接仗著李鶴年酌度情形出省防勦未可專恃客兵坐耗餉項

上又命軍機大臣傳諭戶部曰趙長齡奏請將來年應撥晉省京餉從減另在東南各省勻撥之處著戶部斟酌辦理

卷之四十五

四十五

欽定勦平捻匪方略卷二百六十四 丙寅年

十一月十九日 甲戌 鮑超奏言欽奉

諭旨飭臣入關迅速進勦亟應倍道馳往以副

皇上軫念西陲之至意適准兩江督 臣 曾國藩函咨

以該逆不久必仍回竄鄂豫囑 臣 暫緩入秦且

恐入秦後銀米子藥萬難接濟昨復准來咨因

慮賊深入秦境令由鎮內浙川進荆子關以達

商州如賊已遠去亦進至西安省城爲止霆軍  
係奏定勦擒之師不必與回匪接仗現已咨商  
山西撫臣代辦米糧由黃河舟運入秦接濟如  
無糧可食萬分爲難卽在中途折回等因伏念  
用兵之道宜思萬全若不慎其難於前斷難善  
其事於後秦省頻遭回擾民鮮蓋藏大軍從內  
漸進征山路崎嶇萬難攜糧而行勢不得不就



地籌辦聞秦中米麪價昂難於購買此時在豫  
因距江西太遠營中常懸三月餉銀難以解到  
一入秦境則相去更遠轉運愈難山西地瘠民  
稠本地居人尙資糧於鄰省安望接濟秦中况  
值此嚴冬河凍雖有舟楫亦難濟急 臣再四思  
維與其將來缺糧至中途而折回不如此時籌  
畫萬全而後發 臣上年進征粵東由江至粵節

節設立轉運糧局幸得馬騰士飽克竟全功此  
次由豫入秦合無仰懇

天恩飭下陝西撫臣於入秦處所接連安設轉運局  
直抵大營並多派委員督飭經過地方守寬備  
米麪料豆其糧價運腳均飭由秦發給即使營  
中餉到稍遲亦免臨敵缺糧之累臣即可專意  
剿賊矣前買戰馬頭起甫經到宛二起馬匹三

五日亦可到營現在急於援陝亦難待馬隊訓練純熟昨據督辦豫省轉運道員蒯賀蓀稟報江西協餉業抵信陽臣已派兵星馳迎提俟此起餉到卽督全部由內浙前進從此當窮賊所至無分在豫在秦見賊卽勦無論是同是捻總期勉竭駑駘迅掃欃槍上慰

宸廑奏入

上命軍機大臣傳諭官文曾國藩李鴻章曾國荃李  
鶴年喬松年劉蓉鮑超曰鮑超一軍現由內鄉浙  
川馳援關中山路崎嶇難於裹糧而行秦省米麩  
昂貴採買維艱非由各地方官就地先備米麩及  
馬匹所需料豆不足以利師行著李鶴年迅飭豫  
省地方官將應需糧米等項寬爲豫備此軍糧米  
轉運事宜本係鄂豫兩省共辦且荆子關本有鄂

省設立糧臺轉運各省餉需如該軍經過浙川內  
鄉山路中有須設局轉運之處卽著官文曾國荃  
與李鶴年會商籌辦不可互相推諉致誤師行喬  
松年劉蓉於該軍經過秦省地方豫行籌借糧麩  
等項就地發給毋任缺乏所有運腳等項卽由秦  
省籌發其沿途師行經過及駐紮處所應如何設  
局節節轉運及豫行屯糧給發之處並著喬松年

劉蓉按照鮑超江粵設局轉運之法斟酌陝省情形妥速籌辦曾國藩李鴻章檄令鮑超卽行起程入秦窮賊所向盡力追剿

二十三日 戊寅 曾國藩奏言接奉

諭旨飭臣回兩江總督本任暫緩來京陛見遵於十一月十九日派員謹贐

欽差大臣關防馳赴徐州交李鴻章祇領至 臣仍回

兩江總督本任一節

朝廷體恤下情不責臣以治軍但責臣以籌餉不  
令留營勉圖後效但令回署調理病軀

聖恩高厚感悚交并惟兩江總督公牘之煩數倍於  
軍營而疆吏統轄文武尤以接見僚屬爲要臣  
精力日衰用心久則汗出說語多則舌蹇不能  
多見賓客不能多閱文牘業經屢次陳奏數月

以來標病雖除而此二患迄未痊可實難勝江  
督之任且臣屢陳病狀懇求開缺若爲將帥則  
辭之爲封疆則就之則是去危而就安避難而  
就易臣平日教訓部曲每以堅忍盡忠爲法以  
畏難取巧爲戒今因病離營安居金陵衙署跡  
涉取巧於平日教人之言自相矛盾不特畏清  
議之交譏亦恐爲部曲所竊笑臣內度病體外



度大義減輕事權則可竟回本任則不可 臣旣不能回江督本任而李鴻章新膺專征之

命又難久署江督之篆亦不可不熟計而兼籌查刻下賊分兩股東股任賴等逆竄至光固非西入鄂卽南入皖李鴻章或仍駐徐州或移紮六安以剿鄂賊或移紮潁州以剿皖豫之賊皆在兩江轄境之內是李鴻章暫署江督於剿辦東股

毫無窒礙至西股張逆在秦臣現多方籌辦糧  
米湘軍防晉業已啟行赴洛霆軍援秦卽日亦  
可入關似兩三月李鴻章兼署江督尙無損於  
大局合無籲懇

天恩飭下李鴻章以

欽差大臣暫行兼署兩江總督一面料理出省事宜  
兩三月後或請另

簡兩江總督或請另

簡欽差大臣或令李鴻章自薦籌餉大員布置後路  
該大臣出省之宜遲宜速均聽

皇上權衡定奪屆時臣再具疏請開江督之缺目下  
謹遵

諭旨暫緩

陛見仍在周家口軍營照料一切維湘淮之軍心聯

將帥之情誼凡臣才力所可勉精神所能到必當殫竭愚忱力圖補救斷不因兵符已解稍涉疏懈致乖古人盡瘁之義

曾國藩又奏言臣前派鮑超一軍援秦旋接鮑超來文瀝陳入秦之難有三十在米糧之難辦一在餉銀之難解一在回匪之牽掣兼以口馬尙未到齊擬在南陽陸續操練一俟馬隊練成

陝省米糧轉運等事布置周妥再行入關且引  
上年進援粵省爲證謂粵省大吏一面催撥一  
面代爲豫備糧草轉運照料客軍至爲周到等  
因請臣代爲陳奏臣詳閱該提督所稱培係實  
在情形惟所慮之三端回匪牽掣一節雖屬意  
中之事然臣前次檄文內詳言專剿捻匪不剿  
回匪業經奏明此時無庸豫慮餉銀難解一節

該營餉項以江西爲大宗路途太遠轉折太多  
自難免停軍待餉之憂 臣已咨商劉坤一格外  
趲早一面咨請河南陝西兩撫 臣設法按站接  
解當不至十分遲誤米糧難辦一節則爲軍中  
最要之事查有陝州靈寶縣丁憂在籍之前任  
蘇州府知府薛書常熟悉秦晉豫三省交界情  
形 臣已派委該員就近稟請山西撫 臣領銀三

萬兩商之臬司陳湜就地購糧接濟霆軍並以  
軍士入秦艱苦其買糧之價由臣籌款另發一  
箇月不扣勇丁月餉一箇月之外續辦糧米由  
臣加價一半在勇丁月餉中酌扣一半事事籌  
畫清晰咨覆鮑超覆稱俟接江西協餉日內卽  
可赴秦矣查署陝西撫臣劉蓉先經疊催鮑超  
入秦嗣又奏請改派劉松山劉秉璋楊鼎勳三

軍入秦不知各軍前在洛陝未能赴秦先後退  
回者皆由米糧太缺之故若秦中米糧有著則  
劉楊等軍可往鮑軍亦可前往現在劉松山一  
軍業已馳赴汝洛與陳湜協防黃河力扼賊竄  
晉省之路楊鼎勳一軍駐防周家口劉秉璋一  
軍經臣調回山東因行至睢州遇任賴等逆回  
竄跟蹤追剿四百餘里現經李鴻章調赴清江



接防成子河等處此二軍者一時均難更動惟  
鮑超一軍人數較衆約束亦嚴今又爲之酌加  
米價廣辦軍糧自不至更有他虞相應奏明請  
旨飭下河南撫臣李鶴年行知薛書常本籍催令赴  
晉領銀並請

旨飭下山西撫臣趙長齡迅籌銀三萬兩發交薛書  
常採辦米糧以濟軍食山西所籌銀兩或由應

協臣餉項下扣抵或由臣另籌解還仍如上次  
所奏辦理霆軍入秦後離臣一千餘里離李鴻  
章二千餘里似應由提臣鮑超自行奏報軍情  
庶

朝廷之見聞較速調度較靈並懇於寄信

諭旨中許以專勦擒匪不勦回匪俾鮑超得以安慰  
軍士之心免生意外之變是否有當恭候

聖裁

曾國藩又奏言東路近日軍情任賴股匪自山東被勦窮蹙回竄豫境十一月初一日渡過沙河由正陽息縣羅山一路狂奔擾及信陽之南將入鄂境鄂軍甫經出隊迎勦卽行折回周盛波一軍跟蹤前進初十日遇賊於羅山縣城之東北徧賊南趨山徑首尾環擊擒斬俘獲甚衆

該逆向東南竹竿河一帶驚竄又經馬隊截殺  
無算十一二等日該逆竄擾光州光山十三日  
竄至固始探稱圖犯鄂境此股賊匪先在東省  
猛撲運河傷亡頗多旋在豐單曹濟一帶經劉  
銘傳等軍痛勦拋棄器械幾盡此次竄至信陽  
砍取青竹爲矛又經周盛波縱橫攔截沿途遺  
棄賊餼實已日衰現飭張樹珊一軍拔隊追擊

劉銘傳一軍疲勞太久臣令在周家口休息兩旬亦卽赴鄂會剿又檄李昭慶全軍由潁亳以達光固六安冀與鄂軍共收夾擊之效

曾國藩又奏言臣因病不能回江督本任留營自效李鴻章未入豫境臣經手各件仍須認真籌辦查咸豐十年以前臣辦理軍務皆用木質關防茲擬仍刊木質關防一顆其文曰協辦大

學士兩江總督一等侯行營關防十九日送交  
欽差大臣關防後卽行開用東西兩路軍務目下商  
同調度俟李鴻章出省後卽不主調度賞罰之  
權俾事權歸於畫一庶將領有所適從臣仍以  
散員留營幫同照料

同日喬松年奏言臣於十一月初六日馳抵陝  
省准署撫臣劉蓉於初十日派員恭齎陝西巡

撫關防移交前來 臣卽於是日祇領任事查陝  
省地方較之皖省尤覺凋敝加以捻蹤深入業  
經竄近省城援軍未來餉源久竭旣防捻氛之  
肆擾復虞回逆之東趨誠爲萬分喫緊之時幾  
有應接不暇之勢 臣受

恩至重惟有恪遵

諭旨隨事隨時與劉蓉和衷商辦共濟時艱以副

聖主委任之至意均奏入

上命軍機大臣傳諭曾國藩李鴻章李鶴年趙長齡  
喬松年劉蓉鮑超曰鮑超一軍前已屢諭飭令速  
行赴秦並諭湖北河南陝西各督撫豫籌轉運糧  
米接濟現經曾國藩派知府薛書常赴山西領銀  
三萬兩與陳湜商辦就地購糧接濟霆軍並由曾  
國藩籌款另發一月餉銀不扣勇丁月餉一月之



外續辦糧米由曾國藩加價一半在勇丁月餉中  
酌扣一半所籌均屬周妥卽著照所議辦理薛書  
常籍隸靈寶卽著李鶴年飭赴晉省並著趙長齡  
趕緊提銀三萬兩交薛書常收領與陳湜購辦糧  
米接濟鮑超軍食李鶴年仍於霆軍經過處所飭  
各地方官備辦屯糧及轉運事宜以免缺乏喬松  
年於秦省豫辦糧運源源接濟毋令該軍停兵待

食現在西股擒匪已偏西安省城待援孔亟著曾  
國藩李鴻章嚴檄鮑超星夜兼程赴援鮑超西行  
餉米均已不患缺乏該提督自當奮勉立功將擒  
股力行掃滅此次援秦專爲勦擒而設並非令其  
勦辦回匪該提督當鼓勵兵將視擒所向儘力勦  
洗勿稍疏懈東路擒匪已由汝甯折竄光山著曾  
國藩李鴻章飭周盛波緊躡窮追勿任喘息至曾

國藩請以散員仍在軍營自效之處具徵奮勉圖  
功不避艱難之意惟兩江總督責任綦重湘淮諸  
軍餉項尤須會國藩籌辦接濟與前敵督軍同爲  
朝廷所倚賴該督忠勤素著且係朝廷特簡正不  
必以避勞就逸爲嫌致多顧慮著遵奉前旨仍回  
江督本任以便李鴻章酌量移營前進喬松年現  
已到任值此軍情緊急之際務與劉蓉和衷共濟

劉蓉當遵旨出省相機督勦不得稍涉推諉喬松  
年身任地方責無旁貸所有調度機宜並軍火糧  
餉均須實力籌辦軍營以紀律爲先喬松年當與  
劉蓉善爲整頓固不可操之太蹙亦不可一味寬  
縱致令將士任意遷延無所顧忌

二十三日 戊寅 署山東巡撫布政使丁寶楨奏言

據探捻逆已由汝甯南竄去東漸遠惟賊情飄

忽防務仍不可稍鬆 臣擬於十一月二十一日  
隨帶員弁親赴河北濮范壽張查閱黃河一帶  
防營卽由張秋過河從沈口安居直抵濟甯沿  
運河隄牆將各路防營逐加查閱再行回駐東  
平俾防務益臻嚴密奏入報

聞

二十五日 庚辰 曾國荃奏言查任賴股匪自東省

折回曼經官軍勦敗奔竄豫省日夜行二百餘里十一月朔六日右路一股抵信陽城外左路一股抵羅山境界志在由杏竹關武勝關三里城等處窺犯鄂邊初八日派總兵熊登武統率所部援勦初九日至信陽而賊已先遁直趨光固矣訊據獲賊供稱此股捻匪約計三萬餘人有就食鄂省之意查光固一帶與鄂省麻城黃

安孝感毗連該處雖有姜玉順一軍駐守未可  
深恃臣一面咨會督臣並飭彭毓橘自隨州應  
山移營黃安相機堵剿檄調福建提督郭松林  
候補提督伍維壽各統所部自唐縣回鄂之隨  
州駐紮豫備東路繼進之師一面函商曾國藩  
李鴻章檄飭各軍緊逼此賊俾離沙土平衍之  
區踰山嶺崎嶇之路然後以鄂軍迎截於前淮

豫各軍兜勦於後似乎爲力較易收效更捷如果賊入鄂邊臣卽親赴前敵督師會勦以策羣力而衛地方夫以保民而論則鄂中瘡痍已久不可使百姓復聞風鶴之驚若以滅賊而論則鄂中險阻堪憑正可藉地勢以躡戎馬之足臣斷不敢稍存畛域希冀賊不及境爲苟且自完之計如果仰賴



天威乘此機會偏賊南來將任賴股匪聚而殲旃則  
各省兵力便可一意西向上紓

宸廑奏入

上命軍機大臣傳諭譚廷襄曾國荃曰任賴各匪由  
信羅竄光固該撫已飭彭毓橘移營黃安郭松林  
等屯紮隨州並以偏賊南來爲聚而殲旃之計所  
籌尙妥著卽督飭諸軍誘賊深入薄於險以待之

仍商調湘淮各軍步步緊逼不得稍涉大意譚廷襄暫署督篆各軍餉項及應行整頓事宜該撫當與譚廷襄隨時和衷商榷未可一意孤行有辜委任

二十七日壬午英翰奏言臣於十一月初七日馳

回潁郡所調北路郭寶昌等軍亦隨後陸續趕到據探賊在羅山被總兵周盛波宋慶等擊敗

紛擾光州據逃出難民供稱該逆有就食六安之說臣當調總兵朱漑森四營先赴六安扼守一面派總兵張得勝等軍赴固始迎勦而以同知方長華繼之另派郭寶昌等軍由固始之橋口集至葉家集繞出賊前力杜該逆突犯東路以爲撓勦之計臣亦於十八日抵固境之戴家店疊據前敵來稟十二日賊由白雀園馬岡集

竄抵固始城下值黃秉鈞之馬隊趕到小有斬  
擒賊卽撤退十三日黃秉鈞馳至王家渡口大  
股馬賊正在該處搶渡黃秉鈞揮衆掩殺張得  
勝亦帶兵繼至兩路夾擊斃賊百餘名逆勢不  
支向西狂奔我軍遂進紮固始城西十四日方  
長華亦到因接商城被圍請兵之信復改道南  
趨十五日遇賊於上石橋總兵張朝棟等首先

衝入賊隊方長華從西面包抄賊復大敗斃賊  
三百餘名生擒五十九名救出難民一千三百  
餘人該逆向西南奔竄十六日追至路口集該  
逆越過界嶺直趨分路口黃土岡向麻城宋埠  
大路而去我軍因裹糧無多未便窮追伏思此  
股捻匪紛擾東豫皖鄂疾如飛隼又慣避兵而  
行往往追之不及今由東省南竄不數日閒已

抵光固密邇皖邊若非豫防嚴密幾爲所乘現  
旣入山竄鄂度曾國荃必攔頭迎擊李鴻章亦  
必調兵進剿該逆窮迫無路若乘虛向松子長  
嶺等關旁竄則皖省英霍等處最爲喫緊臣刻  
已改調方長華一軍移紮英霍扼要之漫水河  
張得勝一軍移紮六霍連界之流波磴黃秉鈞  
一軍移紮固始臣親軍馬步各營分紮潁郡三

河尖兩處以固英霍及潁西門戶而令郭寶昌  
程文炳兩大枝勁旅移紮商固霍邱交界之葉  
家集待賊回竄無論皖境豫境視其趨重何處  
卽赴何處迎勦 臣部署清楚卽暫回潁郡料理  
地方公事仍不時赴三河尖察看情形相機調  
度奏入

上命軍機大臣傳諭曾國藩李鴻章譚廷襄曾國荃

李鶴年英翰曰任賴等股向黃麻宋埠南竄有欲就食六安之說英翰現已令方長華等軍分紮英霍等處扼要駐守著卽督飭諸將嚴密堵截毋任回竄皖境曾國荃現駐武勝關務須設謀誘賊入險四面圍剿不得任其紛擾鄂境後路糧餉著譚廷襄妥爲籌畫賊如竄入英霍山中則徑路崎嶇馬力無所馳騁官軍有險可扼易於施力曾國藩



李鴻章自當檄飭湘淮各軍並約齊鄂豫皖省將  
士合力堵剿就地殄滅不可失此機會賊既竄過  
淮南則淮河北岸亦應倣照黃運兩河辦法一律  
設法嚴守毋令任意搶渡著李鴻章英翰李鶴年  
籌商辦理豫省邊界地方並著李鶴年分軍布置  
以防回竄

二十八日

癸未

喬松年劉蓉奏言據提督劉厚基

等稟報十月二十六日華陰踞逆約三四千人  
分三路而來一股由大路迤北繞出我軍之後  
以一股設伏林中而以長槍悍逆直撲營壘該  
提督傳令各營偃旗息鼓俟賊偪近以槍礮轟  
擊斃賊多名邱時成復率馬隊由南城堡進剿  
賊始折回老巢該提督等因林中伏賊密布未  
動不便追擊訊據獲賊供稱逆首張總愚期於

十一月初閒出竄或走鄜蓋或趨商雒等語初四日該逆分股先由蒲峪偷竄經派防雒南之劉玉興督率各營擊敗初五日臣蓉抽調邠防之鄜太愚等軍陸續行次華州西關外與劉厚基彭體道等軍相距各二三十里中隔賊氛聲氣尙不相通初六日該逆馬隊大股蠡擁而來鄜太愚等飭各勇嚴陣以待俟賊氣稍衰我軍

奮勇齊出斬馘極多該逆仍分股牽掣劉厚基  
等軍而以大股循渭河西上二更後盡萃於華  
州西關盤踞附近村堡將鄢太愚等軍層層圍  
裹初七日劉厚基彭體道知該逆全數西竄星  
馳回援遂與鄢太愚等併力將踞賊擊敗該逆  
望西竄走蕭德揚等慮其直犯省垣遂兼程夜  
渡渭河繞出賊前爲攔頭迎勦之計乃該逆驟

如風雨前隊已於初六日未刻馳抵渭南直撲  
派防渭南城外之蕭集山王九齡兩營經蕭集  
山等出隊擊退初八日邊馬擾及灞橋我軍皆  
繞由咸陽渡河顧護省城該逆大股亦遂折竄  
藍田境內十一二三等日各軍陸續齊赴省外  
臣查該逆竄踞華陰已逾一月所謂東路馬步  
各軍先後進剿皆爲賊匪隔斷彼此苦不得合

兵分力薄以致屢爲所乘現探張總愚自率悍  
黨踞藍田屬之洩湖餘黨分布鞏川藍橋鹿走  
溝等處蔓延數十里非合大軍齊進難與爭鋒  
因與臣松年會商分撥諸軍以鄆太愚蕭德揚  
楊得勝洪殿元爲左路劉厚基黃鼎邱時成西  
蒙克西克爲右路張兩翼滾營前進又檄劉玉  
興等自雒南扼紮窄峪口一帶截其前竄商州

之路調隴防蕭德綱等三營駐紮水溝扼其繞  
竄省城之路而留撫標各營駐紮東關兼護糧  
運布置既定鄢太愚等均於十六日由省拔隊  
十七日進至藍田屬之新衛鎮距洩湖城巢約  
十六七里正在紮營該逆卽出馬步數千來撲  
鄢太愚等各率親兵馬隊奮勇接仗仍以全部  
趕築營壘陣斬悍賊十餘人逆衆敗竄其南原

孟家莊一帶之賊亦退聚洩湖老巢 臣等仍飭  
諸軍節節進攻或將逆黨偏入南山林壑澗谷  
之閒使賊騎不得馳騁卽不難悉數殲除

喬松年又奏言 臣體察陝省軍情地勢此時賊  
已竄至腹裏不肯越山出境而官兵之力但能  
尾追不能截擊凡平衍之區勢將盡遭蹂躪尤  
可危者明春二三月甘省回匪定將回竄捻匪



利於擄掠志在搜野回匪兼思報復必且圍城  
城鄉俱困則全省糜爛必如昔年皖省之殘破  
而後已秦中兵力單弱堵剿捻匪已形不足儻  
回捻交訌則更不能支如左宗棠迅速到任政  
令一新甘省無恙陝省或可恃以無恐惟該督  
必須明年春深方能到甘深恐緩不濟急在會  
國藩李鴻章方謂已飭鮑超全軍赴陝足資捍

衛不知秦中艱苦又值嚴寒楚勇視爲異途卽  
使勉強成行亦必且前且卻半途而返終成畫  
餅臣熟知皖勇素能耐苦勦捻極爲得力合無  
仰懇

天恩飭下李鴻章分撥淮軍各營於提鎮中如劉銘  
傳周盛波者派令統帶星馳入陝儻東路亦正  
需兵急切難以勻撥或准臣指調皖營統帶各

將如徐鵬郭寶昌等一二員率其舊部前來準  
於年內春初趕到方可遏賊氛而保完善

同日李鶴年奏言張總愚一股已由渭南之南  
原繞過臨潼竄至西省城正南五十里之殷  
家衛入南山口擾至藍田縣境有窺伺漢中之  
說其任賴一股由汝息南竄與皖豫湘淮諸軍  
相距不遠若能先將此股辦結則各路官兵可

以併力西征不致再有牽掣臣疊催總兵宋慶  
星夜追勦不准但以驅賊出境爲詞以致蔓延  
鄰省乃該逆狡譎萬分忽東忽西迄無定向十  
一月初四五等日由上蔡正陽南竄兩日之間  
狂奔三百餘里初六日已至信陽州之三里店  
攻撲城關城上開礮斃匪多名乃退踞數里之  
外初八日夜開道員蒯賀蓀副將尹嘉賓密派

兵勇由東南縋城而下乘霧直薄賊營該逆猝不及防自相蹂踐向東南遁去次日宋慶帶兵追至而賊已折竄羅山及宋慶追抵羅山而賊之前股已竄向東南十一日賊擾光州是日戊刻宋慶先帶馬隊趕至該州十二日步隊到齊該逆後隊尙在近城滋擾我軍出隊奮擊生擒數十名訊知大股已竄入固始遂與周盛波函

商會勦豫軍由南路淮軍由北路分投前進豫  
軍參將劉廷等於十四日至光州在南觀音堂  
地方偵知任柱馬步大股在前屯踞副將蔣東  
才催軍疾進該逆見我軍偪近折向南奔宋慶  
揮軍趕殺盡一日之力至高店地方生擒逆首  
二名悍賊數十名十五日激勵三軍疾馳三十  
餘里追及任賴等逆大股縱橫截擊該逆亦擁

衆回鬪我軍奮勇衝殺十盪十決逆衆漸不能  
支宋慶復率親軍繞出賊後該逆首尾不能相  
顧倉卒狂奔我軍追殺二十餘里陣斃五六百  
名生擒帶隊逆首五名賊黨一百餘名解散脅  
從二千餘人我軍亦有傷亡該逆敗遁光山以  
南之白雀園其折竄州境王仔岡之賊亦經周  
盛波截擊獲勝臣仍檄宋慶乘賊挫衄無論在

豫在楚趕緊勦辦不容片刻停留以冀掃除妖  
孽其西竄之賊雖距豫較遠惟寇蹤飄忽無常  
不敢稍涉大意現飭保英四營駐紮閩鄉擇要  
扼守以固邊防

李鶴年又奏言欽奉

諭旨飭臣出省督軍勦賊臣到任旬餘卽出師歸德  
乃整頓未定卽准曾國藩咨令回省試辦朱仙



鎮南北濠防未幾而賊遂屬聚省垣左近創窵  
河隄幾至不測幸而兵將用命轉危爲安厥後  
賊股分馳曾國藩又申賈魯河濠牆之議不得  
不親督兵民從事版築刻下河冰漸合偷渡堪  
虞臣日以河防爲慮未敢輕於遠行假令臣一  
出省而賊由他途北竄臣雖星夜回援已落賊  
後未免顧此失彼惟當酌度緩急如遇應行出

省之時必當星夜就道萬不敢避勞就逸自外  
生成均奏入

上命軍機大臣傳諭曾國藩李鴻章譚廷襄曾國荃  
喬松年劉蓉李鶴年鮑超曰張總愚股匪竄聚灞  
橋偏近省垣復折向藍田意圖竄入南山著喬松  
年劉蓉激勵將士奮力勦洗賊果竄入南山卽當  
扼險堵禦分路追擊不得縱令再入腹地捻逆在

陝省盤踞已久難保不與回匪勾結務須嚴加堵截毋任合併爲患陝軍力本單薄捻股人數衆多情形萬分危急著曾國藩李鴻章嚴飭鮑超一軍就近兼程入陝探蹤力勦並著將該軍餉需迅速籌撥以利進行此時鮑超諒已起程該提督當立意前進奮勉圖功如中途遷延且前且卻藉故逗留則貽誤大局咎有專歸懍之慎之鮑超一軍兵

力頗厚足敷勦辦毋庸另調淮軍皖軍致稽時日  
喬松年劉蓉當就現有兵力提催鮑超全軍妥籌  
防勦其鄂省襄鄖一帶著譚廷襄曾國荃速撥兵  
勇嚴密堵勦以防陝省捻匪由南山東竄宋慶一  
軍奮勇追勦甚爲出力此時任賴等股已向黃麻  
南竄著李鶴年飭宋慶盡力窮追與鄂軍會合就  
地殲除曾國藩李鴻章仍遵前旨檄湘淮諸軍兼

程分路追躡並嚴申號令合力會勦務期不分畛  
域將此股殄除淨盡不得任聽諸將進退自如縱  
令捻蹤旁竄蔓延坐失機會豫省主客各兵曾國  
藩李鴻章當與李鶴年會籌調度毋分彼此共濟  
時艱李鶴年著仍在省城駐紮

續編卷之八

三

欽定剿平捻匪方略卷二百六十五 丙寅年

十二月初一日 丙戌 官文奏言捻逆由山東曹單

回竄晝夜狂奔勢甚剽疾撫 臣曾國荃駐紮廣

水驛居中調度現派藩司彭毓橘帶兵馳赴黃

安相機堵剿 臣在省先接探報賊由信陽羅山

南竄已飭總兵張啟基萬化林分撥礮船駛赴

溝口嚴密巡防十一月二十日又據黃州各屬

稟報該逆由白雀園一路假冒官兵突竄麻城  
及黃岡之新洲倉子埠等處肆擾距省僅數十  
里逆衆乘下游空虛銳意上犯現在近省一帶  
無兵可調自應先其所急力固根本重地已調  
譚仁芳由小河溪移紮灑口飭姜玉順繞出賊  
前迎頭截勦並檄副將唐瑞廷總兵左光培各  
率所部礮船至漢川新溝一帶力保江面其漢



口爲武漢通衢重鎮最關緊要已飭道員湯聘  
珍督率新練洋槍隊五百名在漢鎮嚴備以待  
一面飛咨撫臣迅速撥兵馳赴東路相機勦辦  
惟軍情倏忽變易臣惟有就現有兵力督飭各  
營奮往遏截不敢稍形疏懈

官文又奏言據報捻逆於十一月二十日午刻  
到黃陂分股擾及雙廟邊馬已至灑口賊蹤深

入腹地查此股賊匪晝夜行二百餘里剽疾異常或因後有追兵是以拌命狂奔現在漢鎮地方十分喫緊前派紮漢鎮之振威四營連年保護尙稱得力撫臣曾國荃於今夏全行裁撤僅有新增綠營兵丁二百二十名並勇丁一百名巡查街道城門城上雖有礮臺無兵撥守僅派洋槍隊五百名吉林馬隊二百名渡江協防並

派參將扎拉罕將所部施南官兵四百五十名  
紮營塘角以壯南岸聲威至漢鎮祇隔澗口小  
河一道雖有礮船暫資堵禦而時至隆冬水涸  
灘高仍恐運掉難期靈便所調譚仁芳一軍又  
爲賊阻此外勁旅皆隨撫 臣大營諒撫 臣居中  
調度或可出奇制勝 臣惟有督飭各軍固守待  
援卽日渡江布置以固人心至下游難民紛紛

遷徙大江南北兩岸已派員分往妥爲安撫不  
令失所並派遊擊田德明帶綠營練習馬隊百  
餘名赴青山彈壓稽查渡江難民以免奸匪偷  
渡奏入

上命軍機大臣傳諭曾國藩李鴻章譚廷襄曾國荃  
李鶴年英翰曰官文奏捻逆假冒官兵突竄麻城  
及黃岡之新洲倉子埠等處肆擾距省城僅數十

里近省一帶無兵可調勢甚危急官文現飭譚仁  
芳移紮灑口姜玉順繞前迎截唐瑞廷等礮船入  
漢川新溝力保江面著譚廷襄曾國荃卽飭該將  
領等認真防勦並由曾國荃添撥兵勇嚴防漢鎮  
及黃州等處曾國藩李鴻章卽飭周盛波等儘力  
窮追李鶴年飭宋慶一軍跟蹤追赴鄂境賊旣竄  
水田較多之處馬力難於馳騁正可調集主客各

軍四面兜剿聚而殲旃務當嚴申號令督飭諸將  
併力齊心認真剿辦儻有觀望遷延貽誤事機者  
卽著嚴叅治罪曾國荃前擬誘賊入險本係正辦  
惟該撫駐紮武勝關距賊甚近賊蹤竄繞後路震  
動省垣該撫毫無布置且近省各軍俱已調撥赴  
營致令後路空虛實屬調度無方儻掉以輕心不  
能速籌防範就地殄除致令竄出本境坐失機會

恐不能當此重咎也黃州毗連安慶並著英翰分  
布兵勇嚴密堵遏毋任東竄

初二日丁亥官文奏言臣於十一月二十二日渡

江至漢口鎮察看人心尙屬安靜惟堡城互延  
十數里礮臺十數處僅有洋槍隊五百名不敷  
分布當商令漢黃德道王文韶等慎擇營哨等  
官就地添募勇丁一千名卽派副將施鴻恩管

帶以資防守旋接探報該逆邊馬於十一月十六日竄至麻城十七日由黃安之青藩龍蔡家河直至葉家板二十日邊馬擾及澗口見礮船馬隊嚴陣以待知有準備兼以黃陂縣城堵禦甚嚴沿途堅壁清野無可擄掠於二十一日同倉子埠許家橋一帶之賊盡行西竄頭隊已入孝感縣境之王家河三汊埠等處後路黃陂西



北已無賊蹤二十二日賊由孝感分股入雲夢  
縣之武樂寺楊家壩等處二十三日由胡金店  
過河竄出應城之長江埠據獲賊供該逆有馬  
三四千匹洋槍數十桿並無火藥長矛數千桿  
其餘均無器械祇圖擄掠賊數約有三萬餘人  
等語又據姜玉順稟報十一月十七日戰捷於  
中館驛十八日再捷於青山寨擒斬甚多並派

五成隊追勦十九日追至光日門地方又獲勝  
仗臣查長江埠可通雲夢德安現在隨應有兵  
賊若避實就虛繞由雲夢應城京山天門安陸  
完善之區則襄河在在喫緊臣已派陸成祖礮  
船紮安陸以上襄陽以下唐瑞廷礮船紮安陸  
以下至沙陽止熊星源礮船紮沙陽以下至岳  
口止左光培礮船紮岳口以下至漢川止似此

節節蟬聯防務較爲周密先准撫臣曾國荃來  
咨已飭藩司彭毓橘馳赴黃安與姜玉順之師  
會合勦辦於十八日自應山拔營前赴黃安該  
逆於十九二十等日竄至新洲黃陂二十一日  
入孝感縣境該軍已落賊後諒中途聞警或已  
折回攔截如逆蹤由應京上犯亦必跟追滅此  
醜類續准撫臣十九日來咨因賊在固始派提

督郭松林率所部八營馳赴麻城羅田一帶扼  
紮此時想已在途 臣惟有督飭現有兵力探賊  
所向相機辦理斷不敢因撫 臣 在外稍涉推諉  
並據麻城縣知縣黃以慎等十九日報稱劉銘  
傳前隊已至該縣二十五里之伍家河地方合  
併陳明奏入

上命軍機大臣傳諭曾國藩李鴻章譚廷襄曾國荃

李鶴年曰擒匪由黃陂西竄孝感雲夢應城經官  
文派陸成祖等礮船分紮安陸襄陽等處聯絡防  
堵曾國荃所派彭毓橘一軍前赴應山已落賊後  
著卽飭令趕緊折回繞前迎截並著分派各軍與  
姜玉順之師合力夾擊劉銘傳甫抵麻城著曾國  
藩李鴻章飭令趕緊窮追並飭周盛波等分路追  
剿毋再遲滯賊匪志在西竄恐與陝省捻股合併

襄河防守最關緊要譚廷襄曾國荃當飭諸軍水  
陸嚴防其襄樊隨棗並德安安陸等處均應扼要  
嚴守總須就地殲除不可縱令竄出鄂境賊馬僅  
三四千匹餘衆均係徒步並無火藥勢已窮蹙正  
可乘機速籌殄滅曾國藩李鴻章當申明號令嚴  
檄湘淮諸軍與鄂豫將士合力同心迅掃狂氛勿  
存主客之見稍形膜視曾國荃幫辦鄂省軍務責

無旁貸尤當豫籌截勦不得任賊縱橫狂竄豫省  
信陽南陽一帶著李鶴年豫籌防堵毋令回竄會  
國藩李鴻章亦當兼防豫省南路不得專顧鄂境

初三日戊子張之萬奏言清淮防務以修築運河

圩牆與挑濬成子河爲當務之急該二處工程  
業已先後完竣臣於十一月初十日前赴徐州  
面晤李鴻章會商一切卽順道查看沿途圩牆

均已修築如法水陸隊伍亦尙整齊至成子河挑濬之處現已一律深通直達湖面惟濠身僅寬二丈步隊儘堪守禦若再爲展寬俾礮船得以周轉則來往梭巡尤爲得力已飭總兵張從龍督飭所部逐段挑寬當可迅速蕲事捻逆屢被大創其勢頗窮上游兵力較厚可無旁逸之虞而清淮屏蔽下河防守最關緊要惟有因地



設險隨時與曾國藩李鴻章會同籌辦總期聯絡聲勢保固疆圉奏入報

聞

初四日己丑官文曾國荃奏言賴任股匪被淮豫

各軍緊追由河南商城之馬岡集直入麻城之白雀園洪家河一帶其另股由光山之新集料棚竄入黃安之七里坪三里店其時臣等先調

西路之兵均尙在途而大股賊屬至麻城遊擊  
向百福知縣黃以慎堅守城池提督姜玉順一  
軍在中館驛夾洲港口等處分途迎擊十一月  
十七日小勝一次斃賊三百餘人奪馬四十餘  
匹擒任撻春等四十餘名十八日在豹子山等  
處大勝一次斃賊以千計生擒百餘名以賊數  
過衆兵力太單未能堵其竄越維時黃安黃陂

等縣先後告急一面極力守禦一面飛報藩司  
彭毓橘總兵熊登武率軍分途迎剿臣官文派  
道員湯聘珍率駐省洋槍隊渡江保衛漢鎮又  
飛飭漢江水師各營在內河分段嚴密堵禦並  
檄調提督譚仁芳一軍自小河溪回紮灑口以  
顧武漢門戶譚仁芳卽日啟行二十一日夜閒  
道經楊家岡猝遇賊騎該逆且戰且走僅被我

軍斬殺十餘名生擒一名時彭毓橘熊登武已由黃安橫出黃陂截勦該逆乘夜徑竄孝感因該縣有備賊遂西竄自楊家岡向雲夢德安大路奔突馬隊極多步隊約有三萬人二十二日竄撲雲夢二十三日黎明至德安府城東知府振麟等正在登陴守禦適福建提臣郭松林自唐縣率軍東來申刻馳抵德安城西見避兵難

民號呼求救遂督隊前進瞭望賊紮蔡家寨地方因薄暮未便深入賊覘知我軍遠行疲憊三更時從張店來撲偷劫行營郭松林親督各營迎擊該逆步騎相依極爲兇猛中路楊紹勳怒馬馳入手刃數賊各勇以洋槍猛進賊遂不支湯得上率勇繼至槍斃騎馬悍賊無數賊衆大潰自相踐踏死者甚衆左右兩路同時獲勝謝

連陞親砍首逆何光明一名賊狂奔義堂鎮我  
軍分路跟追擒斬不少是役也殲斃悍賊約二  
千餘人生擒老賊四百餘名訊據獲賊供稱本  
欲襲踞城垣爲度歲計不意官軍突至遂爾敗  
挫等語查此次擒匪入境剽疾異常賴汝洸任  
柱前後分爲四股遇迎頭之師則以前股衝陣  
而以後股擄糧遇躡尾之兵則以前股蔓延而

以後股抗拒無兵之地擄掠甚慘有兵之地奔竄如飛其勢旣難勦而尤難截我軍未苦戰而先苦追現在該逆敗竄應城一路恐由京山天門安陸上竄棗陽仍回豫境除飛檄總兵劉維楨道員唐協和兩軍一從棗陽一在襄境分路攔截並飛咨曾國藩李鴻章李鶴年迅速派兵防堵豫境合軍夾擊外臣國荃卽日移紮德安

督催彭毓橘熊登武及選鋒馬隊提督伍維壽  
等營星夜窮追以冀殄滅此寇奏入

上命軍機大臣傳諭曾國藩李鴻章譚廷襄曾國荃  
李鶴年曰任賴等逆由豫省商城竄入麻城兼擾  
黃安黃陂等處經姜玉順各軍分途截擊該逆竄  
撲雲夢突攻德安府城郭松林親督各軍迎擊陣  
斃悍賊多名賊衆大潰著譚廷襄曾國荃嚴飭郭



松林譚仁芳等軍趕緊窮追勿任喘息該逆現經  
挫敗必圖上竄京山天門一帶甚屬空虛曾國荃  
已檄飭總兵劉維楨等軍由棗陽襄陽分路攔截  
卽著該總兵等嚴爲堵禦規賊所向併力殲除曾  
國藩李鴻章亦當分飭劉銘傳周盛波等會合鄂  
軍分投兜擊不可縱賊竄出鄂境復肆蔓延其潯  
口等處仍著譚廷襄曾國荃檄飭派出各員嚴密

防守以固省垣所有鄂省追剿諸軍如有觀望不  
前任賊狂奔者著該署督等查明叅辦毋稍徇隱  
襄樊等境毗連豫疆難保該逆不乘虛回竄李鶴  
年務當豫籌防禦毋得專待客援致豫境又形糜  
爛劉秉璋等現在屯紮何處著曾國藩李鴻章飭  
令扼守鄂豫交界地方迎頭截擊以壯聲援

初六日 辛卯 李鴻章奏言 臣 欽奉

恩命簡授

欽差大臣於十一月二十三日馳抵徐州祇領關防  
疊據涼州鎮總兵周盛波等稟報任賴捻股自  
羅山擊敗十一月十四五等日經皖軍在固始  
扼勦該逆折向西南由商城竄光山繞山而逸  
周盛波督軍由光州四十里鋪越山追之十六  
日至白雀園該逆狂奔已過界嶺向湖北麻城

竄去周盛波因行糧缺乏俟派弁催提餉項到  
營卽入鄂追勦湖北撫臣曾國荃現駐德安之  
武勝關重兵均在西路自必派隊迎擊安徽撫  
臣英翰來函已派總兵張得勝等軍分紮六安  
之流波礮霍山之漫水河黑石渡等處六霍門  
戶稍有防備臣與曾國藩咨函籌商以此股捻  
逆勢已窮蹙湖北黃州各屬毗連皖西潛太英

宿一帶皆係田多之處有險可扼賊騎不易施  
展若我軍分路併進會合鄂師設法兜截或乘  
地利以圖聚殲現已派直隸提督劉銘傳江蘇  
臬司劉秉璋自周家口拔隊進固始商城與周  
盛波張樹珊分道入鄂由東北兜剿兼可屏蔽  
皖省鄂軍自隨州德安而下由西南進戰兼可  
自固腹地惟慮鄂皖之交圩寨最少積糧較多

賊匪到處可以掠食但能蹙之以兵力而不能  
困之以饑餓又鄂豫交界山徑紛歧此截彼竄  
尤在意中將來賊之出路不經隨棗向南陽則  
由光羅回汝信是豫省南路仍須扼紮重兵以  
備回竄夾擊之用現飭全軍營務處李昭慶統  
率南贛鎮總兵王永勝開字馬步十一營徐州  
鎮總兵董鳳高馬步七營暨所部親兵由陳州

周口直進汝甯信陽擇要屯駐屆時賊若久踞  
鄂中李昭慶到信陽後仍酌量分隊入山協剿  
若賊由鄂出竄相機迎擊鮑超如卽赴秦南陽  
一路似宜令豫軍宋慶等豫爲扼堵以昭周密  
再欽奉

諭旨淮河北岸應倣照黃運兩河辦法一律嚴守臣  
查目下冬令水涸逆衆雖過淮南淮河自桐柏

發源甚微由信陽下至固始數百里處處褰裳  
可渡似難節節置守且由隨棗出唐泌可繞淮  
河而往腹裏卽扼淮亦不能堵其回竄臣軍有  
進剿之兵更無分防數省之兵臣現駐徐州控  
制北路千餘里江境內僅留總兵劉士奇七營  
東境內僅留臬司潘鼎新十一營地曠力單空  
虛已甚如賊北竄聊張虛聲以爲策應其餘零



營分防運河者斷難擅動就目前大局而論臣  
督篆未卸政務極煩固不可遽離徐州曾國藩  
力辭回任尙駐周口距鄂較近相機調度必無  
貽誤臣仍隨時悉心會商並籌催後路餉糴轉  
運以利師行諄諭諸將戮力戰守以赴機會冀  
得早殲醜類奏入

上命軍機大臣傳諭曾國藩李鴻章譚廷襄李鶴年

曾國荃曰李鴻章於接受關防後派劉銘傳劉秉璋兩軍由固始商城與周盛波張樹珊所部分道入鄂著卽飭該提督等實力追剿與鄂軍夾擊毋稍延緩周盛波因行糧缺乏停兵待餉著李鴻章卽迅撥餉銀解往該營嚴催前進毋任藉詞稽延賊蹤已竄德安該大臣現飭李昭慶統率王永勝等軍馳赴汝甯信陽擇要屯紮如賊由德安北竄

汝信卽著飭李昭慶迎頭截擊譚廷襄曾國荃亦  
當飭鄂軍出境追擊若賊久踞鄂境李鴻章卽飭  
李昭慶入鄂助剿以杜賊匪北竄之路南陽一帶  
尙形空虛著李鶴年檄飭宋慶等軍豫爲扼守其  
襄鄖一帶著譚廷襄曾國荃分派鄂軍力籌堵截  
毋令竄入陝境與西路張總愚等股匪合併霍六  
等處既有皖軍分布任賴等逆如由德安回竄黃

州卽當合皖鄂湘淮各軍設法兜裏以圖聚殲賊  
騎飄忽靡定軍情亦且夕異宜李鴻章等當隨時  
調度總期督令湘淮諸軍並約會皖豫鄂各師不  
分畛域合力齊心同殲醜類毋誤戎機會國藩著  
仍遵前旨卽回江督本任以便李鴻章交卸地方  
事務專理軍政且可相機出境該督勳望素著辦  
理軍餉亦係重任不必身在軍營始足表篤棊之

忱也

初九日甲午官文奏言據各路探報十一月二十

一二十三等日逆匪分股竄至雲夢並盤踞德

安之蔡家寨地方雲夢應城相繼失守均經先

後收復其二十三日由胡金店竄出應城長江

埠之賊由黃家團觀音寺一帶攻破楊家河砦

二十四日竄撲天門縣城在北門缺口衝入經

該縣知縣楊宗時會同水師由岳口上岸攻擊  
該逆卽向西北漁新河潛江之張接港一帶竄  
去縣城卽時收復二十五六等日阜市之賊復  
竄天門京山前股於二十七日已至安陸府界  
先是姜玉順連日戰捷譚仁芳於二十一日又  
擊賊於孝感縣之楊家岡撫臣曾國荃飭提督  
郭松林八營於二十三日由隨州拔抵德安適

賊已至是夜勦賊於蔡家寨頗有斬擒二十六  
日追至阜市遇伏小挫查該逆自阜市而竄應  
城京山天門以及安陸府界勢將趨棗襄而入  
豫境現准撫臣曾國荃咨函楚省攔頭之軍惟  
棗陽劉維楨一軍襄陽唐協和一軍尙不知能  
否攔擊襄棗地勢平衍與豫省無殊萬難遏其  
去路等語而後路先經臣檄飭姜玉順扼紫雲

夢力防回竄更有郭松林彭毓橘譚仁芳各軍  
緊躡其後並據探稱總兵周盛波六營副將周  
盛傳五營並劉銘傳之軍已次第入境賊蹤剽  
疾各軍皆成尾追之勢但使該逆喘息稍停我  
軍跟追而上當可會合豫軍收東西夾擊之效  
至襄河向漢川以至安陸前派礮船諒已陸續  
駛入現在漢口人心大定貿易照常撫臣已於



前月二十五日移紮德安戰守機宜必能隨時  
調度

官文又奏言正封摺開據報京山天門境內之  
賊俱已走盡由石牌舊口直達宜城順安陸襄  
河邊界向西北而去現已竄至棗陽地界覘其  
情形似將竄出楚境郭松林沈鴻賓兩軍已於  
十一月二十九日由阜市拔營從天門進剿彭

毓橘譚仁芳熊登武各軍於三十日拔營由京  
山進剿合併陳明

同日曾國藩奏言欽奉

諭旨飭臣仍回江督本任臣辦捻無效仰荷

天恩不加嚴譴特令回任又蒙

聖慈垂訓解釋避勞就逸之嫌所以曲諒下情者無  
微不至臣具有天良豈不思黽勉圖報惟兩江

總督一缺事繁任重斷非病軀所能勝任與其  
勉強回任辜

恩溺職不如量而後入避位讓賢 臣上次摺內請俟  
三箇月後再行請開各缺目下察看軍情東路  
任賴一股鄂軍雖獲勝仗尙未大加懲創西路  
張逆一股已至鞏川藍田等處鮑超一軍因等  
候餉銀馬匹尙未據報起程 臣彌深焦灼若非

李鴻章迅赴前敵恐軍務終無起色合無仰懇

天恩另

簡兩江總督專辦後路籌餉等事或

飭下李鴻章自薦籌餉大員悉心區畫奏明款項專  
供湘淮各軍俾得出省調度庶幾上慰

宸廑下孚民望 臣卽在周口行營調養病體暗中商  
酌軍務不敢稍存膜視抑 臣更有請者 臣才力

竭蹶精力衰頹業經屢次陳奏並非因辦捻無  
功而始以引病爲卸責之地儻必責臣以回任  
則開缺之疏將累上而不已臣咎愈重

宸聽愈煩輾轉耽延徒稽時日大局或因而有損臣  
心愈無以自安惟有顛懇

天恩俯如所請准開兩江總督協辦大學士兩缺從  
此安心調治一二年後幸獲全愈臣必趨赴

闕廷再求

簡任圖報

高厚之恩於萬一

曾國藩又奏言東路任賴一股十一月十八九  
等日由黃安黃陂邊境竄擾孝感二十二日鄂  
軍譚仁芳接仗獲勝逆蹤橫竄德安適郭松林  
一軍由隨州疾馳迎勦二十三日夜閉在德安

城外大獲勝仗二十四日跟蹤追勦二十五日  
至王家廟接仗獲勝二十六日在阜河苦戰互  
有勝負據曾國基來函賊敗竄鍾祥恐將由隨  
州棗陽回竄豫境等語臣調劉銘傳一軍由上  
蔡遂平至唐縣新野一帶攔勦並令劉秉璋一  
軍與劉銘傳會合探蹤跟勦又慮賊由汝甯舞  
葉西竄復檄劉松山一面嚴防晉省黃河一面

辦有端倪再行前進 臣惟恐由晉領銀赴秦辦  
米往返不免耽延是以先後六次羽書諄懇陝  
西撫 臣劉蓉就近籌解米糧轉運至十二月初  
二日始准新任撫 臣喬松年及劉蓉會咨允許  
代辦並稱捻逆竄擾藍田鞏川藍橋各處現檄  
各軍張兩翼前進步步爲營業經屢獲小捷誠  
恐該逆被勦情急由鎮安以竄興郡則湖北鄖



如業已拔隊赴秦則不可回顧東股而誤西征  
之期已繳飭相機辦理

同日鮑超奏言欽奉

諭旨令臣軍速行赴秦臣先因秦中米糧轉運應照

上年江粵章程辦理由陝西撫臣轉飭地方官

豫爲籌備旋准兩江督臣曾國藩來咨特派江

蘇候補道薛書常在陝西代辦糧米並囑臣俟

北竄唐泌或由棗襄窺伺鄖陽飛商臣應如何  
嚴加防範同日據安襄鄖荆道崔蘭馨稟稱東  
路之賊已竄鍾祥舊口龔家集等處距襄屬流  
水溝不遠日夜狂奔有上竄之勢又據曾國藩  
咨稱因准湖北撫臣飛咨知賊上竄德安偏近  
襄棗霆軍如已拔營卽無庸回顧如未起程卽  
在南陽附近數十里內會勦共期殲滅各等因

襄皆爲震動除飭陝省各軍奮力勦擊外擬請  
分撥得力步隊六七千扼駐鎮安以截分竄之  
路仍留半駐紮荆子關以防回竄等因正擬於  
初三日拔隊前進初二日亥刻准湖北撫臣曾  
國荃八百里羽書以東路捻逆已由黃孝竄至  
德安檄令楚中各軍或跟蹤追勦或迎頭截擊  
誠恐賊衆日間相持夜則避兵而行或由隨棗

必敢犯與其駐師待賊不如前進夾擊聞任賴  
逆股上竄甚速臣定初六日卽率全部由新野  
迅赴楚疆相機夾擊以遏西竄之路如能先將  
此股就近殄滅然後專意西征以慰

宸廑均奏入

上命軍機大臣傳諭曾國藩李鴻章譚廷襄曾國荃  
喬松年劉蓉李鶴年鮑超日前因曾國藩患病未

查陝省各內情形不過欲臣前往防堵且既屢  
獲勝仗賊勢稍鬆楚中則鍾京一帶逆氛蔓延  
襄鄖等處尤形空虛此曾國藩所以欲臣就近  
會勦也臣熟計緩急宛南距秦千有餘里至楚  
祇二三程耳況張牛任賴同一叛逆秦中楚中  
莫非王土再四籌思不得不先其所急查該逆  
憤避兵而行宛南駐有大兵附近數十里內未

回任以後遇有湘淮軍事李鴻章仍當虛心咨商  
以期聯絡一氣毋許再有固請用慰塵念任賴等  
逆竄至雲夢等處相繼失守曾國荃駐紮德安統  
帶兵勇不少調度無方致令該逆如入無人之境  
不知所司何事著傳旨嚴行申飭現在賊勢將趨  
棗襄仍回豫境著譚廷襄曾國荃飭郭松林等軍  
認真堵剿毋許任其肆擾曾國荃身臨前敵責有

痊軍營事煩特令回兩江總督本任以資調攝並  
因其請以散員自效復疊次諭令迅速回任俾李  
鴻章得以相機進勦曾國藩爲國家心膂之臣誠  
信相孚已久當此捻逆未平後路糧卽軍火無人  
籌辦豈能無誤事機會國藩當仰體朝廷之意爲  
國分憂豈可稍涉疑慮固執已見著卽懍遵前旨  
剋期回任俾李鴻章得專意勦賊迅奏膚公該督

以來現在情形是否窺伺興安一帶鮑超業已先行赴鄂其陝西軍務著喬松年劉蓉督軍追勦毋得專待客兵鮑超於鄂豫之交殄除醜類後仍卽折赴陝中會勦不得稍有趨避



專司尤不得稍涉推諉致干重咎鮑超已由新野  
赴鄂該提督數月以來從未接仗此次統軍赴鄂  
距賊甚近若與湘淮諸軍前後夾擊卽可就地殲  
除斷不准徒託空言復任他竄該逆孰忽靡常豫  
境亦宜豫爲防範著李鶴年派兵迎剿毋令稍停  
喘息豫省兵力本單卽著曾國藩李鴻章派兵兼  
顧免致蔓延陝西張總愚股匪自竄擾藍田等處

拔隊追剿查賊蹤已至天門其西南則江漢大  
川爲之阻隔其正北隨棗與豫省桐栢新野壤  
地相連十二月初六日准提督鮑超咨稱東股  
賊勢較緊權宜緩急移師赴楚會剿已由該提  
督專摺馳奏臣以現在賊勢及各路官兵會剿  
情形計之湖北本省郭松林彭毓橘等軍外張  
樹珊周盛波周盛傳三軍計已深入楚境劉銘

欽定剿平捻匪方略卷二百六十六 丙寅年

十二月十二日 丁酉 李鴻年奏晉任賴股匪經

軍擊敗後由白雀圍竄擾麻城分竄黃岡黃陂

臣因該處轉運信羅飛飭總兵宋慶取道信陽

探蹤越期旋據探稱逆匪於十一月二十三

等日到應城之長江埠因官兵追躡旋向天門

一帶西竄等語復經檄飭宋慶迅向德安一路

出省擇要駐紮以憑調度至西竄張總愚一股  
雖無回竄信息而豫省西路之防仍屬喫緊已  
飭保英照常扼守閩鄉不准鬆勁奏入

上命軍機大臣傳諭曾國藩李鴻章譚延襄曾國荃  
李鶴年曰逆蹤已竄天門其西南有江漢之阻現  
在鮑超一軍業已入鄂著譚廷襄曾國荃督飭鮑  
超郭松林張樹珊劉銘傳等各路之兵三面兜圍

傳劉秉璋均自確山進兵鮑超復自棗隨壓賊  
之背三面兜圍南阻江漢賊衆已入阱中特恐  
該逆慣於避兵仍復乘虛紛竄則東趨熟徑又  
將回駛豫疆光固信羅終屬無險可扼臣飛箭  
宋慶於長驅直進之時尤宜兼顧後路一遇賊  
衆回竄趕緊繞前遏截一面飛催總兵張曜到  
豫臣與通盤籌議選將添兵亟加整頓臣隨卽

十三日戊戌署湖廣總督戶部左侍郎譚廷襄湖

北巡撫曾國荃奏言任賴股匪竄入鄂境臣國

荃移紮德安督軍勦辦並派總兵熊登武率軍

馳往應城旋據藩司彭毓橘稟稱十一月二十

四日道員葛承霖督率四營追賊至雲夢之斗

溝準賊以大隊排列我軍各營分路進擊鄧秦

福手刃騎賊二名該逆卻退適彭毓橘帶隊齊

務須就地殲除不准再有竄逸誠恐該逆慣於避  
兵乘虛回竄李鶴年務當督飭宋慶一軍兼顧後  
路曾國藩李鴻章卽檄鮑超等援鄂之軍實力會  
剿盡殲醜類不得稍有退縮李鶴年俟張曜到豫  
與之通盤籌商酌量出境居中駐紮以資得力西  
竄之張總愚股匪著該撫隨時確探嚴密設防勿  
稍鬆勁

督隊斷後餘俱改道繞楊家河迎頭截擊二十  
五日追抵盛家灘賊分二股一由應城西過小  
河一向韓家壩遁竄該軍遂由盛家灘追擊逆  
目李泳以馬賊數千任柱以步賊萬餘人回戰  
郭松林派楊紹勳等由中路擊戰湯得上等分  
兩翼合力勦之鏖戰良久賊始大敗追殺至王  
家廟斃賊數百名落水死者無數次日又分兩



至正議紮營會圍該逆乘夜西遁彭毓橘等截  
其後隊殲斃四百餘人生擒四十餘名克復雲  
夢其時賊之前股已至應城熊登武率隊趕至  
賊又夜遁該軍追殺數百名生擒百餘名收復  
應城先是福建提臣郭松林因賊分股肆竄由  
德安拔隊跟蹤追剿行至義堂鎮偵知賊已由  
兩河口竄應城天門一帶郭松林卽派李國珠

疾行百二十里馬不及秣人不及食若非力戰  
獲勝幾爲該賊所困彭毓橘熊登武譚仁芳各  
軍先後馳抵阜市偵知賊之大隊已至天門遂  
連夜追躡二十八日收復天門縣成賊因郭松  
林追之甚急分股繞及京山鍾祥境界幸安陸  
府知府同勳鍾祥縣知縣孫福海京山縣知縣  
陳祖心固守待援城俱無恙維時我軍分三路

路馳赴阜市以其地濱河岸意欲蹙之於水乃  
我軍甫進逆日李泳任柱等馬步萬餘人列陣  
於徐家集以待賴牛等營復抄襲官軍之後郭  
松林率曹仁美等營將至阜市正在餘疲之際  
賊突起猛撲郭松林等深入賊陣手持洋槍轉  
戰良久始得脫出幸左路吳宗國等繼進合隊  
分擊偪賊於小河邊擊斃淹斃不少是日我軍

以待悍賊馬步近二萬人迎敵我軍槍礮齊施  
賊復以數百騎潛襲我後經楊紹勳陷陣盪擊  
身受數創力戰良久賊始潰退適提督張定魁  
等率馬隊馳至擊賊之背賊始不支槍斃溺斃  
無數郭松林一軍斬馘尤多彭毓橘等軍同時  
獲勝於盧家寨其地樹木深密伏賊萬計見我  
軍甫到突出抵禦騎賊兩面包抄而來我軍仍

進勦將繞越安陸作迎頭之擊而賊之大股分  
而復合麕聚於舊口楊家峯一帶三十日我軍  
行進永澧河遇賊騎四布彭毓橘等軍敵永澧  
河舊口一股郭松林敵楊墩楊家峯一股賊依  
村結隊抗拒官軍郭松林手刃數賊其部卒殺  
賊百餘名以日暮未能深進十二月初一日各  
軍將過永澧河追勦賊騎大至郭松林等嚴陣

可無虞惟襄河北岸地勢遼闊僅道員唐協和  
一軍尙慮單薄隨州一路亦嫌空虛適兩江督  
臣曾國藩派提督周盛波一軍已抵黃安現令  
其由應山移屯隨州並函商直隸提臣劉銘傳  
江蘇臬司劉秉璋兩軍速由唐縣新野前赴襄  
棗一路會勦總期布取遠勢以杜奔逸

譚廷襄曾國荃又奏言此次捻股竄入雲夢等

分三路擊之。鏖戰逾時，賊始敗退。初二日，彭毓  
橘等復戰於三江口一帶，斃賊千計。各軍拔出  
難民三千餘名，擒悍賊一百五十餘名。是夜該  
逆尙在舊口。各軍議於次日會合進剿。臣等一  
面飭水師於襄河、唐白河一帶嚴密巡防，勿使  
偷渡。一面飭總兵劉維楨一軍在棗陽南山一  
帶先扼險要，樊城地方有提臣江長貴扼守。自

及防遂致捻逆闖入當經該員等帶領團勇隨  
同官軍收復城池查該員等疏於防範本屬責  
無可道惟念事起倉猝情有可原又帶勇勦賊  
隨同官軍收復城池尙知愧奮合無仰懇

天恩俯准將雲夢縣知縣文湛應城縣知縣沈兆元  
署天門縣知縣楊宗時革職留任以觀後效奏



縣境內其時雲夢縣知縣文湛應城縣知縣沈  
兆元正在鄉閒勸辦民團署天門縣知縣楊宗  
時尙在南岸監修隄工不料賊竄如飛日夜行  
一二百里該三縣均被賊陷臣等查雲夢縣城  
垣向因屢被賊擾坍塌不堪秋閒正在修築工  
程尙未及半應城天門兩城無兵無勇亦極單  
薄知縣沈兆元楊宗時均到任未滿半月猝不

和嚴密堵禦總之該逆在鄂地勢旣非平曠馬力不能施展若各軍齊心併力四面夾擊必可痛挫其鋒以後勢如破竹易於剿辦儻僅侈報小勝任聽該逆四竄於大局何益曾國荃久在軍營豈不深知諒不煩諄諄指示也鮑超一軍諒已抵鄂距賊不遠當可接仗並著曾國藩李鴻章催令迅速進剿毋再遷延鄂境力剿之後該逆乘閒竄豫亦

上命軍機大臣傳諭曾國藩李鴻章譚廷襄曾國荃  
李鶴年曰此次捻逆闖入鄂境疊陷城池雖各軍  
俱有勝仗尙爲奮勉而曾國荃近在德安漫無調  
度致令該逆任意蹂躪甚負期望著卽會同譚廷  
襄嚴飭各軍設計痛剿務當就地殲除勿令竄入  
豫境並著曾國藩李鴻章飭周盛波等分道進剿  
會合夾擊其襄河北岸著曾國荃派兵會同唐協

自能隨時調度查此股逆匪先由豫省之光固  
乘虛避兵而入行蹤剽疾晝夜不停遂致分駐  
各軍皆成尾追之勢續探賊已順安陸河邊竄  
向西北偏近棗陽地界知前路有兵復又折回  
鍾祥縣之舊口一帶正係臨河要隘恐其屯聚  
日久窺伺南渡關繫匪輕臣遂飭沿河礮船聯  
絡堵禦並令前駐田兒河之提督藍斯明兩營

在意中著李鶴年懷遵前旨派軍防勦不可稍涉  
大意知縣文湛等失守地方厥咎甚重若僅予以  
革職留任未免失之寬縱雲夢縣知縣文湛應城  
縣知縣沈兆元署天門縣知縣楊宗時均著改爲  
革職留營效力以示懲儆

十六日辛丑譚廷襄奏言捻匪竄入鄂境撫臣曾

國荃已於前月二十五日移紮德安戰守機宜

防鄖河之都司周有全管帶礮船往來兼顧現  
接撫臣來函並據提督郭松林呈報於十一月  
三十十二月初一等日追賊至楊家墩與慎字  
等軍會合擊賊大獲勝仗又聞舊口一帶屯聚  
之賊於初三日晚閒由高家集一帶向西北竄  
至蒿湖及隨州地界是該逆西南兩路皆不能  
遁又圖北去無異魚遊釜底如果追軍進逼不

移紮荆門州之沙洋以固北岸其前紮雲夢之  
姜玉順一軍仍舊扼防以備後路惟揆度大勢  
賊旣不能北去必將西擾襄樊該處係提督江  
長貴與道員唐協和駐軍力量較單不知能否  
攔截臣又添調荆襄各營兵三百名交江長貴  
統帶稍資協助其上游老河口爲楚陝交接貿  
易繁盛之區賊所垂涎又函知江長貴督率巡

裁撤樽節以期逐漸整頓無誤軍務

譚廷襄又奏言 臣接據鄖陽鎮總兵楊朝林等稟報陝賊襲陷臨潼擾至灞橋等處並在附近西安省城之引駕迴牛犢杜曲等鎮及孝義鎮安等處屯踞等情查賊至陝西爲日已久先欲北犯三河口渡黃趨晉未得逞志遂回竄南山希圖直達漢濱該處棚民簽匪本已不少設令



難聚而殲旃至於各路餉需所關尤重 臣自當  
督飭藩司籌備接濟第湖北各路水陸兵勇一  
百餘營需費太多每月出入兼權不敷之數約  
計在十餘萬兩以外百方羅掘歲底尤難 臣初  
至此閒情形不熟惟有先其所急隨時支應一  
面留心查察凡有疲乏散碎不能得力之營及  
向來支應稍涉浮多者俟軍務略定分別商酌

水落灘淺仍屬有險可扼似應由陝安漢中二鎮及地方官或派舟師或添陸隊擇要堵遏不任乘機搶渡以期保全川楚可否

下提督鮑超暨陝西巡撫喬松年等審度地勢情形迅速辦理奏入

上命軍機大臣傳諭譚廷襄曾國荃喬松年劉蓉鮑超曰舊口屯聚之賊由高家集一帶向西北竄至

勾結引導西偏川疆東擾楚境皆意中事而商  
洛之長嶺關竹林關漫川關等處緊與鄖西接  
壤其勢尤易波及現在鄂省之賊駸駸欲向襄  
樊其爲暗中聯絡已可概見鮑超一軍旣調由  
荆子關赴秦似應嚴催迅速進兵商南商州截  
斷該匪入楚之路庶事半功倍不致滋蔓難圖  
否則抵秦以後又成尾追之勢至漢江交冬雖

理以期無誤軍食其有疲乏不整萬難得力之營  
著與曾國荃會商裁汰以節糜費陝西賊股聞已  
襲陷臨潼擾至灞橋等處又附近西安省城之引  
駕迴牛犢杜曲等鎮及孝義鎮安等處俱有賊蹤  
是此股賊衆已竄南山希圖直達漢濱該處棚民  
簽匪本屬不少設令勾結引導西徧川疆東擾楚  
境皆意中事而商洛之長嶺關竹林關漫川關等

蒿湖及隨州地界曾國荃前奏派總兵劉維楨一  
軍扼險於棗陽南山一帶賊如由隨棗竄去自可  
前截後追著譚廷襄曾國荃迅飭諸軍奮力合剿  
勿任再回豫疆又成不了之局鮑超一軍現已拔  
隊入鄂卽著該提督視賊所向認真剿辦先將此  
股殲除則陝賊勢孤不難撲滅勿再遷延瞻顧與  
賊相左徒勞跋涉也各路餉需著譚廷襄悉心經

荃派兵嚴防勿任竄突

上又命軍機大臣傳諭左宗棠曰前諭左宗棠馳赴甘肅督辦軍務該督由江西湖北行走計已將次入鄂現在陝西賊匪已竄南山希圖直達漢濱該處棚民簽匪本屬不少設令勾結引導西徧川疆東擾楚境皆意中事而商洛之長嶺關竹林關漫川關等處緊與鄖西接壤其勢尤易波及陝省兵

處緊與鄖西接壤其勢尤易波及陝省兵勇營數  
不少屢諭劉蓉出省督勦該前撫置若罔聞高臥  
省城以致軍無統率任賊紛竄不知是何居心近  
半月以來奏報杳然殊深焦灼劉蓉如不能出省  
卽著喬松年親赴前敵調度各軍設法痛勦省城  
防務交藩司林壽圖會同西安將軍穆隆阿妥爲  
辦理其襄鄖等處界連陝境之地著譚廷襄會國

鄒回逆劉典一軍曾否起行並著催令赴營以資  
得力

十七日壬寅署安徽巡撫英翰奏言臣於十一月

二十三日由固始回潁州時因賊股麕聚黃麻  
一帶故令各軍分駐英霍山中及固始等處兼  
顧潛太霍六之防以杜逆蹤旁竄詎該逆知東  
路有備銳意入鄂由黃陂孝感分擾德安雲夢



勇不少疊諭劉蓉出省調度該前撫高臥省城毫無布置諸軍督率無人以致二華藍田渭南臨潼等處俱被擾竄半月以來未見奏報不知情形究竟若何殊深西顧之憂左宗棠帶兵由湖北入秦著卽確切偵探覘賊所向迎頭扼堵杜賊竄鄂之路如賊尙在秦卽著該督迅赴陝西督飭諸軍先剿南山一帶之賊俟此股辦有眉目再赴甘肅督

擊臣現已飭調郭寶昌一軍移紮商城程文炳  
一軍移紮息縣之烏龍集方長華一軍移紮商  
固霍邱交界之葉家集仍令黃秉鈞之軍穩紮  
固始與各軍聯爲一氣何處探有賊蹤卽先行  
迎勦而附近之軍繼之期於到處皆可與賊力  
戰並令張得勝等軍分紮英霍山中兼顧安慶  
迤西邊圍藉資周密奏入

之間勢趨鄂之西境據報大股均在京山天門  
一帶安陸亦有賊蹤昨據各路來咨官文曾國  
荃已飭鄂軍分投攔截曾國藩李鴻章亦檄劉  
銘傳劉秉璋各軍由信陽一路會剿如能蹙賊  
於山重水複之地固可一鼓成功但恐逆蹤飄  
疾乘隙紛趨則皖豫鄂上下連圻均宜戒備且  
羅信有警則光商固息尤須多置勁旅隨地迎

省主客各軍聯絡聲勢以壯軍威

十九日甲辰譚廷襄曾國荃奏言賊自入鄂以來

晝夜狂奔不容喘息惟竄踞舊口爲日較多方  
賊之前股至郢東驛地方提督伍維壽帶馬隊  
由京山縣閒道繞出其前十一月三十日突遇  
奮擊斃賊百餘名十二月初一日復戰於游家  
集殲斃賊會張百川殺賊二百餘名生擒二十

上命軍機大臣傳諭英翰曰捻匪入鄂以後由黃麻等處竄擾德安蹤跡飄忽勢將折回豫境英翰現派郭寶昌等軍移紮商城固息等處越境防堵以備迎勦實能不分畛域深堪嘉尙豫境地廣兵單不敷分布該撫能調撥皖軍分紮豫境東南俾諺省防務益臻周密皖省西北亦可藉固藩籬布置頗爲妥協著卽督飭郭寶昌等實力堵截並與豫

百數十名我軍力戰陣亡者總兵張鳳鳴副將  
鍾光斗遊擊楊爵發都司謝寶城熊復勝彭品  
六周東美千總任連升等八員初四夜聞彭毓  
橘派精銳潛劫賊營因訊據擒賊戴勝常供稱  
賊中有頭目陳槐邦久欲投誠彭毓橘卽令戴  
勝常入賊中招降並乘夜搶劫賊壘焚賊館數  
處殺賊數十名陳槐邦乘機內應殺斃賊酋數

四名初三日復力戰於董家集斃賊八百餘名  
解散難民二千餘人其時賊銳意西竄不虞該  
軍猝至迎頭截擊賊遂折回舊口伍維壽馬兵  
過單無步隊相輔遂於鍾祥城外扼紮福建提  
臣郭松林等於此數日內無日不戰初三日有  
薛家潭小河之捷彭毓橘軍斃賊約七八百名  
譚仁芳軍斃賊約三四百名熊登武軍斃賊約

郭松林親率五營先進羅家集地方業獲勝仗  
該逆以大股埋伏乘郭松林立營未定分路包  
抄左右伏賊盡起以馬賊圍裏以步賊接戰郭  
松林奮勇突陣鏖戰一日該逆不少退卻愈聚  
愈衆郭松林身受七傷左足幾斷直至三更始  
突圍而出在舊口養傷該軍大挫譚仁芳熊登  
武隨彭毓橘率大隊繼進賊卽狂竄我軍仍奮



名斃賊百數十名遂帶所部馬賊一百五十三  
騎步賊四百餘名出降彭毓橘令其薙髮遣散  
酌留精壯善戰者六十騎仍令陳槐邦管帶作  
爲前敵誘降是日郭松林有薛家嶺之戰斃賊  
數百賊旣屢爲官軍所創遂從舊口竄出我軍  
滾營進紮賊乃以悍賊殿後死拒其馬隊橫互  
數十里我軍合力追勦搃斬步賊甚多初六日

另行查明具奏外所有初三日在薛家潭力戰陣亡之張鳳鳴等八員先行仰懇

天恩飭部各照本職從優議卹以慰忠魂刻下鄂省追軍緊躡其後並派總兵劉維垣從吳家店攔頭截擊道員唐協和爲繼進之師復飭提督姜玉順由雲夢進紮應城以防回竄至曾國藩李鴻章所派總兵周盛波張樹珊兩軍業於十一

勇力追賊之大股趨鍾祥一路知府同勳知縣  
孫福海等固守於內伍維壽屢戰於外方賊之  
踞天門舊口以上鍾祥以下也每於空隙處所  
擄划結筏圖竄南岸完善地方經臣等檄飭水  
師唐瑞廷等營日夜以礮船梭巡屢次擊退搶  
奪划筏斃賊不少而南岸民團護助礮船防堵  
甚密自可無虞偷渡除郭松林一軍陣亡將弁

宸廑奏八

上命軍機大臣傳諭曾國藩李鴻章譚廷襄曾國荃  
李鶴年曰賊由舊口出竄官軍無日不戰各獲小  
勝初六日之戰郭松林先勝後挫受傷甚重覽奏  
曷勝廑系所有力戰陣亡之總兵張鳳鳴副將鍾  
光斗遊擊楊爵發都司謝寶城熊復勝彭品六周  
東美千總任連升著各照本職交部從優議卹以

慰忠魂賊之大股趨鍾祥一路刻下鄂省追軍緊  
躡其後譚廷襄等已派總兵劉維楨從吳家店攔  
頭截擊唐協和繼之復飭姜玉順由雲夢進紮應  
城以防回竄著卽督飭諸將前截後追仍規取遠  
勢殲賊於唐白河襄河之間儻再任賊紛竄漫無  
布置恐該督撫不能當此重咎也周盛波等軍均  
已陸續入鄂著曾國藩李鴻章李鶴年分飭諸軍

遇賊卽擊不准稍分畛域如查有臨敵退避致賊  
蹤復行蔓延卽著於軍前正法以昭炯戒

同日甘肅按察使劉典奏言 臣奉

命署理甘肅按察使幫辦陝甘總督左宗棠軍務現  
因母病未痊 臣咯血加劇已呈請督 臣左宗棠

暨湖南撫 臣李瀚章察核一面趕緊醫治以期  
速愈昨准督 臣左宗棠知會令 臣募勇三千帶

赴甘肅查 臣舊帶弁勇早經遣散一時招募挑  
選尙需時日伏乞

聖恩曲賜鑒原賞假五箇月俾 臣安心醫病並在籍  
挑募勇丁一俟 臣病稍痊丁勇厚集卽行帶赴  
甘肅靜候左宗棠調遣再行奏報起程日期斷  
不敢藉詞遷延奏入

上命軍機大臣傳諭左宗棠李瀚章劉典曰甘肅情

形待援孔亟前因陝西賊勢鴟張督率無人令左宗棠由鄂入秦先行督勦陝西賊股惟左宗棠兵數不多必須劉典趕緊到營兵力始能稍厚若遷延數月則軍情賊勢變幻靡常局勢何堪設想劉典著賞假兩箇月一面趕緊調理一面募勇訓練剋期起行並著左宗棠李瀚章催令迅速籌辦不得稍事逗留左宗棠懷遵前旨帶兵迅卽入秦肅



清陝境

二十三日戊申李鴻章奏言臣疊奉

諭旨飭催鮑超劉銘傳張樹珊周盛波等軍分道入鄂會剿查鮑超一軍已於十二月初六日由南陽拔隊赴新野樊城劉銘傳劉秉璋兩軍於初四初六等日抵信陽初八九等日分起拔赴棗陽此三軍者均已入鄂北境分路前進正得迎

頭攔擊之勢張樹珊一軍於初二日由麻城馳  
赴黃安之河口與周盛波會合初六日進應山  
之廣水驛周盛波一軍在黃安候提餉銀初五  
日進應山之馬口嶺此二軍者均已入鄂東北  
境合力進取又得從旁兜剿之勢據劉銘傳張  
樹珊等稟報皆接湖北撫臣曾國荃來函商令  
劉銘傳劉秉璋會於棗陽攔頭進逼張樹珊周

盛波由應山折赴應城與郭松林等會剿十二月初一日郭松林等軍在安陸之楊家峯遇賊大戰獲勝初五六等日擒逆仍聚鍾祥之舊口一帶賊衆以數萬計又據探稱該逆於襄河淤淺處竄越前股擾及荆門之石牌驛後股尙踞安陸境內未知確否揣度逆情初欲從安陸竄隨棗回豫現有鮑超劉銘傳等大枝勁旅由西

北壓下則回竄無路必又退屯襄河左右仍窺  
腹地曾國荃是以函飭張樹珊等由德安應城  
協同兜剿兼顧後路曾國荃老於兵事 臣復飛  
飭諸將就近稟承指示相機妥辦必不貽誤事  
機惟有可慮者兩端各軍俱在襄河東岸兵勢  
四集蹙賊一隅適屆冬令水涸難保不偷渡河  
西則荆襄完善不免蹂躪此可慮者一劉銘傳

劉秉璋張樹珊周盛波皆淮軍也糧臺尙在金陵轉運支應亦設在安徽之正陽關今深入鄂境相隔千數百里餉運艱遠人地生疏有匱乏難繼之勢據各軍稟報入鄂後日行六七十里山嶺重疊勇夫足裂羸馬蹶蹶者不一而足其饑困形狀可想賊在襄河東岸尙可奮勉馳驅若至襄河以西恐難強令遠去此可慮者二欽

奉

諭旨鄂省地勢旣非平曠馬力不能施展若各軍四面夾擊必可痛挫其鋒仰蒙

聖明指授機宜曲盡事理目下軍勢旣集網羅已張鄂省西南有漢江之阻較東豫地形平曠者有閒曾國荃久擬誘賊入險三面兜剿以期聚殲無如本省兵力不厚圩寨過少賊得飽掠亂竄

然僱於郭松林等之追兵猛速雖陷數城未敢  
屯踞少停喘息鄂軍實甚出力此次鮑超劉銘  
傳抵襄棗後該逆如尙未出鄂境或可就地圍  
攻痛挫其鋒臣昨緘商會國荃謂勿以賊速出  
境爲望而以設法殲除爲謀會國荃與諸將均  
同此意惟鄂邊山徑歧出此擊彼竄恐仍乘閒  
回豫臣前咨商會國藩派李昭慶統率王永勝

董鳳高等軍馳赴汝甯信陽擇要扼紮以備鄂  
賊回竄時迎頭截擊李昭慶現已於十一日由  
周口拔隊赴汝酌量布置又據統領老湘營總  
兵劉松山自洛陽稟報探聞張總愚捻股於十  
二月初四夜閒由臨潼縣屬之交口雨金鎮渡  
過渭北在關山鎮西豫讓橋一帶屯踞等語先  
准劉蓉咨稱張逆回竄渭華將偷渡回朝是晉



西河防與秦中腹地均甚喫緊該逆旣經渡渭  
一時似不能回豫不致與鄂中任賴各逆勾合  
聞山西臬司陳湜水陸布守頗嚴又有曾國藩  
所派劉松山等營分屯洛陝與陳湜就近策應  
惟慮嚴冬河凍成橋礮船難以得力但宜分軍  
沿河密紮先保晉省完善之區俟鮑超殄滅東  
股自當遵

旨折赴陝中徐圖掃蕩奏入

上命軍機大臣傳諭曾國藩李鴻章譚廷襄曾國荃  
李鶴年趙長齡喬松年劉蓉曰捻逆仍聚鍾祥之  
舊口一帶並探聞該逆於襄河淤淺處竄越前股  
擾及荆門之石牌驛後股尙踞安陸鮑超劉銘傳  
等軍由豫進援從鄂境之西北路壓下則該逆既  
不能由隨棗回竄豫境勢必屯踞襄河左右窺伺

腹地前有旨諭譚廷襄曾國荃等規取遠勢務殲  
賊於唐白河襄河之間現在軍勢旣集網羅已張  
正可誘賊入險爲一鼓聚殲之計著曾國藩李鴻  
章檄飭霆軍及湘淮諸軍分路進剿迅殄逆氛不  
得稍分畛域曾國荃務將此股賊匪就地殲除若  
僅以驅賊出境爲了事縱令該逆回竄豫疆惟曾  
國荃是問並著李鶴年激勵官軍嚴密防堵毋令

該逆再行闖入張總愚捻股由臨潼縣屬之交口  
雨金鎮渡過渭北在關山鎮西豫讓橋一帶屯距  
該逆旣圖偷渡同朝晉西河防又形喫緊著趙長  
齡嚴檄臬司陳湜分飭各軍嚴防水陸不可稍涉  
疏虞秦中腹地賊勢並未稍鬆著喬松年劉蓉妥  
籌勦辦迅圖撲滅

欽定勦平捻匪方略卷二百六十七 丙寅年

十二月二十七日壬子曾國藩奏言欽奉十二月

初九日

諭旨令臣剋期回任毋許再有固請臣受

恩極重何敢固執已見不爲

朝廷分憂惟臣屢次陳請開缺實以兩江總督任  
重事繁非病軀所能勝任累疏所陳均係實情

毫無虛飾乃蒙

聖恩寬假勉以弗涉疑慮示以誠信相孚委曲開導  
無微不至揆之古人遇合之隆無以逾此臣再  
四躊躇欲回任則自揣一日之精神難了一日  
之公牘終致貽誤地方欲再辭則臣一日不回  
本任李鴻章一日不出江境必先貽誤軍事二  
者兼權仍以軍務爲重謹遵

諭旨卽於正月初旬回駐徐州暫接兩江總督關防  
俾李鴻章迅速交卸馳赴前敵仰副

皇上殷殷訓誡之至意惟臣之下忱有不能不再陳  
於

聖主之前者 臣勤檢無功方深慚悚今若因告病而  
回駐金陵卸重大之肩居安閒之地跡涉畏難  
取巧旣恐無以謝清議亦覺無以對部曲且 臣

曾以捻匪已成流寇勦辦極無把握爲慮今又  
擾及陝西流竄六省縱橫三千餘里剽疾如風  
李鴻章一人接辦尙恐難周自當遵照上年九  
月初六日

諭旨東西兩路分別辦理李鴻章精力方盛統籌全  
局擇地駐紮以西路爲主臣駐紮徐州防勦以  
東路爲主一以爲李鴻章後勁之助一以爲臣



補過之資至 臣病體未痊業經疊次詳奏力疾  
以圖軍事斷難兼顧地方重任惟有顛懇

天恩從容籌議另

簡兩江總督 臣仍以散員效力行閒感沐

鴻慈實無旣極俟兩三月後再當剴切陳奏

曾國藩又奏言東路任賴一股盤旋安陸之舊  
口等處鄂軍疊次獲勝十二月初六日郭松林

控嶼一次沈鴻賓營壘被圍苦守獲至十一日  
彭毓橘熊登武譚仁芳等三軍在沙港地方鏖  
戰竟日殺傷相當十二日該逆偏近安陸府城  
劉維楨一軍乘夜擊之遂折而東趨十五日姜  
玉順一軍在應城迎勦以兵力太單未能扼截  
臣接曾國荃十六夜來信賊之前股已至義堂  
鎮距德安府城四十餘里必向孝感大路奔竄

等語計援剿之師鮑超一軍於初九日行抵棗陽周盛波張樹珊兩軍初九日至隨州劉銘傳劉秉璋兩軍亦向隨棗一路進發兵力均在鄂省西路賊知援兵將至疾馳東趨此剿彼竄備多力分迄無制勝之策現惟檄令鮑超劉銘傳等軍仍向鄂東分途追剿不知能否補救西路張逆一股壘據各路報稱由臨潼縣屬之交口

等處渡過渭北勢將竄擾同朝窺伺晉省臣前  
於初九日接鮑超來文因任賴股匪偪近襄陽  
業經自行奏明移師赴鄂先勦東股等語臣以  
籌畫月餘無兵入秦正深焦灼次日接喬松年  
函稱鮑超若由荆子關入秦正恐偪賊愈西轉  
形棘手若由潼關進兵機勢較順臣卽改檄劉  
松山速從潼關入秦頃據劉松山稟報已於十

六日自洛陽撥隊援秦年內必入潼關或可在  
同朝等處設法攔勦保全晉省完善之區劉松  
山張錫嶠等旣已入秦應卽在陝州設立糧臺  
仍派候補道薛書常管理江南之餉銀軍火等  
件擬由徐州雇備長車解至河南省城請

旨飭下河南撫臣李鶴年亦雇長車轉解陝州如此  
分段遞運較易集事至三河茅津渡一帶河凍

冰堅必須有兵與晉省夾河設防已商之李鴻  
章於淮勇中酌調一兩軍徑赴陝州駐紮矣

同日譚廷襄會國荃奏言提督伍維壽所部馬  
隊在安陸府城外扼紮後自十二月初五至十  
一等日幾於無日不戰殲斃賊匪甚多賊遂不  
能西上初八日彭毓橘熊登武譚仁芳三軍進  
至羅家集駐紮正在修壘賊以馬隊數千四面

包抄而以步賊從中衝突我軍一面修壘一面以劈山礮轟擊斃賊不少初九日潦營進至楊家嘴該處徧地賊館我軍適至追殺數里斃賊三百餘名生擒二十餘名解散難民無數初十日黎明馬賊環繞官軍營壘之後步賊伏於樹林邨莊彭毓橘等排列劈山礮轟擊馬賊是日風沙迷目未能與步賊接戰夜間接郭松林部

將沈鴻賓飛函求救十一日黎明三軍拔隊往  
援行未十里卽見馬賊營館逐層布紮彭毓橘  
等分三路進剿該逆馬賊五六千騎張作兩翼  
包抄步賊三萬餘衆分作數枝衝突蠡擁而前  
各營以劈山礮排列轟斃賊匪極多該逆冒煙  
衝突彭毓橘親督葛承霖等奮力猛擊殺斃悍  
賊六百餘名中路步賊全數敗退適譚仁芳等



將左路馬賊擊斃百餘騎該逆馬步折回悉向  
右路猛衝熊登武等竭力抵住彭毓橘等橫出  
截擊殲斃先鋒賊數十名帶隊賊目七名內有  
任萬邦一名該逆馬隊全股大敗我軍乘勝追  
殺七八里踏破賊營賊館二十餘處殺斃悍賊  
三千餘名生擒百餘名沈鴻賓一營賴是日之  
戰得以解圍先是賊會僞德王唐日榮暗中納

欵欲率所部乞降經譚仁芳給發諭帖不意爲  
賴汶洸覺察將其全家殺戮惟其弟逃脫至譚  
仁芳營中從此少一悍酋亦爲快事賊自屢敗  
後一股竄向鍾棗境界一股竄向天門京山界  
內其竄鍾棗者經劉維楨一軍於張家集一帶  
擊敗十二日劉維楨探知新河地方來賊一股  
遂率劉炳忠分三路猛勦追殺二十餘里斃賊

數百名賊仍下趨與竄京山天門之股合併彭  
毓橘熊登武譚仁芳因賊從閒道橫趨方期與  
淮軍各營由隨州茅茨畝踰京山之東南可以  
夾擊不意尙隔大山賊先乘夜奔竄鄂軍於是  
分路窮追而步隊不如馬賊之速十五日賊前  
股至應城適姜玉順隊伍初到列隊迎擊該逆  
遂向武顯廟西南而去姜玉順追二十餘里斃

賊八百餘名次日後隊由該處經過者又經姜  
玉順擊之斃賊亦多該逆分枝向東北義堂白  
沙大路而去查鄂軍苦戰已久士卒漸疲所有  
陣亡副將顏光杰左得勝參將鄧志鼇都司姜  
占春王連陞李全勝守備彭起瑞溫金甲千總  
陳白玉均屬奮不顧身深堪憫惻應先仰懇

天恩飭部各照本職從優議卹以慰忠魂臣等疊次

欽奉

諭旨恐賊銳意西趨與張總愚會合肆毒秦豫旋因  
霆軍淮軍次第而來深慮該逆於大兵未到之  
先倏又東竄蹂躪地方今果竄至黃孝一帶除  
飛咨曾國藩李鴻章李鶴年英翰派兵堵剿皖  
豫外臣等嚴飭鄂軍及彭毓橘熊登武譚仁芳  
劉維楨姜玉順等軍迅速馳剿並檄令周盛波

張樹珊由京山趨應城雲夢速進會合圍攻一  
面咨會浙江提臣鮑超仍率霆軍入秦而令唐  
協和一軍豫防鄖屬至郭松林受傷甚重已昇  
至德安醫治矣

譚廷襄又奏言臣前以賊蹤趨重安陸襄河上  
游喫緊恐其乘機搶渡當飭張啟基礎船赴仙  
桃鎮會同左光培水師合力巡防而令副將唐

瑞廷率所部駛赴安陸一帶力扼上游嗣據彭  
毓橘等稟稱賊匪屢撲舊口營壘均經擊退旋  
卽橫竄隨州舊口倏又無賊查賊蹤剽疾異常  
先恐其突犯襄樊與張總愚合股以現在情形  
而論又恐西路大兵遏截該逆鋌險東趨則攔  
截之師又成尾追之勢續經撫臣派兵進紮京  
山並令姜玉順進紮應城臣又飛飭李濟清礮

船移赴河口與原駐灑口之萬化林聯絡應援  
爲武漢屏蔽正在籌畫間接撫臣函稱捻逆因  
前有重兵星夜東趨將由應城下竄已至距孝  
感四十里之胡金店該逆奔走如飛恐下游兵  
少不及兜勦雖有提督伍維壽馬隊抄至賊前  
爲數無多難令衝擊漢鎮又將喫重臣又調湯  
聘珍洋槍隊移紮礪口前紮沙洋之明勝二營



改令移紮瀟口惟有隨時揆度賊情就近設法  
籌備一面函商撫臣添隊堵截賊若他往卽飭  
防兵奮力窮追滅此醜類仍督同司道力籌前  
敵餉需以資接濟

同日李鶴年奏言前因任賴逆股竄至湖北天  
門派宋慶一軍越境會剿其時鄂省竄匪已至  
鍾祥一帶舊日地方緊逼漢江楚師彭毓橘郭

松林諸軍躡蹤截擊該逆西行卽擾襄樊北趨  
又將闖入豫境提督鮑超全軍已於十二月初  
六日由南陽拔隊取道棗隨足以杜賊窺伺襄  
樊之路惟豫省新野鄧州邊境空虛時虞竄突  
正在飛檄宋慶迅赴新野預備迎剿且可與鮑  
超之軍兩面兜截十三日適准湖北撫臣曾國  
荃函會捻逆因前路兵厚掉尾東趨已過應城

而下距德安僅數十里又南汝光道蒯賀蓀稟  
稱任賴股匪星夜東奔十二日夜聞已到雲夢  
縣屬之兩河口等語查鄂軍全力俱在安陸境  
內與賊追逐德安以東縱有防兵恐不足以阻  
賊竄越卽劉銘傳劉秉璋各軍亦已先後拔赴  
棗陽鮑超一軍亦在隨州儻賊由黃麻竄入光  
信則東路又虞滋擾而豫省別無可調之兵祇

得飛飭宋慶星夜由新野拔回信陽如賊竄光  
州卽可就近攔截其劉銘傳等軍偵知賊勢東  
竄必由西路折回但能出賊之前與鄂省諸軍  
合力兜剿當不至於蔓延又據西路探報張總  
愚一股屯紮渭南之倉頭孟家原等處邊馬擾  
至華州之赤水鎮有欲過渭河竄往同朝之說  
查渭河方冬水涸雖有晉師礮船在彼扼截恐

不能斷賊搶渡萬一由渭入黃則蒲州臨晉等處與同朝祇隔一水河岸縣長非晉省兵力所敷分布臣已飭保英一軍勤發偵探如賊果搶渡渭河卽由閩鄉拔渡黃河進紮永濟與晉省水陸各軍聯爲一氣以期力保完區均奏入

上命軍機大臣傳諭曾國藩李鴻章譚廷襄曾國荃李鶴年趙長齡喬松年劉蓉曰曾國藩於來年正

月  
初  
旬  
接  
兩  
江  
總  
督  
關  
防  
後  
卽  
著  
回  
駐  
徐  
州  
力  
顧  
東  
路  
並  
顧  
李  
鴻  
章  
後  
路  
辦  
理  
糧  
餉  
無  
令  
缺  
乏  
江  
督  
事  
繁  
責  
重  
此  
豈  
可  
以  
安  
逸  
之  
時  
該  
督  
自  
以  
跡  
涉  
畏  
難  
取  
巧  
無  
以  
對  
部  
曲  
未  
免  
鰓  
鰓  
過  
慮  
李  
鴻  
章  
俟  
曾  
國  
藩  
到  
徐  
後  
卽  
著  
酌  
度  
進  
紮  
豫  
省  
專  
辦  
西  
路  
軍  
務  
以  
副  
委  
任  
伍  
維  
壽  
彭  
毓  
橘  
劉  
維  
楨  
等  
軍  
各  
獲  
勝  
仗  
殺  
賊  
甚  
多  
所  
有  
陣  
亡  
之  
副  
將  
顏  
光  
杰  
左  
得  
勝  
參  
將

鄧志鼇都司姜占春王連陞李全勝守備彭起瑞  
溫金甲千總陳白玉均著交部各照本職從優議  
卹以慰忠魂賊之大股已至黃孝譚廷襄曾國荃  
已檄周盛波等由京山迅赴應城雲夢並令彭毓  
橘等星速馳剿卽著飭令各軍前截後追勿任擾  
及完善曾國藩李鴻章李鶴年當各派兵堵截以  
期一鼓聚殲李鶴年恐豫境空虛現飭宋慶回駐

信陽仍著籌添勁旅迎頭堵剿劉銘傳一軍卽著  
曾國藩李鴻章飭令赴鄂東剿賊保全豫境鮑超  
一軍卽令由潼關大路入陝會合劉松山等在同  
朝一帶盡力截剿劉松山等軍入秦應於陝州設  
立糧臺曾國藩已令薛書常管理江南之餉銀軍  
火由徐州雇備長車解至河南省城著李鶴年亦  
雇長車轉解陝州務須源源無誤以利師行三河



茅津渡一帶河凍冰堅著李鴻章於淮勇中酌調  
一兩軍徑赴陝州與晉省夾河設防晉防十分喫  
重趙長齡務飭陳湜專顧河防相機妥籌毋惜小  
費而誤大局張總愚賊股業已渡渭劉蓉因循坐  
誤幾於一籌莫展實堪痛恨賊勢現在趨重何路  
著喬松年劉蓉悉心籌辦該撫等責無旁貸不得  
專待客兵坐視地方蹂躪致干重咎鮑超等軍入

秦後著喬松年等轉運糧米以資軍食

同日丁寶楨奏言用兵之法審勢爲先方今捻匪奔竄無定恃馬力以恣獷悍又得地利以相馳騁禍連數年擾及數省雖有勁兵終難制其死命此誠馬步之勢有不相敵而計之急宜早變者也近來各省亦知南北異宜日以挑練馬隊爲急然挑練之法非將營兵配以馬匹卽係

招募馬勇 臣謂二者俱難得力何也綠營馬兵  
本屬無多且廢弛已久訓練較難以之偵探接  
應則可用以之衝鋒冒鏑則不能此馬兵之難  
於得用也馬勇出於招募一呼可數百人類皆  
四方湊集技藝既不熟練勇怯亦多不齊且應  
募者素非善良之輩約束一不如法則擾害及  
於地方每遇遣撤易流爲寇此馬勇之絕不可

用也於是請調黑龍江馬兵應用者聞近來  
東三省兵丁多經外調漸不如額故外省所請  
多亦不過一千名少或數百名且黑龍江營兵  
頗有習氣非本地之人不能管帶與勇營不相  
聯絡故亦不甚得力臣聞東三省民人多以打  
生爲業素習騎射馬槍技藝本其所長如能仿  
照各省募勇之法選派員弁前往彼處挑募樸

實壯丁按照勇營章程設立營哨編成隊伍勤  
加操練必當得力騎射素嫻訓練自易一也無  
東三省兵營之習氣而有東三省兵丁之技能  
二也擒賊未平足資攻勦賊平之後易於遣回  
免滋流弊三也調東三省之人來東訓練同爲  
北地水土亦宜較之南省兵勇來此尤爲便習  
四也由內地自立營哨則易於管束且與兵勇

亦相聯絡五也 臣到東四載熟察勦賊之情形  
詳審馬兵之利鈍有斷斷非此不爲功者用敢  
不揣冒昧思欲變通成法冀效一得之愚如蒙  
俞允 臣卽籌備餉糈選派委員前赴東三省挑募壯  
丁三千名並請

飭下該三省將軍遵照俟東省員弁到日由該將軍  
遴派得力之員會同招募分起陸續管帶來東

由臣分立營哨酌定陣式親自督帶訓練以備  
攻勦至此項應需馬匹過多採買不易仰懇

天恩俯准仿照督臣李鴻章所請於牧羣籌撥健壯  
馬三千匹解送該省卽於挑勇成軍之時按名  
點交各勇乘騎前來所有招募川資及口糧一  
切俱由東省籌備竊計此項三千馬隊如能訓  
練成軍較之步勇萬人尤爲得力練成之後臣

再將步營量爲遣撤截長補短期於兵餉兩有所濟至一切招募及編立營制哨隊並支給口分薪水各章程均俟奉

旨准行後再行悉心妥議詳細具陳奏入

上命軍機大臣傳諭丁寶楨曰據稱擬派員赴東三省挑募壯丁三千名來東立營訓練等語不爲無見卽著丁寶楨將一切招募編立營制哨隊並口



分薪水章程悉心妥議詳細具奏俟奏到時再降  
旨諭東三省將軍遵照派員會同招募該署撫所  
請在牧羣籌撥馬匹著一併俟奏到後降旨辦理  
丁寶楨又奏言運防汎地前經曾國藩奏明自  
長溝池北歸東軍防守長溝池南歸淮軍防守  
嗣李鴻章函商擬將長溝濟甯石佛趙邨一段  
均歸東省設防抽出淮軍以爲遊擊經撫臣閻

敬銘議以冬令河凍河北防務緊要已將運防  
各軍酌調河北力難兼顧俟河水消融河北情  
形稍鬆再行撥軍接守濟防刻下將近春令河  
冰漸泮偷越無虞自應將前防河北各軍酌量  
調回並將運防各軍量行難移迅換淮軍之防  
以便抽出淮軍爲遊擊之師茲擬將提督傅振  
邦所帶青菜等營兵七百名及遊擊郭大勝馮

勝材兩營勇丁一千名調赴濟甯之南自新店起至趙邨一段設守道員王成謙所帶常武馬步十四營調赴濟甯一帶自趙邨起至長溝一段設守自長溝至開河一段內外皆隔重湖一屆春融皆成沮洳賊難偷越現有勇營足敷守禦自開河至劉老口一段原係常武軍防守汛地現調回河北之副將莫組紳同知劉時霖二

營設守均限於明年正月初十日一律到防自  
劉老口以北至沈口原係總兵楊飛熊王心安  
副將王正起三軍分布均令仍照舊段分紮至  
河北之防雖屆春融冰泮亦宜加意防備現仍  
留參將韋應麒等營並礮船水師照舊駐紮惟  
曹西一帶屢經匪擾現在守局稍定將來賊如  
東趨卽令王成謙騰出七營與副將王正起八

營作爲戰兵準備游勦不敢以賊蹤較遠稍存  
鬆懈奏入報

聞

二十八日丑癸鮑超奏言臣前因東股捻逆偏近

襄棗曾奏明移師赴楚會勦十二月初六日卽  
由南陽拔隊行抵新野聞流水溝之賊全行遁  
回鍾祥舊口一帶因倍道前進初十日馳抵棗

陽之平林店距鍾祥僅一百七十里適據鍾祥  
縣訓導楊承先函稱鍾祥舊口之賊於初六日  
全行遁往隨州臣因該訓導此信係由鍾祥所  
發定屬確實且計該逆竄逾四日之久深慮已  
過隨境當卽改道兼程馳往以便迎頭截擊乃  
將抵隨州始知該處並無賊蹤據本營探馬回  
報該逆實未他竄仍盤踞鍾祥舊口一帶築牆

修壘意圖度歲因迅速回軍於十八日冒雪趕  
至安陸府城而賊已於十三日由天門應城遁  
回黃孝而去查該逆刻已遠遁數百里而提臣  
劉銘傳江蘇臬司劉秉璋南陽鎮總兵宋慶及  
提督周盛波張樹珊等軍現已陸續會集是楚  
中兵力已厚臣自應遵奉前  
旨趕緊入陝進剿西路之賊以慰

宸廛惟士卒連日奔馳又值大雪不止擬休兵二日  
定於二十一日自安陸府拔隊由樊城至荆子  
關直達秦省探明賊蹤痛加勦洗奏入

上命軍機大臣傳諭鮑超曰捻股遁走黃孝距該軍  
已數百里劉銘傳等軍俱陸續會集是鄂中兵力  
已厚現在陝西捻股麇聚待援甚亟著該提督懍  
遵二十七日寄諭趕緊入陝如何路徑捷卽由何



路前行總期探明賊蹤迎頭截擊痛加勦洗毋得  
徒事尾追再致與賊相左

三十日卯乙喬松年奏言捻匪入陝先擾華陰渭

南後擾藍田嗣由藍田復折向渭南自十一月  
十九日湘果營一敗之後官軍總未能盡力猛  
擊賊勢蔓延益遠時有賊騎渡渭窺伺渭北各  
縣而鎮西營鄢太愚一軍紮於新豐鎮被賊包

圍已至八日之久臣與劉蓉嚴督諸將力戰解圍所有在陝之新捷營彝字營湘果營英毅營雄毅營親兵營定中營及馬隊全行拔往陝省兵力全萃於斯滿望可收一戰之效十六日據探賊勢竄動新豐之圍已解臣與劉蓉正催各營緊躡追剿乃十七日疊報賊之大股近偏省城分南北兩路自東而西絡繹不斷城中官兵

無多不能截勦臣與署將軍穆隆阿副都統圖  
明額及司道分赴城樓料理城守是日探馬不  
能遠出不知追賊各軍信息十八日大雪難民  
紛紛進城不下萬人據云四鄉處處見賊十九  
日未刻帶領彝字營之候補道黃鼎蒼黃叩城  
而入據稟各營奮力進戰略有擒斬賊勢稍卻  
得與鎮西營聯絡一片已經解圍賊匪忽向西

竄察其情形係分兩路竄去北路之賊較多各營商定新捷一營由南路追剿其餘各營均由北路追剿詎從新豐追至灞橋賊之大股忽四面包抄諸軍苦戰不支全行潰敗黃鼎自整所部三營突圍而出傷亡尙不甚多其餘同行之湘果營英毅營親兵營定中營及馬隊盡被衝散傷亡不少尙不知各將下落其新捷營譚玉

龍一軍在南路曾否遇賊無從知悉等語臣聞  
之無任焦灼憤懣當酌給鍋帳令其暫紮東關  
卽發馬偵探據報賊馬不時游弋難於遠探惟  
見澆橋灞橋兵勇屍骸滿地委棄軍械甚多並  
聞賊之前隊已至鄠縣境內十九二十等日四  
鄉賊仍未退文報全行梗阻各營將領仍無消  
息伏思陝省兵力僅有此數此外別無可調之

兵此次大挫各營星散卽收集敗殘之衆亦難  
期其復振非有大枝勁旅前來大局不堪設想  
鮑超一軍又爲任逆一股牽掣留於楚北不克  
來援惟有仰懇

飭下安徽撫臣迅調已革總兵郭寶昌一軍星馳來  
陝庶可稍挫兇鋒保全大局

喬松年又奏言此時省城四面皆賊附近已無

一兵可調惟有西路劉效忠一軍現紮邠州祇得移緩就急先令調紮咸陽縣以扼渭北之衝用通省城聲息又有同知秦國輔新由楚北募到楚勇三營點驗尙爲精壯暫紮本關防守然此兩枝亦祇能近防不能遠窺查幫辦甘肅軍務按察使劉典經左宗棠奏明募勇先行赴甘又庫克吉泰德興阿之軍改道由內地出關均

須由陝境取道計此兩軍皆已在途若能有一  
軍先行趕到援剿亦可立救危急惟有仰懇

天恩飭催劉與庫克吉泰德興阿各軍迅速趨行來  
陝先辦擒逆迅掃狂氛

喬松年又奏言臣初到陝時以劉蓉在陝將及  
三年諸將皆其舊部當能恪遵號令是以軍事  
仍聽劉蓉辦理臣不稍存己見以期事權歸一



惟時加體察知各營粉飾疲玩習氣甚深以湘  
果英毅兩營爲尤甚且營官各行其意不肯相  
下並無大員總統劉蓉屢奉

諭旨出省終未出城各營彼此觀望軍心散漫是以  
致敗 臣竊見劉蓉褻躬清慎而乏斷制之才理  
財用兵實非所長宅心長厚尤易爲人所欺是  
以軍政隳壞而不自覺 臣原冀與協力和衷姑

濟目前之急今全軍潰敗無可復望舊時之勇  
既難期其振作新招之勇不必藉其指揮臣不  
敢因循貽誤不得不力任其責另加整頓即使  
該前署撫留陝會辦亦屬毫無裨益可否請  
旨仍行飭令回籍俟病痊聽候

簡用之處出自

聖裁奏入

上命軍機大臣傳諭曾國藩李鴻章左宗棠庫克吉  
泰德興阿英翰喬松年鮑超曰捻匪久踞陝境偏  
近省垣官軍從新豐追至灞橋被匪兜圍悉行潰  
散各營將領均不知下落省城文報阻隔危急萬  
分此時非有大枝勁旅星夜赴援陝事將不堪設  
想曾國藩李鴻章於捻匪竄陝以後將及兩月所  
謂各軍並未到陝鮑超一軍屢經諭令赴秦遷延

逗留致令陝省糜爛至於此極昨據鮑超奏稱已  
定於本月二十一日由鄂省安陸起程取道樊城  
荆子關入陝若再中途遲延該提督自問當得何  
罪劉松山一軍卽著曾國藩李鴻章迅催馳赴同  
朝並著庫克吉泰德興阿督率所部先辦陝省勦  
捻事務再行相機赴甘左宗棠前已有旨令其先  
行赴陝著卽兼程馳往秦中與喬松年整理戎政

陝省軍律廢弛已久此次潰散將領卽著喬松年查明嚴叅重辦此後如有不聽號令進戰不力壇行潰退者卽著左宗棠喬松年奏明在軍前正法以肅軍律並著左宗棠嚴催劉典速募湘勇成軍立限馳援陝省郭寶昌一軍著英翰飭令星馳赴陝聽候喬松年調遣並將該軍餉需速爲籌撥足用以便卽時拔營不准片刻停留並不准英翰奏

留致誤大局商城要路卽由英翰另撥一軍填紮  
以防捻匪回竄豫境劉蓉在陝有年一味寬縱致  
令將士毫無畏憚屢奉諭旨出省勦賊並不親臨  
前敵督戰以致諸軍進止不齊有此大挫深堪痛  
恨本日已明降諭旨將劉蓉革職卽著喬松年飭  
令回籍援軍未到以前喬松年當就現有兵力認  
眞防守省垣以固根本

上諭內閣曰前署陝西巡撫劉蓉以獲咎之員特令  
署理巡撫嗣復允其開缺暫留陝西辦理軍務值  
任不爲不專乃屢諭出省督勦置若罔聞以致官  
軍挫失捻勢愈張貽誤地方實堪痛恨劉蓉著卽  
革職毋庸再留陝西